

## **JESUSJA ECUADISHA CUANA EQUE YUSURA ACUAREQUE HECHOS**

Riyaque quirica: ri Lucasra hueneacuareque. JI-DAQUE QUISARATI LUCASRA HUENECUAREQUE huenequi jucuarera nucadyari hueneacuare. Hueneacuare rejari Jesús majutsu netitsuranucatsu jucuaque. Catibutiyaratu Lucasra hueneacuare Jesús Etataque queja tsuracuareque. Cuejacuare tujatu Jesús junanucabuqueque.

Jesusratu cuadishacuare tuja cuanaque, tunara cuitadya bacahuaque, bahuaque jadya cuejara cuaishu. Cuejamerecuare tujatu ecana tuja quisarati dutya ecuita riyaque yahuaju aniya cuanaque. Jerusalén eque tujatu ecana catibutishacuare israelita cuana eque, tuequedy peya queja israelita ama cuanaque.

Riyaque quiricaju ri tuna Jesúsra cuatsashaya equedy jucuaque, dutya queja tuja quisarati cueja juyaque. Pedrora, peya cuanara jadyatu Jesúsja quisarati cuejacuare israelita cuana (capítulos 1-9). Pedrora, Pablora jadyara tatsejatu Jesúsja quisarati cuejacuare israelita ama cuanaque (capítulos 10-28).

Riyaque quiricajuri aniya Yusuja Espíritu riyaque yahuaju junacuareque. Tuque Jesús queja catyatihua cuana queja junahuaju tunajatu bajida teshue ama Jesúsja quisarati cuejacuare. Acuare tuna Yusuja casa bamere ishucuaque jadya.

Tumebaedyari riyaque quiricaju aniya Jesús queja catyatimetse jucuaré cuanaque tuna eje bucha anie jucuaré cuanaque, tuna nrecada atacuare cuanaque jadya. Arepa canerecatiya ama bucha tuna canimehuallaticuare ama. Jesús queja nimee cuita camadya tuna jucuaré. Jadya tuna baatsutu peya cuana tumebaedyá tuaqueja catyaticuare.

*Jesúsra Yusuja Espíritu cuadisha ana acuaréque*

<sup>1</sup> Era ríque micue quirica cuadishaya, ecue eadebaque Teófilo. Riyaque ri beta ishúque quirica micue ishú cuadishayaque. Icueneque quiricaju míque cuejachine Jesús riyaque yahuaju jari tupu ai jucuaréque. Huenechine tuque era tuque ai jucuaréque, bahuityacuareque, tuque rehua mere catibuticuare equeque,

<sup>2-3</sup> tuque barepaju tsurachineque huecaca eque tupu. Diruma jarira tujatu mepecuare peadya tunca beta earacana tuja quisarati cuejara cuadisha ishú. Curusujutu majucuaré. Majutsutu chacha nityatsuranucacuare. Nityatsuranucatsutu riyaque yahuaju juneninucacuare jari pushi tunca huecaca tsuramaque jari. Tumeque pushi tunca huecaca juneniyaque jaritu eje uma cabamereti jucuaré tuja ecuadisha cuana queja. Jetiamadya tujatu ai acuaré yuneridya tuque chachaque caadebamereti ishú. Eje uma cuejadya tujatu ecana ahua Yusura eje bucha narue dutya adadiyaque. Yusuja Espíritu eque tujatu ecana cuejagua eje bucha cuejae tuja quisarati aishúque.

<sup>4</sup> Tuja ecuadisha cuana tsehue jarira tujatu ecana jadya acuare:

—Necuinanaume jari Jerusalén juque. Rehuadya neanicue jari Yusuja Espíritu micuana queja junaya tupu. Ecue Etataratu cuadishaya micuana queja tura cuadisha ana ahuaque. Icueneta cuejadya micuana ahua tumeque Espiritura micuana tsahuayaque.

<sup>5</sup> Icuene tuna Juanra ena tsehue utsacuare inime cacuaretihua jadique ejitaju juishu. Eje uma huecaca juatsu ama tuque micuanaja Yusura tuja Espíritu cuitadya cuadishaya micuana tuque mere ishü casa tyaishu, —jadyatu Jesúsra acuare tuja ecuadisha cuanaque.

*Jesús barepaju tsuracuareque  
(Mr 16.19-20; Lc 24.50-53)*

<sup>6</sup> Jesústu tuja ecuadisha cuana tsehue ecasitati juquare. Casitatitsu tunajatu Jesús acuare:

—Ecuana Cuatsashaquique, ¿riyaque huecaca eque mi mira ecuana israelita cuana tyaya casa ecuana yahua canaruti ishü, romano cuanara ecuana enaruuju? —jadya tunajatu Jesús acuare.

<sup>7</sup> Jesúsra tuna quemitsacuare:

—Ecue Etatara huecaca iyahuaque juetihujutu tura adadiya tura eje bucha inime pirehua eque. Micuana bahue ishüque ama tu eje tupu, jadya ama juatsu ejeque huecaca jadya judadiyaque. Yusuja peadya camadyatu casa aniya tumeque bahue juishuque.

<sup>8</sup> Yusuja Espíritu micuana queja junatsu, tura micuana tyanaya casa micuanaja ecue quisarati

cueja ishü. Icuene cuita necuejacue ecue quisarati rehua Jerusalénju, tuequedya Judea epu cuanaju, Samariaju jadya. Dutya yahuaju epu cuana dyaque japada cuanaju ecue quisarati necuejaticue, —jadya tuna Jesúsra acuare.

<sup>9</sup> Jadya Jesúsra cueja amena ahuaju tuna capetatinetibareyajutu Jesús huesatanatsu dirucuaré. Tsurayaquetu huani ducu aputacuare. Banuca ishü ama tuna bajacacuare.

<sup>10</sup> Jesús tsurahuaque tunara ebarucue queja petanityabareyajutu beta Yusu tsahuaquique ecatsé cabamereticuaré. Pajada tatsejatu una jucuaré. Jesúsja ecuadisha cuana queja tatse junacuare.

<sup>11</sup> —Tata ecana Galileaju cuanaque, ¿ai tuque micuana ebarucue queja petanityabareya? Jesússtu diruhua micuana quejaque. Tuque micuana barepaju tsurayaju bahua bucha, jadya junanucaedyatu ejeque huecaca jubuque Yusu quejaque, —jadya tatsejatu ecana acuare.

### *Jesúsra mepecuare cuanaque casitaticuareque*

<sup>12</sup> Tumetu Jesúsra mepecuare cuanaque Jerusalénju judirunucacuare, uhua cuemusü Olivo Acui Quini bacani juque butenucatsu. Tumeque uhua cuemusutu Jerusalén japadama jucuaré, peadya kilómetro dyane. Eje japa amatu jucuaré. Canajara huecacaju tunajatu cacuatsashati eque tume tupu eajeshataquetu jucuaré.

<sup>13</sup> Epu aridaju tuna judirucuaré. Tuhua junatitsu tuna cuacuare tuna aninaticuare etareju.

Tuna anidiruqui juyaju etareju tuna nubidircuare. Tsuracuare tuna beta ishuque pisoju. Jucuaire tuna: Pedro, Juan, Santiago, Andrés, Felipe, Tomás, Bartolomé, Mateo, peya Santiago, Simón, Judas jadya. Santiagotu Alfeoja ebacuaque jucuaire. Simóntu jucuaire Roma juque enaruquique bijidamaduraqui juyaque. Judastu Santiagoja ebacuaque jucuaire, Jesús inamerequi jucuaireque ama.

<sup>14</sup> Casitatijacama tuna jucuaire Yusu tsehue quisarati ishu. Jesús tsehuequi cuanaque tuna tuhuadya jucuaire. María, Jesúsja ecuaquetu tuhuadya jucuaire. Peya epuna cuana tuhuadya jucuaire. Tunadya tuna dutya casitati bahue junenicuare Yusu tsehue quisarati ishu.

*Jesús queja ecatyati cuanara Judas cuarequi Matías mepecuareque*

<sup>15</sup> Eje uma huecaca juatsu amatu Jesús queja ecatyati cuanaque ecasitati jucuaire. Jetiama, peadya ciento beta tunca earacana tuna ecasitati jucuaire. Pedrora tuna isaratibunecuare:

<sup>16</sup> —Ecue eatsehuequi cuanaque, nebacacue ique. Béru eje uma maratu Davidra icueneta huene acuare Judas Iscariote judadiyaque. Yusuja Espirituratu huenemerecuare. Davidra Yusuja quisarati icueneta huene acuare bae cuitadyatu judadichine. Riyaque Judasradyatu Jesús inamerechine tuque ujeu baqui cuana queja.

<sup>17</sup> Judastu ecuanaja ecare datse juchine. Ecuana tsehue mere jupee juishuque tucue patu emepe jucuaire.

<sup>18</sup> Jesús ujeu baqui cuana queja inamereya tsuje tunajatu chipiru tyachine. Tuequedya tujatu ecana yudijidya tyanuca achine chipiru tura jidama tsehue inahuaque. Tumeque chipiru tsehue tunajatu uhua quemichine. Judastu tuta taca quiyeti juchine. Pacacatsu tujatu pututachine edumijiti. Dutya tujatu esere cuana cuinanaterechine. Jadya majuetu juchine.

<sup>19</sup> Jerusalénju aniya cuanaratu bacatsachine quisarati Judas juchineque. Bahue tuna judadichine tuque tuhua ami quijehuetitsu majuchineque. Jadya tibudya tunajatu tumeque yahua Acéldama jadya bacanishachine, “Quiyeti pujija chipiru tsehue equemique emajaca” jadique.

<sup>20</sup> Quirica Salmos bacaniju tu jadya ehue: “Etaretu cashanatibuque. Ni ejeratu isaanibuque ama”. Tumbaedyu tu ehue Salmosju: “Peya tuque cuarequi paju”. Jadyatu icueneta huenetanadya jucuaire Yusuja quisarati.

<sup>21</sup> “Aniyari rehua ecuana Ecuana Cuatsashaqui tsehue junenitibunecuare patya eque junenicuare cuanaque.

<sup>22</sup> Junenicuare tuna Jesús tsehue tuque Juanra utsacuare patya equeque, tuque Etataque queja barepaju tsurachine tupu. Tunadya tuque ecuanaja peadya mepetaqui, ‘Jesús enetitsuranucaque’ quisarati cuejamere juishu, —jadya tuna Pedrora acuare:

<sup>23</sup> Dutya tupu tunajatu inime jucuaire. Jadya tibu tunajatu beta mepecuare. Peadyatu José

Barsabás jucuare. (Peya tujatu ebacani jucuare Justo.) Peya tunajatu mepecuare Matías.

<sup>24-25</sup> Jadya juatsu tuna Yusu tsehue quisaraticuare:

—Ecuana Cuatsashaquique, miratu adebaya peadya peadya eje buchique dutyaja inime tupu cuana. Bamerecue ecuana; ejeque riquemi ecatse mepehua Judas cuarequi mique merequi juishuque. Judasrami amena merejachua. Judiruhuatu eju tuque judiru ishujú, —jadya tunajatu acuare Yusu.

<sup>26</sup> Tunaja bahue tunajatu quemicuare dadoju ejeque ecatse Yusura mepehua jadique bahue juishu. Jadya adebae tunajatu acuare Matías, Judas cuarequi emepeque. Tumeque huecaca equetu Matiasra Yusu merecuare peadya tunca peadya earacana Jesúsja ecuadisha cuana tsehue.

## 2

### *Yusuja Espíritu junacuareque*

<sup>1</sup> Pentecostés chine juetihujutu Jesús queja dutya ecatyati cuanaque ecasitati jucuare ecastaticuareju cama. Pentecostés chinetu jucuare israelita cuanara euhua cuanaque huesayaque chine.

<sup>2</sup> Muya jutidyatu Yusuja Espíritu tuna queja butecuare. Sicacada tunajatu barepa equeque buteyaju bacacuare, cuejipa casadaque tuuetibeya bucha. Dutya etareju cuanaratu bacacuare tumeque sicacadaque.

<sup>3</sup> Tume tunajatu bacuare ai cuana achaacha piji etiqui juju bucha. Etiqui buchiquetu tunaja iyuca cuana dyaque peadya peadyaju netibarecuare.

<sup>4</sup> Jadya junaetu Yusuja Espíritu jucuare tuna peadya peadya queja. Tuna queja butetsu tujatu ecana bape bape yana eque quisaratishacuare. Tunaja yana eque ama tuna quisaratitibunecuare, peya yahua ju cuanaja yana cuana eque.

<sup>5</sup> Tume patyatu jetiama israelita cuana jucuare Jerusalénju Yusu muijaca baecua jucuare cuanaque, Moisésja cacuatsashati eque aniya cuanaque. Dutya yahua juque jujeri tuna juticuare.

<sup>6</sup> Eje bucha juyaque bacatsu tuna cuacuare Jesús queja ecatyati cuana queja. Tuhua junatitsu tunajatu Jesús queja nimee cuanaque quisaratibareyaju bacacuare. Bape bape yana eque tunajatu ecana quisaratiyaju bacacuare. Tuna quisarati cueja juyaju bacaqui cuanaja yana eque quisaratiyaju tunajatu bacacuare. Jadya bacatsu tuna eje buchadya jucara jucuare.

<sup>7</sup> Dyaque ejecutana tuna jucuare. Bape tunajatu bacacuare. Cacuejatibarecuare tuna tuna cama:

—¡Nebacacue! Dutya riya quisaratiya cuanaque taa rena Galileaju cuanaque.

<sup>8</sup> Jadya ama bucha taa rena Galileaju cuanaja yana eque ama quisaratiya, ecuanaja yana eque jutidya. ¿Eje buchique jatsu rique ecuanana ecanana ecuanaja yana eque quisaratiyaju bacaya ecuanana nanada equedya quisaratihua eque? Ecuana taa ecuanana eje uma peya yahua cuana juque.

<sup>9</sup> Umae ecuanana Partia juque, peya cuana bacue Mediaju, Elamju cuanaque. Umae bacue ecuanana Mesopotamiaju, Judeaju cuanaque. Umae ecuanana Capadocia juque, Pontoju, Asiaju cuanaque jadya.



<sup>10</sup> Umae ecuana Frigiaju cuanaque, Panfiliaju, Egiptoju cuanaque jadya. Peya cuana bacue ecuana Africa juque, Libia yahua juque Cirene japadamaque. Umae bacue ecuana Romaju cuanaque.

<sup>11</sup> Umae ecuana jechine Creta juque, Arabiaju cuanaque jadya. Umae ecuana Israel eque neri ejuracana cuanaque. Dutyaradya tuque ecuana Yusu Neri muiya israelita cuanara, israelita cuanara ama jadya. Dutyadya ecuana Moisésja cacuatsashati eque aniya. Arepa ecuana umada peya yahua cuana juque ama bucha tuque ecuana ecana bacaya ecuanaja yana eque quisaratijaju. Bacayadya ecuana ecana jida quisaratijaju, —jadya tuna jubarecuare.

<sup>12</sup> Dutyara tunajatu bape bacuare eje bucha adebataqui ama jadya. Jadya tibudya tuna cabacaduratibarecuare:

—¿Eje buchique ri riya jadya juyaque? —jadya ecana jubarecuare.

<sup>13</sup> Umaera bacue ijaribacuare jutidya Jesús queja ecatyati cuanaque.

—Nijuqui tibu tuna jadya quisaratiniya, —jadyatu jucuare umaecua.

### *Pedroro ecuita cuana isaracuareque*

<sup>14</sup> Pedrotu netitsuracuare ecuita cuana isara ishu. Peadya tunca peadya earacana Jesúsja ecuadisha cuanaque tuna tumbaedyu tuhuadya jucuare. Etsuri jebuda teshue tujatu isaratibunecuare israelita cuana, Jerusalénju aniya cuanaque tuhua jucuare cuanaque jadya:

—Tata ecana, nebacacue ique. Nebacacue jida era cuejayaque.

15 Nijuqui ama ecuana, micuanara inime tupuya bucha. Barepatya ama jari taa rique; las nueve pijidya taa rique. Ecuana israelita cuanaja tuque ecuanaja uva nacaca sasadaque iji baecua apudajudya cuita. Cuejaya micuana era, ecuana eje bucha juatsu jadya quisaratihuaque.

16 Riyaqueri jadya juya, Yusura icueneta cueja acuareque Joel tuja quisarati cuejaqui eque:

17 “Amena ishunque huecaca cuanaju tuque ecue Espíritu cuadishabuque yahuaju.

Israelita cuanaja ishucamadya ama, israelita ama cuanaja ishucumebaedyatuque cuadishabuque.

Micuana ecue juracanaya cuanaratu ecue quisarati tsapebuque.

Ecuita cuanara, epuna cuanara jadyatu quisarati tsapebuque.

Tahuijutu ecue Espiritura bahue amerebuque quisarati yunerique ehue ebari cuana, tumebaedyasiri cuanaque.

18 Tumeque huecaca cuanaju tuque ecue Espíritu cuadishabuque ique merequi cuana queja, ecuita cuana queja, tumebaedyapuna cuana queja.

Tunaratu cuejabuque ecue quisarati, era ecana jadya quisaratishabuque tibu.

19 Barepaju teshue tuna ecue dyaque casa aniyaque bamerebuque.

Tumebaedyatuque ecue casa bamerebuque yahuaju cuana teshue.

Amitu juribuque.

Etiquitu jujubuque.

Huani misidaquetu netitsurabuque.

<sup>20</sup> Ijetitu huecadama jubuque.

Baditu ami bucha pudee jubuque.

Jadyatu jubuque Ecuana Cuatsashaquique  
junanucama jariju, emuique, casadaque  
jadya cabameretima jariju.

<sup>21</sup> Dutya tuaqueja catsahuamereti ishu tuque ba-  
caqui cuanaquetu einajaca jubuque,”  
jadyatu Yusura quisarati acuare tuja quisarati  
cuejaqui Joel eque.

<sup>22</sup> Pedroratu tuhua jucuaque cuanaque quisarati  
cuejanucacuaque:

—Micuana Israel eque ejuracana cuanaque,  
nebacacue era cuejanucayaque. Cuejaya  
micuana Jesús Nazaret juque eje buchique.  
Tuque riyaque yahuaju jarira tujatu jetiama  
acuare ejeque ecuitaja ataquique ama micuanaja  
yacuaaju. Jetiama tujatu acuare micuanara bape  
bacuaque cuanaque. Dutya riya cuanaquetu  
Yusura amerecuare tura tuque cuadishahuaque  
yunerinemere ishu.

<sup>23</sup> Jadya ama buchatu micuanaradya inamere-  
hua. Micuanaratu ecuita jidama cuana queja  
curusuju tatamerehua tuque iye ishu. Dutya riya  
cuanaquetu jadya judadihua Yusura inime pire-  
hua equedya. Tuquetu icuenetadya bahue juhua  
micuanara jadya adadiyaque.

<sup>24</sup> Jesús majuhuaaju emajuquetu Yusura  
chacha nityatsuranucahua. Emajuque tujatu  
nityatsuranucahua, Jesús emaju eje bucha  
jarasiritaquima tibu.

<sup>25</sup> Berutu ecuari Davidra huenecuare Jesús  
jadya ayaque:

“Ique bahue Ique Cuatsashaquique dutya huecaca eatsehueque.

Jacanime ama tuja ique.

Tuque eatsehue tibu, bajida ama juya.

<sup>26</sup> Jutaquijudya ique dyaque pureama juya.

Pureama tsehue tuque ajacaya ama quisarati Yusu jidaque.

Arepa ique majuya ama bucha, pana ejenedya tuque aya, dutya eje bucha judadiyaquetu ecue jida ishuque.

<sup>27</sup> Pana ejenedya tuque aya, Ique Cuatsashaquira ique emajusiri ama huanabuqueque.

Tuhuadya jutidya tura riri ishu huanasiribuque ama, ique tujaque, tuque merequique jadya juya tibu.

<sup>28</sup> Eratu Yusu aya:

‘Mira ique bahue amerehua maju baecua ani ishu.

Mira ique dyaque jida pureama amerehua, miatsehue ique anidirubuque tibu, Yusu’ ”,

jadyatu Davidra béru huenecuare.

<sup>29</sup> “Ecue ata cuana, pana cueja micuana aya Davidra huenecuareque. Tuta taca jadya catiyaque amatu jadya jucuaré, ‘Huanasiribuque ama tura ique ecue ecuita riri ishu’ jadya huenetsu. Béru amena mara maratu ecuanaja ebaba David majucuaréque. Majuhuajutu tuja ecuita ishatanacuare tumu caniju. Tuhuadya tujatu ecuita riricuare. Riya camatu narutanaya jaridya tuja uhuacuare tuque ishatanacuareque.

<sup>30</sup> Chacha aniya jari tuputu Yusuja quisarati cueja juhua. ‘Peadya mique eque ejuracanaquetu Mesías jubuque, Ecue Emepeque. Mira israelita cuana naruya bucha, jadya naruedya tujatu ecue

cuanaque abuque. Yuneridya mique jadya aya, era jadya adadiyaque' jadya patu Yusura acuare.

<sup>31</sup> Jadya equetu David icueneta bahue jucuare Yusura Mesías cuadishadadiyaque. Tuquetu bahuedya jucuare Yusura Mesías emajuque nityatsuranucabuqueque. Jadya tibudyatu jucuare: 'Emajuque caniju eishaquetu jarasiribuque ama, ni tuja ecuita riribuque ama' jadya.

<sup>32</sup> Yusuradyatu Jesús majuhuaque chacha nityatsuranucachine. Ecuannaratu bachine Jesús tuque netitsuranucahuaju. Iyacu micuana ecuanara yuneridya cuejaya tuque chachaque.

<sup>33</sup> Yusuratu barepaju dujunucagua tuja yacuaju. Iyacuatu tuque muita ishujú Etataqueja jida equé amaca. Yusu patu jucuare: 'Jesusratu ecue Espíritu cuadishaya tuaqueja catyatihua cuana queja' jadya. Riyaque Yusuja Espíritu equedya ecuana iyacua quisaratiya. Micuanara petayaque, bacayaque jadyatu tura jadya amereyaque.

<sup>34</sup> Davidja ecuita barepaju tsurama jarijudya. Jadya ama buchatu Davidra quisarati anucacuare béru:

“Yusuratu Ique Cuatsashaquique jadya cuejacuare:

'Anibutecue ecue jida equé amaca muita ishú,

<sup>35</sup> era mique ujeu baqui cuanaque dutya ijahue atillaya tupu, Ique Cuatsashaquique' ”.

Jesús jadya ayaque tujatu jadya quisarati acuare.

<sup>36</sup> “Nebacacue jari ique, dutya micuana Israel equé ejuracana cuanara. Jesús, micuanara curusuju tatamerechinequetu Yusura

Mesías amerecuare. Tumbaedyatu Ecuana Cuatsashaquique amerehua, —jadyatu Pedrora cuejacuare tuhua jucuare cuanaque.

<sup>37</sup> Jadya juya bacatsu tuna dyaque peya inime jucuare, jidama juhuaque caadebatitsu.

—Ecuanaja ata cuana, ¿eje bucha ecuana jutaqui? —jadya tunajatu bacaduracuare Pedro, Jesúsja ecuadisha cuanaque peya cuana jadya.

<sup>38</sup> Tume tuna Pedrora quemitsacuare:

—Jesús queja catyatitsu necacuareticue inime, Yusuja biji eque ani ishu. Necutsamereticue Jesucristoja ebacaniju. Jadya nejudue Yusura micuanaja jucha cuana apupasha ishu. Turatu cuadishaya tuja Espíritu micuana tsehue anisiri ishu, micuana tsahua ishu.

<sup>39</sup> Yusratu tuja Espíritu cuadisha ana ahua micuana queja, micuana eque ejuracana cuana queja, riyaque yahuaju dutya queja aniya cuana queja jadya. Jadya eque tujatu cuadishahua dutya tura tuaqueja ihuaraya cuanaja ishu, —jadya tuna Pedrora acuare.

<sup>40</sup> Nereda bucha cuejae tujatu ecana acuare yana muida tsehue:

—Dutya jujeri iyacua aniya cuanaque tuna jidamaque inime cadujutiya. Tuna tuna Yusu queja judirunime ama. Necacuareticue inime tuna nerecaturatadadiya bucha nerecaturatae ejuda-di tibu, —jadya tuna Pedrora acuare.

<sup>41</sup> Pedrora cuejayaque bacatsu tuna jetiama inime cacuareticuare. Quimisha mil tuna inime cacuaretitsu Jesús queja catyaticuare. Cutsamereticuare ecana Jesúsja cuanaque jadya cabamereti ishu.

<sup>42</sup> Jesúsja ecuadisha cuanara bahuityayaque pana baca aatsu tunajatu ejenejacacuare ama. Tunaja aniya cuanaque ecana dutya tupu catyatie jubarecuare. Casitatinicuare ecana Yusu tsehue quisarati ishu. Ecuana Cuatsashaquique adeba ishu araara ishu tuna yuhua cama casitati bahue jucuare.

*Jesús queja ecatyati cuanaque eje bucha anie jucuaque*

<sup>43</sup> Yusuja casa tshuetu Jesúsja ecuadisha cuanara ejeque ecuitaja ataquique ama acuare. Jadya baatsutu Jesús queja catyatima cuanaque dyaque anajacatacuare.

<sup>44</sup> Jesús queja ecatyati cuanaque tuna yuhua cama nimee ecadutyati jucuare. Caradatijacama tuna junenicuare. Aiqui cuanaratu tyacuare tunaja ai aniyaque aima cuanaque.

<sup>45</sup> Catyati ecana caticuare tunaja aniya cuanaque. Tunaja ai cuana catyati aatsu tunajatu chipiru tsumecuare peya cuanara ai sareya cuanaque quemis ishu.

<sup>46</sup> Dutya huecaca ecana caradatinicuare Yusuja etareju. Tunaja etare cuanaju tuna caradatijacama junenicuare araara ishu, Jesús majuhuaque adeba ishu. Pureama epuri jadya tsehue tuna araranicuare. Jida tuna cabatibarecuare peya cuana tsehue.

<sup>47</sup> Yusu tunajatu pureamaturajacacuare ama. “Dyaque jida taa mique ecuana tsehue”, jadya tunajatu ajacacuare ama. Dutya jujeri Jerusalénju cuanara tuna jida, iyuhueda jadya bacuare. Huecacaju huecacajutu Yusura peya cuana Jesús

queja catyatishamereajecuaire. Tume cuanaque Jesús queja catyatihuaju tuna Yusura Ijahua quejaque inajacamerecuare. Jadya eque tuna Jesús queja nimeedya jutidya juajecuaire. Tuque pureama aishu ecana casitatijacacuare ama.

### 3

*Ecuita yuequedya ruduruduque chacha jucuaireque*

<sup>1</sup> Pedro, Juan jadya tatse cuacuare Yusuja etareju las tres chinequeja, israelita cuana Yusu tsehue quisarati bahue uraju.

<sup>2</sup> Tuhuatu ecuita yuequedya rudurudu ecuinanaque juanicuaire. Dutya huecaca tunajatu iyati bahue jucuaire Yusuja etare tsecue. Tumeque etsecuetu “Etsecue Jida Pijique” bacani jucuaire. Iya bahue tunajatu etsecuetsau junenicuaire, chipiru cuana piji ecuita cuana etareju nubiya cuanaque bacatsa bacatsa aishu.

<sup>3</sup> Tumeque huecaca tujatu batsacuare Pedro, Juan jadya Yusuja etareju nubinativaju. Batsatsu tujatu ecats chipiru bacatsacuare.

<sup>4</sup> Pedro, Juan ecatserratu petacuare.

—Petacue yatse, —jadyatu Pedrora acuare.

<sup>5</sup> Rudurudura tatse petahuaquedya peta acuare, tatsera chipiru tyaya bucha cabatitsu.

<sup>6</sup> Pedroratu isaranucacuare:

—Aijama tuque ecue chipiru. Aijama tuque ecue oro ni plata. Jadya ama bucha mique tsahuaya. Jesucristo Nazaretjuja ebacaniju mique cuatsashaya: “Netitsuracue. Ajecue”, —jadya tujatu ruduruduque acuare.



<sup>7</sup> Jadya aatsutu Pedrora emetucu jida eque amaca inaticuare nityatsura ishu. Muya jutidya tujatu cacasaticuare ehuchi, ehuchi tsuru ecitse jadya.

<sup>8</sup> Tudyatu ecuita netitsurayaque putitanaque-nacuare pureama tsehue. Amena ajetibunetsutu nubidirucuare Yusuja etareju Pedro, Juan ecitse tsehue. Tudyatu putitana putitana jadya junenicuare pureama juatsu.

—¡Dyaque casada, jida jadya taa mi eatsehue, Yusu! —jadyatu jucuare.

<sup>9</sup> Dutya tuhua jucuare cuanaratu bacuare juneniyaju. Bacuare tunajatu Yusu pureama au juyaju.

<sup>10</sup> Tuna camadya jutidya tuna quisaratibarecuare, bape baatsu.

—Adebaya tuque ecuana tumeque rududuruque “Etsecue Jida Pijique” bacaniju anibijida juchineque, cuetiya cuanaque chipiru bacaqui juchineque. ¿Eje bucha ajee jatsutu ejuu? —jadya tuna jucuare.

Juneniya baatsu tunajatu eje bucha adebataqui ama bacuare.

*Pedrora ecuita jetiama ecasitatique isaracuareque*

<sup>11</sup> Chacha juhuaratu jacacarama acuar Pedro, Juan jadya. Quimishadya tuna Yusuja etare ehueji quinida emaque jucuare, “Salomón Adeb Ishuque” bacaniju. Pana anajacata ejuquetu dutya tuhua jucuare cuanaque tuna queja tsajaja jucuare.

<sup>12</sup> Tuna jadya umada cuita caradatiya baatsutu Pedro tuna tsehue quisaraticuare:

—Pana baca neacue, ecue ata cuana Israel eque ejuracana cuanaque. ¿Eje bucha juatsu jatsu micuana dyaque anajacataya riyaque baatsu? ¿Eje bucha juatsu jatsu micuanara yatse petaya? ¿Tupuya tuque micuana inime yatsera yatseja casa tsehue cuana chachanehua bucha? A, aijama. Yatseja casa eque ama tuque yatse riyaque chachanehua. Tuquetu chachanetanahua, yatse jida juatsu ama.

<sup>13</sup> Jesusja casa tsehuetu chacha juhua. Ecuanaja Etata Yusuratu Ebacuaque Jesusja casa tsehue chacha amerehua, Jesus emui juishu. Riyaque Yusudya tu ecuanaja baba cuana Abraham, Isaac, Jacob ecanara muicuaque. Arepa Jesus Yusu Merequique juhua ama bucha tuque micuana huaraji cuana queja inamerechine, tuque iye-mere ishu. Pilatoratu Jesus inamerejacacara achine. Jadya ama buchatu micuanara “Curusuju pamaju” jadya achine.

<sup>14</sup> Jesússtu dyaque jidaque jucuaque, cajuchatima nerique, tuyu nerique. Jadya ama bucha tuque micuana Pilato queja inajacamerecarama achine. Micuanaratu quiyeti puji inajacamerechine, Jesús einajacamereuque.

<sup>15</sup> Micuanaratu iyemerechine Ecuana Inajacamerequique. Jadya ama buchatu Yusura emajuque nityatsuranucachine. Ecuonaratu pana ejenedya aya Jesús chachaque, emajuque enetitsuraque, ecuanaradya bachine tibu.

<sup>16</sup> Jesúsja casa tsehuetu riyaque rudurudu juhuaque chachanetanahua. Bayadya tuque

micuana jida juneniyaju. Micuanaratu adebayadya. Yatseratu pana ejenedya ahua tura echachaneuque. Micuanaja yatucajudyatu Jesusra pana chacha amerehua, yatsera tura eauque pana ejene aya baatsu.

17 “Ecue ata cuana, micuanara micuanaja huaraji cuana tsehue Jesús iyeya patya tuque micuana adebachine ama micuana eje bucha juyaque. Eratu adebayadya micuanara tuque Mesiasque adebayaque ama.

18 Icuene tuque equeque quisarati cueja puji cuana eque patu Yusura cuejacuare Mesías canerecatidadiyaque, majudadiaque jadya. Achinedya tujatu tura amerecara ahua bae cuitadya, tura inime pirehua bae.

19 Iyacua necacualeticue micuanaja inime cuana. Necajuchatijacacue. Nejuetinuacacue Yusu queja, tura micuanaja jucha cuana apupasha ishu.

20 Micuana ni jadya juya, tume micuana Yusura inime tsapema amereya. Pureama tura micuana amereya, ijicaraque ena ijitsu ejuu bucha. Ejeque huecaca tujatu cuadishanucabuque Jesus riyaque yahuaju. Yuequedyadyatu tuque mepetanahua micuana inajacamere ishu.

21 Iyacuatu Jesus barepaju Etataque Yusuja yacuaju netiya. Berutu Yusu tuque equeque quisarati cuejaqui cuana eque jucuar: ‘Ejeque huecaca tuque dutya iyacuanebuque’. Tura jadya aishuque huecaca juetihuaaju tujatu Jesús cuadishanucabuque.

22 Moisésra quisarati acuare baetu judadibuque:

“Ecuana Cuatsashaquiuetu Yusura micuana queja cuadishabuque, micuanaja atadya.

Tura micuana Yusuja quisarati cuejadadibuque.

Ique tuja quisarati cueja ishuhua bucha, jadidya tujatu cuadishabuque tumeque.

Dutya tura cuatsashaya eque jajudadidya neju-cue.

<sup>23</sup>Yusuratu bijidamadurabuque dutya tumera cuatsashaya eque jucarama juya cuanaque.

Yusu jaque ama tuna judadibuque”, jadyatu Moisés jucuaru beru Jesús junama jariju.

<sup>24</sup>“Yusu equeque quisarati cuejaqui cuanaratu cuejacuaru Mesías junahuaju eje bucha judadibuqueque. Jadyatu Samuel jucuaru, tumebaedya dutya peya cuana.

<sup>25</sup>Micuana micuana tume Yusu equeque quisarati cuejaqui cuanaque eque ejuracana cuanaque. Yusuratu quisarati iyacuare ecuanaja baba cuana tsehue tura ecana jidaque tyadadibuqueque. Tuna camadya ama tujatu ecana jidaque tyaana acuaru, ecuana tumebaedya. Neadebacue Abraham béru tyatana ana atacuaruque. ‘Peadya mique eque juracanadadiya eque dyaque jida jubuque yahuaju dutya queja aniya cuana tsehue’ jadyatu Yusura Abraham acuaru béru.

<sup>26</sup>Jadya juatsutu Yusura tuja Ebacuaque Jesús cuadishacuaru riyaque yahuaju. Cuadishacuaru tujatu ecuana israelita cuana jida amere ishuhua. Cuadishacuaru tujatu ecuana inime cacuaretisha ishuhua, ecuana jidamaque amerejaca ishuhua, —jadyatu Pedroru tuhua jucuaru cuanaque acuaru.

## 4

### *Pedro, Juan jadya huaraji cuana queja duju-tanacuareque*

<sup>1</sup> Pedro, Juan jadyara ecuita cuana isaraya jar-ijutu juticuare pae cuana. Tumbaedyatu juticuare Yusuja etare naruqui cuanaja huaraji, tumbaedyada saduceo cuana.

<sup>2</sup> Tuna tuna dyaque ecahuaiti jucuar Pedro, Juan ecatsé tsehue, tatsera jadya quisarati ahua tibu: “Yuneridyatu Yusura emaju cuanaque chacha nityatsuranucabuque, tura Jesús emajuque chacha nityatsuranucachine tibu”. Jadya bacatsu tuna dyaque cahuaicuare tatsé tsehue.

<sup>3</sup> Inameretsu tunajatu ecatsé risimerecuare. Risimeretsu tunajatu ishamereticuare etare apudaju peadya meta tupu, amena chinehua tibu.

<sup>4</sup> Arepa Pedro, Juan ecatsé etare apudaju eishatana ama bucha, umada tatsé quisaratiyaju bacaqui cuanaque tuna Jesús queja catyaticuare. Pishica mil ecuita tuna tuaqueja catyaticuare, epuna, ebacua jadya piyabamaque.

<sup>5</sup> Huecacapetu huaraji cuana Jerusalénju cuanaque casitaticuare etare inime cuana bajeje ishujú. Casitaticuare tuna israelita cuanaja huaraji cuana, emuiba cuanaque, cacuatsashati bahuityaqui cuanaque jadya.

<sup>6</sup> Anástu tuhua jucuar. Tumequetu pae dyaque muidaque jucuar. Caifás, Juan, Alejandro jadya tuna tuhua jucuar, tumbaedyada pae dyaque muidaja ata cuana.

<sup>7</sup> Cuadishacuare tunajatu sudaru cuana:

—Nequeticue Pedro, Juan ecatsé etare apuda juque.

Tunaja yacuaju nityatsu,

—¿Aira metse tyachine casa rudurudu juhuaque chachane ishu? ¿Aija casa tsehue tuque metse aya tume cuanaque? —jadya tunajatu ecatsé bacaduracuare.

<sup>8</sup> Tumetu Pedro huaraji cuana tsehue quisaraticuare. Bajida tsehue ama tujatu ecana quemitsacuare, Yusuja Espiritura casa tyaya tibu:

—Isaraya micuana era, micuana epu juque huaraji cuana, tumbaedyá emuiba cuanaque.

<sup>9</sup> Micuanara yatse bacaduraya eje bucha tsahuae yatsera yuequedyá rudurudu cuinanahuaque achineque. Eje bucha chachanee yatsera achineque micuanara yatse bacaduraya.

<sup>10</sup> Yuneridya ni micuana bahue jucara juya, era micuana cuejaya, dutya israelita cuana bahue ishu. Riyaque ecuita iyacua cuita micuanaja yacua juqueri Jesúsja casa tsehue chacha ju-chine, Nazaretju anicuareja casa eque. Tumeque Jesúsdyá tuque micuana curusuju tatameretsu iyechine. Jadya ama buchatu Yusura emajuque chacha nityatsuranucachine.

<sup>11</sup> Micuanaratu bijidamadurachine. Etare puji cuanaja tumu eijehueque, dyaque saretanayaque judadihua bucha, jadidyatu micuanara bijidamadurahuaque dyaque inime metseque judadihua.

<sup>12</sup> Jesús peadya tu Einajacamerequique. Aijamatu peya jucha cuana tillaquique. Yusratu iyahua tuque peadya camadya ecuana Ijahua

quejaque inajacamere ishu. Eje bucha inajacameree ni ecuana peyara ama, —jadya tuna Pedrora acuare.

<sup>13</sup> Bajida tsehue amatu Pedro, Juan ecatsera israelita cuanaja huaraji cuana jadya isaracuare. Tatsera cuejayaju tuna anajacatacuare.

—¿Eje bucha juatsu tatsera ecuana bajida tsehue ama isaraya? Tatse taa tatse dyaque jida ebahuityaque ama. Inime metseque ama taa tatse. Jadya ama bucha ecatsé dyaque iyuca jararadaque equisaratiu bucha quisaratie juya. ¿Jadidya tatse ejuu, Jesús tsehue tsunuda junenihua tibu? —jadya tuna tuna cama jucuaré.

<sup>14</sup> Ecuíta chachanetanahuaquetu tuhuadya junicuare. Eje bucha, “Tumeque ecuita tu chacha ama”, jadya ataqui ama tuna jucuaré, tuque Pedro, Juan ecatsé tsehuedya neticuare tibu.

<sup>15</sup> Tume tunajatu cuinanashacuare tunaja yacua juque Pedro, Juan, echachaneque jadya. Tuna cuinanahuaju tuna cacuejaticuare:

<sup>16</sup> —¿Eje bucha rique ecuana riyaque ecuita ecatsé eau? “Tumeque ecuitatu chacha ama” jadya ni ecuana ejuu, ecuita cuanatu etsau ecuana tsehue. Dutya jujeri Jerusalénju cuanaque tuna bahue tatsera ejeque ecuitaja ataquique ama achineque, yuneridya tumeque ecuita chacha juchineque. Tehuataqui ama tuque ecuanaja.

<sup>17</sup> Dyaquedya jutidya tatsejatu Jesusja casa cuejaajeya. ¿Eje bucha cuejamerejacaé jatsu tuque ecuana ecatsé eau? Neihuaramerenucara ecatsé; rehua ecatsé pajenuca. Jidama aana ecatsé neara. “Necuejajacacué Jesusja quisarati. Ecuánara

metse dyaque nerecaturaya, metsera Jesusja quisarati cuejajacayaque ama juatsu”, jadya ecatse neara, —jadya tuna cacuejaticuare.

<sup>18</sup> Tume tunajatu ihuaratsu ecatse jadya acuare:

—Necuejanucaume ni ejeque buchique Jesusja quisarati. Nebahuityanucaume ni ejeque buchique, —jadya tunajatu acuare Pedro, Juan jadya.

<sup>19</sup> Tatsera tuna acuare:

—Yusura cuitadya yatse cuadishahua Jesusja quisarati cueja ishu. Icuenetu Yusura cuatsashaya eque jutaqui, micuanara cuatsashaya eque ama.

<sup>20</sup> Yatsera cuitadyatu bahua tuque eje bucha juyaque. Yatsera cuitadyatu yatseja ijaca tsehue bacahua tura bahuityayaque. Jadya tibu tuque yatse cuejajacanime ama tuja quisarati, —jadya tuna Pedrora acuare.

<sup>21</sup> Tume tatse huaraji cuanara jidama aana acuare. Nereda tunajatu ecatse acuare. Jadya aana aatsu tunajatu ecatse inajacamerecuare. Ecuita cuanatu jucuar:

—¡Dyaque jida, casada jadya taa Yusu, rudu-ruduque chachanehua tibu!

Tumetu huaraji cuanara nerecaturacuare ama Pedro, Juan jadya. “Ecuana ni ecatse enerecaturau, ecuita cuanatu dyaque ecahuitiu ecuana tsehue”, jadya tunajatu inime jucuar.

<sup>22</sup> Ecuita Yusuja casa tsehue chachanetanahujatu anicuar pushi tunca mara bare.

*“Casaturacue ecuana mique mere ishu”, jadya Jesús queja ecatyati cuanara Yusu bacacuareque*



<sup>23</sup> Tunara inajacahuajutu Pedro, Juan jadya cuacuare Jesús queja ecatyati cuana queja. Tuhua junatitsu tatsejatu ecana cuejanaticuare dutya tatse eje bucha atanachineque. Cacuejaticuare ecitse pae cuanaja huaraji cuanara, emuiba cuanara jadya ahuaque.

<sup>24</sup> Jadya bacatsu tuna dutya quisaraticuare Yusu tsehue:

—Ecuana Cuatsashaquique, miquemi Yusu. Miquemi Dutya Iyaquique. Miratu iyacuare barepa, yahua, cueri cuana jadya. Dutya aniyaque tu mira iyahuaque.

<sup>25</sup> Micue Espíritu eque tuquemi micue mere puji David queja huenemerecuare:

“¿Eje bucha juatsutu israelita ama cuanaque dyaque ecahuaiti?

¿Eje bucha juatsutu ecuita cuanara inime tupuqui aya aishu jidaque ama?

<sup>26</sup> Ecuari cuana tuna casitatiya epu juque huaraji cuana tsehue.

Dutyara tupu inime tuputsu Ecuana Cuatsashaquique jidama aishu.

Bajejeya tuna inime Mesías Yusuja Emepeque ijahue ijahue aishu”,

jadyatu Davidra huenecuare beru.

<sup>27</sup> “Tumebae cuitadyatu judadichine, Tata. Huaraji cuanatu casitatichine riyaque epu ebari juque. Herodes, Poncio Pilato jadya tatse israelita cuana tsehue, israelita ama cuana tsehue jadya casitatichine, micue Bacua Jesús jidama ijahue ijahue aishu. Arepa tuque juchama neri juhua ama bucha, arepa tuque mique merequi

juhua ama bucha, taa ecana casitatichine micue Emepeque Mesías ujeu baatsu.

<sup>28</sup> Dutya tuna eje bucha juchinequetu mira icueneta iya inime achine equedya judadichine.

<sup>29</sup> Tata, miquemi bahuedya huaraji cuana ecuana tsehue dyaque cahuitiyaque. Nerecaturacara tunara ecuana aya. Ecuana ecuana mique merequi cuanaque. Tsahuacue ecuana micue quisarati bajida tsehue ama cuejajaca ishuhua.

<sup>30</sup> Casaturacue ecuana micue casa tsehue ujedaja cuanaque chachane ishuhua. Tyacue ecuana micue casa ejeque ecuitaja ataquimaque aishuhua, ecuita cuanaja mique ecuana tsehueque adeba ishuhua. Amerecue ecuana Mique Merequi juchama nerija casa equa, —jadya tunajatu Yusu acuare.

<sup>31</sup> Tuna Yusu tsehue quisaratijacahuaju tuna ecaradati jarijutu Yusuja casara etare bucucushacuare, Yusuja Espíritu tuna queja buteyaju. Tuna peadya peadya quejatu junacuare. Tura tuna casaturacuare Jesusja quisarati bajida tsehue ama cuejajaca ishuhua.

*Jesús queja ecatyati cuanaque peya cuana tsehue jida yurameta cabati, catsahuati jadya jucuaque*

<sup>32</sup> Jesús queja ecatyati cuanaque tuna dutya jida dutya tupu cabatie jucuaque. Arepa jetima jucuaque ama bucha peadya camadya inime tupu bucha ai acaraque jadya tuna jucuaque. Inijeda ama tuna jucuaque. Yurameta catyatie tuna jucuaque tunaja ai aniyaque peya cuana tsehue.

<sup>33</sup> “Ecuana Cuatsashaquiquetu chacha netit-surancachine. Ecuancaryatu bachine Jesús emajuque chacha enetitsuranucaque”. Riyaque quisaratitu Jesúsja ecuadisha cuanara cuejajacacuare ama. Yusura tuna dyaque casa tyacuare tuque mere ishu. Tuquetu dyaque jida jujacacuare ama Jesús queja dutya ecatyati cuana tsehue.

<sup>34</sup> Ni ejejadya jutidya tunajatu ai aijama jucuaré ama. Yahua, jadya ama juatsu etare tuna catyati caticuare. Tume cuanaque catyati aatsu chipiru inatsu tunajatu Jesúsja ecuadisha cuana queja duju bahue jucuaré.

<sup>35</sup> Jesúsja ecuadisha cuanajatu tumeque chipiru nrecada cuanaque tyabahue jucuaré. Tunara sareya tupu tunajatu jaquetsu tyabahue jucuaré.

<sup>36</sup> José bacani ecuitatu nrecada cuanaque tsahuaquique jucuaré. Chipreju ecuinanaquetu jucuaré. Leví eque ejuracanaquetu jucuaré. Jesúsja ecuadisha cuanaratu bape bacaniédya acuaré “Bernabé” bacani, “Ecasaturaquique” jadique.

<sup>37</sup> Tujatu anicuare yahua. Catyati tujatu acuaré. Catyati aatsu tujatu dujucuaré chipiru, ecuadisha cuanaja peya cuana tyabare ishu.

## 5

*Ananías, Safira jadyara Yusu ijahue acara datse acuaréque*

<sup>1</sup> Anicuaretu Jesús queja ecatyatique, Ananías bacani. Yusu tujatu ijahue acara datse acuaré. Tuja ehuanéquetu Safira bacani jucuaré. Uhua tatse catyati caticuare.

<sup>2</sup> Chipiru inatsu tujatu ehuanegue acuare:

—Uhua catyati aatsu chipiru inahuaque umae yatseja ishü nejaque. Ecuadisha cuanaque chipiru tyatiyaque, “Dutya etsujequi inachineque rique beya” jadya paati, —jadyapa tujatu ehuanegue acuare.

Safiratu en cuita jucuaire.

Tume tujatu chipiru tyatiyaque acuare Pedro:

—Dutya etsujequi inachineque rique beya, —jadya tujatu acuare pusha pusha.

<sup>3</sup> Tumetu Pedrora yana casada tsehue atsacuare:

—¿Eje bucha juatsumi Satanásja biji eque juya, Ananías? ¿Eje bucha juatsu tuquemi Yusuja Espíritu ijahue acara aya? “Dutya etsujequi inachineque rique beya”, jadyami junaya, arepa metseja ishü ejaque iyasicuahua ama bucha.

<sup>4</sup> Ni aira buchiquemi casada tsehue micue chipiru bemereya ama. Icuenetu micuiquedya juhua yahua mira eje bucha amerecara aya eque aishu. Tuequedya etsujequi micuequedya juhua. Mique pusha pusha juhuaque tu amena jidama. ¿Eje bucha juatsu mira ecuana ijahue acara aya? Ecuana camadya ama mira ecuana pusha pusha aya, Yusu tumbaedyä, —jadyatu Pedrora acuare.

<sup>5</sup> Jadya yana ayaju bacatsutu Ananías rihuicuare. Rihuitsutu majucuaire. Dutya tuna Ananías eje bucha majue juhuaque bahue juatsu dyaque bajida jucuaire.

<sup>6</sup> Masadamatu juticuare umae ehue ebari cuana. Junatitsu tunajatu pirurinaticuare emajuque. Piruri amena jadya aatsu tunajatu dujucuaire caniju ishü ishü.

<sup>7</sup> Quimisha ura juatsutu juticuare emajuja ehuanegue juhuaque. Tuquetu baecua jari jucuare yahuique majuhuaque.

<sup>8</sup> Pedroratu bacaduratsacuare:

—Beru beru pijitu Ananías junahua metse uhua catyati catitsu chipiru inachineque tyara. ¿Tura chipiru behuaquetu dutya metsera inachinequedya?

—Jejee. Tura mique tyanahuaquetu dutya yatsera chipiru inachinequedya juhua, —jadya tujatu pusha pusha quemitsacuare.

<sup>9</sup> —¿Eje bucha juatsu tuque metseja jadya inime juchine? ¿Eje bucha juatsu tuque metse Yusuja Espíritu ijahue acara aya? Petacue, micue ahue majuhuaque papara cuahua cuanaque juetibareyaju. Mique tunarami papatinucayadya, —jadya tujatu acuaire.

<sup>10</sup> Muya jutidyatu rihuicuare epuna majunuca ishü Pedroja yacuaju. Tudyatu nubidirucuaire ehue ebari cuana. Nubidirutsu tuna badirucuaire epuna emajuque. Tume tunajatu epuna emajuque dujunucacuare caniju ishü ishü, yahuique eisha jiruru cuita nucadya.

<sup>11</sup> Jesús queja dutya ecatyati cuanaque, tumbaedyä peya cuana peya queja epu ebariju cuanaque jadya tuna bahue jucuare Ananías, Safira eje bucha juhuaque. Bahue juatsu tuna dyaque bajida jucuare, tuna dyadi Yusura tumbaedyä eaju.

*Jesúsja ecuadisha cuanara Yusuja casa bamerecuareque*

<sup>12</sup> Ecuadisha cuanaratu Yusuja casa tsehue Jerusalénju acuaire jetiama ni ejeque ecuitaja

ataquique ama. Inime tillaqui tunajatu acuare tunara tunaja yacuaju ayaque baatsu. Dutya tuna Jesús queja ecatyati cuanaque casitati bahue ju-  
cuare Yusuja etare ehueji quinida emaque “Sa-  
lomón Adeba Ishuque” bacaniju.

<sup>13-14</sup> Umanaajecualedya jutidyatu Jesús queja ecatyati cuanaque. Ecuiteda, epuna jadya tuna tuaqueja catyaticuare. Jadya juyaque tuna peya cuana tsehue casitatinicuare. Dutya jujeri Jerusalénju cuanaratu jida quisarati acuare Jesús queja ecatyati cuanaja ishu, arepa tuna tuaqueja nimee ama cuana tsehue casitati ishu bajida jucuaire ama bucha.

<sup>15</sup> Jesúsja ecuadisha cuanaratu chachanecuare ujejeda cuanaque Yusuja casa tsehue. Pedro cuetiyaque bahue juatsutu ecuita cuanara tunaja ata ujejeda cuanaque epu patya ediji cuanaju cuinanshabarecuare. Tuhua tuna ujejeda cuanaque huesa ishu cuanaju jarabarecuare. Tuque cuetiyaju tuja aputa tuna dyaque eque cuetitsutu ujejeda cuanaque chacha jubarecuare.

<sup>16</sup> Jerusalemjutu ecuita cuana juna bahue jucuaire japadama epu cuana juque. Bebarecuare tuna ujejeda cuanaque Pedro queja. Tumbaedyada tuna becuare jahua cuanara quijahuatishaya cuanaque. Dutya tujatu ecana chacha amerecuare Yusuja casa tsehue.

*Jesúsja ecuadisha cuanaque jidama ujedada ujedada atacuaireque*

<sup>17</sup> Pae dyaque muidaque, saduceo cuana jadya tuna dyaque cahuaicuaire, ecuita cuanara

tunara cuejayaque ebacauque, Ecuadisha cuanaque jutidya tunara ijacabacaya baatsu.

18 Jesúsja ecuadisha cuanaque tuna inamerecuare. Etare apudaju tuna ishamerecuare, yuneri jidama ecajuchati cuana tsehue.

19 Metatu junacuare Yusu tsahuaquique barepa juque etare apudaju. Junatsu tujatu pacashacuare etsecue ebari. Etare apudaju etsecue pacashatsu tujatu ecana cuinanashacuare.

20 —Nedirucue. Apudajudya necuacue Yusuja etareju. Tuhua necuejacue quisarati ecuita cuana Yusu queja eje bucha judirue juishuque, —jadya tujatu Pedro ecana acuare.

21 Jadya bacatsu, peya huecaca apudajudya cuita tuna cuacuare Yusuja etareju. Junatitsu tuna nubicuare. Nubitsu tuna catibuticuare Yusu queja judiru ishuque quisarati cueja. Pae dyaque muidara, tuatsehue cuanara jadya tunajatu dutya israelita emuiba cuanaque ihuaramerecuare. Dutya inime bajejequi cuanaque tunajatu ihuaramerecuare. Tume cuanaratu acuare sudaru cuana:

—Nequeticue ecana. Paje ecuanaja yacuaju Jesúsja quisarati cuejaqui cuanaque etare apudaju eisha cuanaque.

22 Jadya ahujutu sudaru cuana etare apudaju cuacuare. Tuhua junatitsu tunajatu ecana banaticuare ama. Datse batitsu tuna pae dyaque muida queja dirunucacuare.

23 —Jesúsja quisarati cuejaqui cuanaquetu ajama etare apudaju. Junatitsu tuque ecuana

eteriqui eyahue banatihua. Sudaru cuana tumidya eteriqui peque netiya narunaruya cuanaque. Pacashatsu ecuana nubihua. Datse ecuana ecana pana sare ahua. Dadihua ama ecuana ecana ni ejudya jutidya, —jadya tunajatu huaraji cuana cuejadirucua.

<sup>24</sup> Jadya bacatsutu dutya huaraji cuanara dyaque cuita inime tsapecuare. Pae dyaque muidaque, Yusuja etare naruqui cuanaja huaraji, pae cuanaja huaraji cuana dutya tuna eje bucha jutaqui ama cabaticua. Cabacaduratibarecuare tuna:

—¿Eje buchatu Jesúsja quisarati cuejaqui cuanaque juhua? ¿Eju tuna? —jadya tuna jubarecuare.

<sup>25</sup> Tuna jadya juyaju cuitatu peadya ecuita junaticua.

—Nebacacue. Ecuita cuana micuanara etare apudaju riabarepa ishamerechine cuanaque tuna Yusuja etareju. Jesúsja quisarati bahuitya tuna juya, —jadya tujatu huaraji cuana acua.

<sup>26</sup> Jadya bacatsutu Yusuja etare naruqui cuanaja huaraji cuacuare enaruqui cuana tsehue Jesúsja ecuadisha cuanaque jiteque. Inamerencacua retu ecana. Jadya ama bucha tunajatu ecana ujeda acua ama, ecuita cuanara tumu tsehue eiyeuque bajida juatsu. Tume tunajatu eje bucha tsehue ama dujucua huaraji cuana ecasatitaju.

<sup>27</sup> Jesúsja ecuadisha cuanaque tunaja yacuaju junatihua ju tuna pae dyaque muidara isaracua:

<sup>28</sup> —Ecuana micuana “Nebahuityajacua ecana Jesúsja quisarati” jadya achine. Jadya ama bucha micuanara ecuana bacaya ama.



Ecuejajacauque, micuana cuejaajeyadya jutidya. Dutya jujeri Jerusalénju cuanara amena bacachine riyaque quisarati. Ecuana rapa Jesús iyemerechine jadya aatsu micuanara ecuana jucha metse amerecara aya, —jadya tuna pae dyaque muidara acua.

<sup>29</sup> Tumetu Pedroro, peya cuana Jesúsja ecuaisha cuanara jadya acua:

—Ecuita cuanara cuatsashayaque, Yusura cuatsashayaque bucha ama tibu, jutaquiju ecuana Yusura cuatsashaya eque jutaqui, ecuita cuanara cuatsashaya eque ama.

<sup>30</sup> Micuanaratu Jesús curusuju tatamerechine. Jadya iyemeree tuque micuana amerechine. Yusura bacue nityatsuranucachine emajuque. Ecuana baba cuanara muicuareque Yusratu chacha nityatsuranucachine.

<sup>31</sup> Tumequetu Yusura iyacua iyahua huaraji dyaque inime metseque. Iyacua tu tuque emuitaju Yusuja jida eque amaca. Jesús tu Ecuana Cuatsashaquique. Tuque tu Ecuana Inajacamerequique. Jadyatu Yusura ahua, tura Israel eque ejuracana cuanaque inime cacuaretishacara aya tibu. Turatu israelita cuana Jesús queja catyatishamerecara aya, tunaja jucha cuana apupasha ishu.

<sup>32</sup> Ecuana radyatu dutya riyacua cuanaque pana adeba aya. Jadya tibudya micuana ecuanara jadya cuejaya. Yusradyatu tuja Espiritu cuita tura cuatsashaya eque juyacua queja amereya. Tumeque Espirituradya ecuana dutya riyacua cuana cuejamereya, —jadya tuna Pedroro acua.

<sup>33</sup> Huaraji cuanatu jadya bacatsu cahuaiticuare dyaque. Ecuadisha cuanaque tuna eje buchadya iyecara acuare.

<sup>34</sup> Tumetu peadya tuna ducuque netit-suracuare. Tuquetu Gamaliel bacani jucuare; inime cuana bajejequique tu jucuare. Tumequetu fariseo jucuare, israelita cuanaja cacuatsashati bahuityaquique. Dutyaja emuitu jucuare. Tuquetu tuatsehue huaraji cuana tsehue quisaraticuare:

—Ecue ata cuana, pacuinana yaratupu ecuanaja yacua juque riya Jesúsja quisarati cuejaqui cuanaque. Ecuana cama nequisaratira jari, —jadya tujatu ecana acuare.

Tume tunajatu quisarati cuejaqui cuanaque tuhuaque cuinanashacuare.

<sup>35</sup> Tuna cuinanahuajutu Gamaliel quisaratinu-cacuare:

—Israel juque huaraji cuana, nebacacue ique. Pana tupu inime neara inime tsapema riyaque ecuita cuana ecuanara eje bucha acara ayaque.

<sup>36</sup> Neadebara ecuita Teudas bacani eje bucha jucuareque. Quisaraticuaretu “Ique dyaque inime metseque. Nebacacue era cuejayaque camadya”. Jetiama tuna tuatsehue junenicuare, tura quisarati cuana ayaque baca juyaque. Pushi ciento tuna tuatsehue casitaticuare. Jadya ama buchatu masadama iyetacuare. Tuque majuhujutu dutya tuatsehue junenihua cuanaque tsapetanaterecuare. Judiruterecuare ecana tunaja etare cuanaju. Tura dutya acara ayaque aputaterecuare.

<sup>37</sup> Tuequedya peya aninucacuare Judas bacani. Tuquetu Galilea juque jucuare. Roma juque enaruqaira ecuita cuana piyebamereyaju turatu jetiama ecuita cuana tuatsehue junenishacuare tuja quisarati bacamereyaque. Tuequedya tumeque tumbaedy aiyetananucacuare. Tuque majuhuajutu dutya tuatsehue juneniya cuanaque tsapetanaterecuare.

<sup>38</sup> Jutaquijudya micuana jadya aya. Eje bucha neara ama tume cuanaque Jesúsja quisarati cuejaqui cuanaque. Neinajaradya ecana. Nenerecaturara ama ecana. Tunara eje bucha ayaque ni tunaja casa tsehuequedya jutidya, tumetu dutya tunara acara ayaque teredadiya.

<sup>39</sup> Yusuja casa tsehue ni tuna aya, eje bucha aputashae ni tuque ecuana ama. Yusu tsehue cuita di taa ecuana ecatiu ecuanara yuamaturacara ayaque juatsu. Muda tu Yusu tsehue catuputi ishu, —jadya tuna Gamalielra cuejacuare.

Dutyaja tupu tunajatu inime jucuare Gamalielra quisarati ahua eque.

<sup>40</sup> Ihuaramerenucacuare tunajatu ecuadisha cuanaque. Eiyemereuque, tunajatu ecana catsamerecuare jutidya. Catsacatsa amena aatsu tunajatu ecana acuare:

—Necuejanucaume ni ejeque buchique Jesúsja quisarati.

Jadya aatsu tunajatu ecana inajacamerecuare.

<sup>41</sup> Cuinanatsu tuna dyaque pureama jucuare.

—Yusutu ecuana tsehue dyaque jida juhua. Canerecatihua ecuana, ecuana Jesús queja nimee

juya tibu. Turatu adebahuadya ecuana canimehuallati nimeque ama, arepa ecuana canerecатиya ama bucha, —jadya tuna jucuare.

<sup>42</sup> Ecuadisha cuanaratu Jesúsja quisarati cueja-jacacuare ama. Bahuitya bahuityanicuare ecana Yusuja etareju, etare cuanaju jadya. Cuejajacacuare ama tuna Jesús Mesiasque.

## 6

*Jesús queja ecatyati cuanaque tsahua ishu mepetanacuareque*

<sup>1</sup> Tume patya tuna Jesús queja umada catyatia-jecuaredya jutidya. Griego eque quisaratiya cuanaquetu hebreo eque quisaratiya cuanaja ishu quisaratitibunecuare ai tyatayaju:

—Eahuemaju cuanaque dutya huecaca earaqui tyatanayajutu hebrea cuana dyaque umada tyatanaya, griega cuana bucha ama, —jadyatu griego eque quisaratiya cuanaque jucuare.

<sup>2</sup> Tumetu peadya tunca beta earacana Jesúsja ecuadisha cuanara ihuaracuare Jesús queja dutya ecatyati cuanaque. Tuna caradatihuaju tuna quisaraticuare:

—Ecuanaja mere tu Yusuja quisarati cueja. Tuyu ama tu ecuanaja riyaque mere ajaca ishu, earaqui ecuanaja cuita eahuemaju cuanaque jaquetsu tyabare ishu.

<sup>3</sup> Jutaquiju micuana ducuque pacarucu ecuita nemepecue earaqui jaquebare ishu. Nemepecue micuanara ejeque ijahue cati baecua baya cuanaque. Nemepecue Yusuja Espiritura cuatsashaya eque juya cuanaque, dyaque bahue cuanaque. Jadya cuanaque nemepecue.

Tumeque ecuita cuana netyara mere eahuemaju nerecada cuanaque earaqui tyabare ishu.

<sup>4</sup> Ecuana tumeque mere eauque, Yusu tsehue nequisaratijacara ama, tuja quisarati necuejajacara ama. Riyaque mere camadya ecuanara neara, –jadya tuna acuare peadya tunca beta earacana ecuadisha cuanara.

<sup>5</sup> Dutyaja tupudya tunajatu jadya inime jucuare. Icuene cuita tunajatu mepecuare Esteban. Tuquetu dyaque Jesús queja nimeeque jucuare. Yusuja Espirituja inime equetu anicuare. Tuequedya tuna mepecuare Felipe, Prócoro, Nicanor, Timón, Parmenas, Nicolás jadya. Nicolástu Antioquía juque jucuare. Israelita amatu jucuare. Jadya ama bucha tujatu Jesús queja catyatima jarira ejenecuare israelita cuanara ejeneya bucha.

<sup>6</sup> Riya cuanaque pacarucu mepetsu tunajatu dujucuare Jesúsja ecuadisha cuana queja. Quisaraticuare tuna Yusu tsehue mepehua cuanaja ishu. Ebi rirutsu tuna mepehua cuanaja iyuca dyaque emetucu iyabarecuare, Jesús queja ecatyati cuanaque tsahua ishu mepetanahuaque jadique.

<sup>7</sup> Jesúsja quisarati bacatsu tuna tuaqueja nimeedya jutidya jetiama juajecuare. Jetiama tuna Jerusalénju cuanaque tuaqueja catyaticuare, tumbaedya israelita cuanaja pae cuana. Jesús queja catyatitsu tuna casitatinicuare tuja cuana tsehue.

*Esteban risitanacuareque*

<sup>8</sup> Yusu tu dyaque jida jucuare Esteban tsehue. Tyacuaretu tuja casa ni ejeque ecuitaja ataquique ama aishu. Tumeque Yusuja casa tsehue tujatu acuare pusha amadya Yusu tuatsehueque bamere ishuhue.

<sup>9</sup> Umae israelita cuanaratu ujeu bacuare. Tume cuanaquetu casitati bahue jucuare “Tsuje ma Mere Ijehue ne Ishuhue Einajaca Cuanaja Caradati Ishuhue Etare” bacaniju. Caquemitsati caquemitsati tuna Esteban tsehue jucuare. Cirene cuana tsehue jupee Alejandría, Cilicia, Asia yahuaju cuana tsehue tuna tuatsehue cati cati jucuare.

<sup>10</sup> Anatsurutsataqui ama tunajatu bacuare Esteban dyaque bahue tibu. Jadyatu jucuare, Yusuja Espiritura huecashaya eque quisaratiya tibu.

<sup>11</sup> Esteban jucha metse acara aya tibu, tunajatu peya cuana acuare:

—“Bacahua tuque ecuana Esteban Moisésja ishuhue, Yusuja ishuhue jadya jidama quisaratiyaju”, jadya ni micuana juya, tsujetyaya micuana ecuanara, —jadya tunajatu ecana acuare.

<sup>12</sup> Jadyatu pusha pusha jucuare tumeque ecuita cuana Estebanja ishuhue. Jadya quisarati bacatsu tuna Esteban tsehue dyaque cahuaicuare. Emuiba cuanaque, cacuatsashati bahuityaqui cuanaque jadya tuna dyaque cahuaicuare tuatsehue. Tume tunajatu dutyara tabucuare. Tabutsu tunajatu inacuare. Inatsu tuna dujucuare israelita cuanaja huaraji cuana queja.

<sup>13</sup> Tuhadya tunajatu pusha pusha arida cuanaque dujucuare.

—Ecuñarari bacachine riyaque ecuita Yusuja ishü jidama quisarati ayaju. Yusuja etareja ishü tujatu jidama quisarati anucachine. Moisésja cacuatsashatija ishü tujatu jidama quisarati achine.

<sup>14</sup> Achine tujatu quisarati: “Jesús Nazaretju anicuarera patu Yusuja etare pana rihuishatilla eau” jadya. Tumbaedyapa “Jesúsra dutya cacuatsashati cuana Moisésra ecuana amerehuaque cuareya”. Jadyatu ecuanara cuitadya bacachine, —jadya tuna pusha pusha jucuaré.

<sup>15</sup> Jadya cuejayaju bacatsutu dutya huaraji cuana inime cuana bajejequi cuanara Esteban petacuare. Ebutsequini tujatu jucuaré Yusuja yacuaju netiyaja ebutsequini bucha, Yusu tsahuaquiya bucha. Jadyatu bacuaré dutya tuhua jucuaré cuanara.

## 7

*Esteban huaraji cuanaja yacuaju catachiticuareque*

<sup>1</sup> Tumetu pae dyaque muidara bacaduracuare Esteban:

—¿Yuneridya rena quisaratiya micue ishü?

<sup>2</sup> Estebanratu isaracuare dutya tuhua cuanaque:

—Tata ecana, nebacacue ique. Ecue ata cuana, nebacacue ique. Yusu Ecuanaja Etata tu dyaque casada. Tuquetu cabamereticuare ecuanaja ebaba Abraham queja, tuque Mesopotamiaju jucuaré patya, Haránju anidiruma jariju.

<sup>3</sup> “Cuinanacue micue yahua juque. Shanacue micue ata cuana. Dirucue era yahua

bamereyaju”, jadya patu Yusura Abraham acuare béru.

<sup>4</sup> Tumetu Abraham dirucuaire Caldea yahua juque. Anidirucuairetu Haránju. Eje uma mara juatsu tujatu etataque majucuaire tuhuadya. Tuque majuhuatu Yusura Abraham ihuaracuare riyaque yahuaaju ecuaa iyacua aniyaju.

<sup>5</sup> Arepa tuque rehua Canaánju anicuare ama bucha, metsenemerehua ama tujatu yahua ni riya piji buchique. Jadya ama bucha patu Yusura Abraham acuare: “Mique majuhuajutu dutya riyaque yahua jubuque mique eque juracanaya cuanaja ishu. Metsenebuque tunaja tuque”, jadyapa tujatu acuare, Abrahamja ni peadya ebacua aijama jariju.

<sup>6</sup> Tumbaedyatu Yusura Abraham acuare: “Mique eque juracanaya cuanaque tuna Canaánju cuinanabuque peyaja yahuaaju anidiru ishu. Tsunuda eje uma mara tuna anibuque tumeque yahuaaju, pushi ciento mara. Tumeque yahua metse cuanaratu mique eque juracanaya cuanaque nercada, ijahue ijahue jadya abuque. Tsujema tunajatu ecana mere amerebuque.

<sup>7</sup> Jadya ama bucha tuque dyaque nercaturabuque mique eque juranacaya cuanaque nercaturaqui cuanaque. Tuequedyatu mique eque ejuracana cuanaque cuinanabuque tuhuaque. Junabuque tuna riyaque yahuaaju; rehua tunara muinabuque”, jadya patu Yusura Abraham acuare béru.

<sup>8</sup> Yusuratu Abraham tsehue inime bajejecuare: “Mique, dutya mique eque juracanaya cuanaque jadya micuana ecuita huitu biti



catubumeretitaqui Yusuja cuanaque jadya adebataqui juishu”, jadyatu Abraham Yusura cuatsashacuare. Tuequedy a tujatu ebacuaque Isaac cuinanacuare. Cuinana huecaca catsurutiya jutu Abrahamra ecuita huitu biti tubucua re Yusura amerehua equedy a. Tuequedy a Isaac esiri juhuaju, tuja ebacuaque Jacob cuinanahuaju, tubunucacuare dya tura inime iyahua equedy a. Jacob amena esiri juhuaju, anicuare tujatu peady a tunca beta earacana ebacua cuanaque. Dutyady a tujatu ebacua cuanaque ecuita huitu biti tububarecuare. Riya peady a tunca beta earacana ecuita cuana ri peady a tunca beta earacana cuare israelita cuana equ e ejuracana cuanaque.

<sup>9</sup> “Peadyatu Jacobja ebacuaque José bacani jucuare. Tuja tuatsehuequi cuanaratu José dyaque jishacuare, etataquera tunaja ejuque tuna iyuhueda baya bucha iyuhuee ama baya bucha cabatitsu. Catyati tunajatu José acuare Egiptoju cuaya cuana queja. Tunaratu dujucuare tuhua japada. Josétu Yusu tsehue junenicuare. Egiptoju tu Yusura José narucuare.

<sup>10</sup> Nime casaturacua retu peya inime juyaju. Yusuratu dyaque bahue amerecuare. Jidatu anishacuare. Faraón Egipto juque ecuari quejatu José iyuhueda bamerecuare. Egipto naruqitu Faraónra amerecuare, tuque iyuhueda baatsu. Duty a tuja etareju aniya cuanaque tujatu narumerecuare, –jady a tuna Estebanra cuejacuare.

<sup>11</sup> Cuejanucacuare tujatu ecana:

–Adebayady a micuana, José Egipto naruqui

jucuaire patya dyaque mije jucuaireque. Tumebaedya Canaanju ecan mije jucuaire. Daditaqui ama ecuanaja baba cuanara ara ishu cuanaque bacuaire.

<sup>12</sup> Jacobtu bahue jucuaire Egiptoju trigo aniyaque. Jadya bahue juatsu tujatu cuadishacuare tuhua tuja ebacua cuanaque, ecuanaja baba cuana jucuaireque. Cuadishacuare tujatu ecan trigo bacara. Cuametse juatsu tuna caadebaticuare ama tuna tuatsehuequira trigo tyayaque.

<sup>13</sup> Tuna cuabeta ishu cuahuajutu José caadebamereticuare euji cuanaque queja. “Idya ique, José, micuana tsehuequique”, jadya tujatu ecan acuare. Faraón tujatu cuejacuare, tuja euji cuanaque adeba ishu.

<sup>14</sup> Tuatsehuequi cuanaque Canaanju dirunucahuie tuna Joséra acuare: “Nejeticue etata tsehue rehua, dutya ecuanaja ata cuana tsehue”. Tume tuna dutya Egiptoju anieticuare. Pacarucu tunca pishica earacana tuna anisicuacuare.

<sup>15</sup> Tuhadyatu Jacob majuya tupu anidircuare. Tuhua nucadya tujatu majucuaire dutya tuja ebacua cuanaque, ecuanaja baba cuana.

<sup>16</sup> Tsunuda eje uma mara cuetihuajutu ecuanaja ebaba ecanaja etsau cuana dujutanacuare Siquemju Canaan yahuaju. Eje uma mara aniya jariradya patu Abrahamra yahua icueneta quemi acuare tuhua tuja ata cuana majuya cuanaque papa ishu. Hamorja ebacua cuanaquera patu catyati acuare chipiru tsuje. Tuhuat papatanacuare ecuanaja ebaba ecanaja etsau cuana, —jadya tuna Estebanra

acuare.

<sup>17</sup> Huecashaajecuaredya jutidya tujatu tunaja ebaba cuanaque jucuare cuanaque.

—Egiptoju aniya jariquetu ecuanaja baba cuana umanaajecuaredya jutidya dyaque umada. Ejet-sunue ama tuna Egipto juque cuinana ishuque bataqui amajutu Yusura icuenetadya Abraham jadya tuque adadiya jadya acuareque.

<sup>18</sup> Tuequedyatu peya ecuari catibuticuare Egipto naru. Iyacuaque ecuariratu jidama acuare israelita cuana, arepa tuna José eque ejuracana cuanaque ama bucha. Bama tujatu José jucuare, tuque amena tsunuda majuhuaaju ecuari jucuare tibu.

<sup>19</sup> Tumeque ecuariratu dyaque nrecaturacuare ecuanaja baba cuana. Ijahue ijahue tujatu ecana acuare. “Ebacua cuana cuinanayaju, deca baatsu, etsecueju neijehuecue maju ishu”, jadya tujatu ecana casada tshue ijehuemerecuare ebacua cuanaque butseeju cuinana cuanaque. Jadya tujatu ecana amerecara acuare ecuanaja baba cuana umanajaca ishu.

<sup>20</sup> Tume patyatu cuinanacuare Moisés. Tumeque ebacua nanatu Yusuja dyaque iyuhuedaque jucuare. Etataque ecatserratu etehua temusha acuare etareju quimisha badi tupu.

<sup>21</sup> Tatseja etareju tatsejatu amena etehua naru ataqui ama bacuare. Jadya juatsu tatsejatu jitiju ishatsu enaju iyaticuare. Majucuare ama tuque. Tumetu ecuarija ebacujunaquera dadicuare. Daditsu tujatu tuja ebacuaque neri etemushau bucha temushae acuare.

<sup>22</sup> Ecuarija yutsecuaque bucha juya tibusu Moisés Egipto juque dyaque bahue cuanara bahuityacuare. Jetiera amatu sumicuaire. Dyaque jidatu quisarati bahue jucuare. Casa tsehuetu mere jucuare, –jadyatu Estebanra quisarati acuare.

<sup>23</sup> Cuejanucacuare tujatu ecana:

–Peya huecacatu Moisés cuacuare tuja ata israelita cuana cuajira. Ecuitatu amena jucuare. Pushi tunca mara tujatu anicuaire.

<sup>24</sup> Tuque tuna tsehuera tujatu bacuare peadya egiptojura israelita ujeda nrecada ayaju, arepa tumeque jidama juma ama bucha. Jadya baatsu tujatu icueneticuaire. Tsahuaticuaire tuja tuque. Iyecuaretu egicio, tuja ata israelita icueneyaque.

<sup>25</sup> “Ecue ata cuanaratu adebayadya Yusura ique tuna inajacamere ishuhuaque”, jadya tujatu inime tupucuaire. Tunaratu adebacuare ama.

<sup>26</sup> Huecacanucatsu piji cuitadyatu Moisés cuanucacuare israelita cuana aniyaju. Bacuare tujatu beta israelita ecatse catiyaju. Catishajacacara tujatu ecatse acuare catiyaque. “Metse taa metse ata. ¿Eje bucha juatsu jatsu metse catiya?” jadya tujatu ecatse acuare.

<sup>27</sup> Tuja ecare ujeda aquiquetu cahuaicuaire Moisés teshue, tura catishajacacara ayajudya jutidya. Itushacuare tuja tuque. “¿Aira jatsumi ecuanaja huaraji juishu bacanishachine? ¿Aira jatsumi iyachine ecuanaja inime jidama cuanaque bajejequi juishu?”

<sup>28</sup> ¿Ique ni taa mira iyecaradya anucaya, riyabarepa egipcio achine bucha?” jadyapa tujatu acuare Moisés.

29 Jadya bacatsutu Moisés bajida juatsu huanacuare. Dirucualetu Madián bacani yahuaju. Tuhuadyatu caquemiticuare madianita tsehue. Ejitaju tatse acuare beta ebacua.

30 “Pushi tunca mara juatsutu peya huecaca Moisés jecuare epu cuana tsecada anitayaju, emata Sinaí bacani japadamaju. Peadya Yusu tsahuaquiratu cabamereti ishu acuare. Moisesratu bacuare acuihuija, acuihuija jujuyaju ai tiruyaque murutayaque ama.

31 Jadya tumeque baatsutu Moisés dyaque anajacatacuare. Tume tujatu jipeticuare pana peta acara aatsu. Jipetitsu tujatu Yusura isarayaju cabacaticuare.

32 ‘Ique Yusu micue baba ecanara muiyaque. Ique Yusu, Abraham, Isaac, Jacob jadyara muiyaque’ jadya tujatu Yusu quisaratiyaju bacacuare. Jadya bacatsutu Moisés dyaque bajida jucuare. Bajida juatsutu tadadatibunecuare. Petataqui ama tujatu bacuare.

33 Isaranucualetu Yusura: ‘Mique ecue yacuaju tibu, catacaticue zapato, mira ique muiyaque cabamereti ishu.

34 Ique taa bahue ecue cuanaque Egiptoju dyaque nerecaturatayaque. Ijahue ijahue tuna ataya. Bacajacaya ama tuque tuna payaju. Amena ique jehua tuna jida inimeju cuinanasha ishu, Egipto juque cuinanasha ishu. Iyacia mique cuadishaya tuna inajacamerera’ jadya patu Yusura acuare Moisés béru.

35 “Yusuratu Moisés cuadishanucualetu Egiptoju, israelita cuana tsahua, inajacamere jadya aishu. Barepaju Yusu tsahuaquique

acui huija jujuyaque tirucuare ama eque tujatu cuadishacuare. Arepa israelita cuanara bijidamaduracuare ama bucha, arepa tuna ‘¿Aira jatsumi ecuanaja huaraji juishu bacanishachine? ¿Aira jatsumi ecuanaja inime jidama cuanaque bajejequi juishu iyachine?’ jadya acuare ama bucha, Yusuratu cuadishacuare tuna tsahua ishu.

<sup>36</sup> Moisesdyatu ecuanaja baba cuana Egipto juque cuinanashaquique jucuare. Tunaja yacuaju tujatu acuare Yusuja casa tsehue ni ejeque ecuitaja ataquique ama. Inime tillaqui tujatu ecana amerecuare. Egipto eque diruyaque, Bei Pudedaque riquequereyaque, pushi tunca mara tsecada anitaya cuana eque juneniyaquetu Moisésra tunaja yacuaju acuare ejeque ecuitara ayaque ama.

<sup>37</sup> Tumeque Moisesradyatu israelita cuana cuejacuare: ‘Micuana eque ejuracana cuana quejatu Yusura cuadishabuque tunaja ata, tuna Yusuja quisarati cuejara. Ique micuana cueja ishu cuadishahua bucha, jadidya tujatu tumeque cuadishabuque’ jadya tuna Moisésra cuejacuare.

<sup>38</sup> Riyaque Moisesradyatu huidujucuare ecuanaja baba cuana epu cuana tsecada aniya eque junenicuare patya. Tuaqueja cuitadyatu junacuare quisarati cuejaquique Yusuja yacua juque. Emata Sinaíju tujatu cabamereti ishu acuare. Tudyatu barepajura cuejacuare Yusuja cacuatsashati cuana tuna eje bucha jutaquique. Moisesratu yudijidya cuejanuca acuare riyaque cacuatsashati cuana ecuanaja baba cuana. Huenecuare tujatu peadya peadya tata eque umanaetibeya cuanaque bahue amereetibe

ishu, ecuana tumebaedya iyacua, –jadya tuna Estebanra acuare.

<sup>39</sup> Cuejanucacuare tujatu ecana:

–Ecuanaja baba cuanaratu Moisésra cuejayaque bacacarama acuare. Bijidama tuna bacuare tuna naruqui juishu. Dyaque tuna inime tupuqui acuare Egipto juque ani. Yudijidya dirunucacara ebari ecana jucuaré.

<sup>40</sup> Jadya tibu tuna Moisésja euji que Aaron bacani teshue quisaratiticuare, Moisés emataju tsurahuaju: “Acue ecuanaja yusu jiu cuanaque oro. Tume cuanara ecuana pahuiduju ecuana Egiptoju dirunucayaju. Arepa ecuana Moisésra Egipto juque huidujuhua ama bucha, baecue ecuana eje bucha tuque juchineque”, jadya tunajatu Aaron aticuare.

<sup>41</sup> Acuare tunajatu huaca cueya cueya oro. Iyecuare tuna uhuisha cuana cueya cueya cu-atsaqui. Tudyá tunajatu pureama, mui jadya acuare. Chine tuna jucuaré tumeque yusupa ejuu jadyaja ebacaniju. Muicuare tuna, tunaradya jutidya tunaja emetucu teshue cueya cueya aatsu.

<sup>42</sup> Jadya juhua baatsu tuna Yusura narujaca jipenee acuare; icuene naruhua bucha ama tujatu ecana narunucacuare, tuna cueya cueya queja nimee juhua baatsu, tuaqueja nimee eju-unque. “Paadya tuna tunara jidamaque acara ayaque”, jadya tujatu inime jucuaré. Tume tunajatu muicuare ijetei, badi, purari cuana jadya. Yusura tuja quisarati cuejaqui cuana eque quisarati acuare bae cuitadyatu judadicuare:

“Israelita cuana, micuanara ique ama tyahua uu eiye cuanaque, micuana pushi tunca mara

e pu cuana tsecada aniyaju juneniya patya.

<sup>43</sup> Ique emuiuque, micuanaradya jutidya cueya cueya ahuaque tuque micuana muihua.

Micuanaratu tume cuanaque yusu cuanapa jadya ahua.

Micuanaratu Moloc cueya cueya aatsu, tuque muiqui etare aatsu nityahua.

Tumeque etare tuque micuana eju micuana juneniyara aquerenihua.

Muicare micuana purari Refán bacani.

Tume micuana tuja cueya cueya caticuare.

Jadya tibu micuana nerecaturabuque.

Micuanaja yahua juque micuana cuinanashabuque, japada.

Babilonia yahua yueque tibene micuana cuadishabuque”,

jadya patu Yusuja quisarati jucuaré tuja quisarati cueja puji cuanara cuejacuareque, —jadya tuna Estebanra acuare.

<sup>44</sup> Isaranucacuare tujatu huaraji cuana:

—Epu cuana tsecada aniyaju juneniya patyatu ecuanaja baba cuanara aquerenicare ebite eju judirutsu etare caca nityadiru ishú. Etare cacatu jucuaré tuna Yusu mui ishúque. Educujutu anicare beta tumu jepedaque, bejedaque jadya. Tumeque tumu ecatséjutu ehúene jucuaré Yusuja cacuatsashati cuana. Icuenetadya patu Yusura Moisés bamerecuare ebite etare caca eje bucha ataeque, ai educuju iyayaque jadya. Tume tunajatu Yusura Moisés amerecuare bae cuitadya acuare.

<sup>45</sup> Egipto juque cuinanacuare cuanaque majuterehuajutu tunaja e bacua cuanaquera



dujucuaire tumeque etare caca Yusu mui ishuque Canaán yahuaju judirutsu, yahua Yusura tyaana acuareju judirutsu. Josuétu tuque tsahuaquique iyacuaque jucuaire. Tuna tuhua judiruhajutu jetiama peya anae cuanaque tuhua jucuaire. Yusratu ecuanaja baba cuana queja ecana cuinanashamerecuare, tuna cuitadya tuhua aniduru ishu. Tuhua tunajatu Yusu muicuaire etare cacaju David ecuari jujacaya tupu.

<sup>46</sup> Yusuja iyuhuedaquetu David jucuaire. Dyaque jidatu jucuaire tuatsehue. “Eratu acara aya etare arida, jida piji mique tuhua ani ishu. Ecuanaja ebaba Jacob tu miaqueja nimee jucuaire. Ique tumbaedy a miaqueja nimee nucadya. Jadya tibudya tuque micue etare aridaque acara aya”, jadya patu Davidra acuare Yusu.

<sup>47</sup> Yusratu David amerecarama acuare. Ebacuaque Salomonratu etare acuare, David majuhuaaju.

<sup>48</sup> “Jadya ama buchatu Yusu ecuitaja etare eauju camadya ama aniya. Dutya Iyaquiquetu aniya ama ecuanara ‘Yusuja Etare’ jadya ayaju camadya ama. Neadebacue tura tuja quisarati equé cuejahuaque:

<sup>49</sup> “Barepa tu ique aniqui buchique.

Yahua bacue ecue ehuaquí iyabutya ishu buchique.

Eje bucha anie ni ique juma ejeque etarejudya jutidya micuanaja eaju.

Eje bucha anie ni ique juma peadya etareju camadya.

<sup>50</sup> Jutaquiju ¿ai jatsu tuque micuana eau ecue ishu?

Idya di taa dutya ai iyaquique”, jadyatu Yusu jucuaire, —jadya tuna Estebanra acuare.

<sup>51</sup> Cuejaajecuaredya jutidya tujatu ecana:

—¡Micuana micuana cuejataqui ama! Micuanaratu Jesúsja quisarati ijacabacacarama aya. Jaraya ama tuque micuanaja iyucaju. Micuana micuana Yusu adeba baecua cuanaque bae jutidya. Yusuja Espíritu tuque micuana ijacabacaya ama. Micuanaja baba cuana baedya jutidya micuana.

<sup>52</sup> Tunaratu nerecaturacuare Yusuja quisarati cuejaqui cuanaque. Micuanaja baba cuanaratu iyecuare quisarati cueja puji cuana, “DYAQUE JIDAQUE tu junabuque”, jadya cuejaqui cuanaque. Tumeque DYAQUE JIDAQUE tu junahua. Tuja ebacanitu Jesús jucuaire. Tuque junahuaju tuque micuana inamerechine tuque ujeu baqui cuana queja. Micuanaratu curusuju tatameretsu iyemerechine.

<sup>53</sup> Micuanaja baba cuanatu Yusura tuja cacuat-sashati cuana cuejehua barepaju tuque tsahuaqui cuana eque. Micuanaratu pana adeba aya. Jadya ama bucha micuana tumeque cacuat-sashati eque ama juya, —jadya tuna Estebanra acuare.

### *Esteban iyetanacuareque*

<sup>54</sup> Estebanra cuejahuaque bacatsu tuna dyaque cahuaicuare. Etse tari tuna jucuaire tuatsehue cahuaityaque.

<sup>55</sup> Yusuja Espirituratu Esteban dyaque nime arituracuare. Ebarucue queja atucatu jucuaire. Capetatiyara tujatu bacuare Yusuja hueca. Bacuaretu Jesús Yusuja jida eque amaca netiyaju.

<sup>56</sup> —¡Nepetacue! Yusuja eaniqui tuque baya. Baya tuque Jesús ECUITA Yusuja jida eque amaca netiyaju, —jadyatu Esteban jucuaré.

<sup>57</sup> Jadya bacatsutu huaraji cuana dyaque cahuaiticuaré. Tuna cuitadya tuna jebuda quiquecuare. Ijaca cani tuna catumuticuaré tuque bacacarama aatsu. Casada quiquetsu tuna dutya tuaqueja tsajajateré jucuaré.

<sup>58</sup> Inacuare tunara. Inatsu tunajatu epu ebari juque cuinanashacuare, tumu tsehue iye ishu. Camisa cuana ecana catacatibarecuare. Tume tunajatu ecuita Saulo bacani queja narumerecuare camisa cuana. Tuhua tunajatu Esteban tumu tsehue iyecuare.

<sup>59</sup> Tunara tumu tsehue marereshayajutu Esteban Jesús queja bacabacacuare:

—Ique Cuatsashaqui Jesús, batsacue ique mi-aqueja judiruyaju, —jadya tujatu Jesús acuare.

<sup>60</sup> Nuyucuaré tuque. Nuyutsutu quiquecuare jebuda:

—Ique Cuatsashaquique, tillacue tunaja riyaque jucha iyaja cuita tunara abuyaque, —jadya tujatu Jesús acuare.

Jadya quisarati amena aatsutu majucuaré.

## 8

<sup>1-2</sup> Yusu muiqui cuanaratu papaticuaré Esteban emajuque. Enapacuare tunaja tuque.

*Saulora Jesús queja ecatyati cuanaque jidama nerecaturatibunecuareque*

Esteban iyetahuaju baatsutu Saulo dyaque jida cabaticuaré. Esteban iyetanacuare equequetu Jesús queja nimee ama cuanara Jesús queja

ecatyati cuanaque dyaque ijahue ijahue acuaire. Jadya equetu ecatyati cuanaque dutya epu cuana queja tsapetanaterecuare. Umaetu huanacuare peya epu cuanaju Judea yahuaju. Peya cuanatu Samaria yahuaju huanacuare. Jesúsja ecuadisha cuanaque tuna huanaterecuare ama. Anicuairedya tuna Jerusalénju.

<sup>3</sup> Saulotu catibuticuare Jesús queja ecatyati cuanaque nerecatura. Dutya jujeri etare cuanajutu nubinubinicuare tuna ina juyaque. Inacuaretu ecuita, epuna cuana tumbaedyá. Inatsu tujatu ecana etare apudaju ishacuare.

*Jesúsja quisarati Samariaju cuejatanacuareque*

<sup>4</sup> Jerusalén juque tsapetanacuare cuanaratu cuejacuare Jesúsja quisarati dutya queja. Judeaju, Samariaju jadya tunajatu quisarati tsapecuare.

<sup>5</sup> Jesús queja ecatyati cuanaque ijahue ijahue atayajutu Felipe huanacuare Jerusalén juque. Cuacuaretu Samariaju. Tuhuatu tura cuejacuare Jesús Mesías eje buchique.

<sup>6</sup> Yusuja casa tsehue tujatu acuaire jetiama ejeque ecuitaja ataquique ama.

<sup>7</sup> Tume tujatu Yusuja casa tsehue ijahua cuanara quijahuatishaya cuanaja ijahua cuana ije-huecuinauare. Ijahua cuanatu quiquetereyaque cuinanacuare tuna quejaque. Tumbaedyá tujatu chachanecuare jetiama ecuita maju cuanaque, rudurudu cuanaque jadya.

<sup>8</sup> Jutaquijudyá tuna dyaque pureama jucuaire tumeque epuju cuanaque.

<sup>9</sup> Tuhuatu anicuaire maru Simón bacani. Ijahuepa tujatu ajacacuare ama Samaria juque

ecuita cuana. Tuquepa ecuita dyaque inime metseque.

<sup>10</sup> Dutya jujeri tuhua cuanaratu ejenecuaré Simónra cuejayaque. Ecuita jetiedya cuanara, inime metse cuanara jadya tunajatu pana baca acuare. “Riyaque ecuitajatu aniya Yusuja casa”, jadya tunajatu Simónja ishú quisarati acuare.

<sup>11</sup> Eje uma maratu Simón maru jucuaré. Jetiamaratu tura cuejayaque pana ejene acuare, tura dyaque ijahue ahua tibu.

<sup>12</sup> Feliperatu Jesúsja quisarati cuejaajecuarédya jutidya Samariaju. Cuejacuaré tujatu ecana Yusura amena dutya narutibunehuaque. Cuejacuaré tujatu ecana jidaque quisarati Jesucristo eje buchique. Cuejayaju bacatsu tuna Jesús queja jetiama catyaticuaré. Jadya juatsu tuna cutsamereticuaré “Jesús jaque ecuana” jadya cabamereti ishú. Jetiama ecuita, epuna jadya tuna cutsamereticuaré.

<sup>13</sup> Simóntu Jesús queja catyaticuarédya. Cutsamereticuaré tuque. Junenitibunecuarétu Felipe tsehue. Ejeque ecuitaja ataquique ama ayaju bahue juatsu, tunajatu inime tillaqui acuare. Dutya tume cuanaque ayaju baatsutu Simón dyadi inime tilladya jucuaré.

—¿Eje bucha ae tujatu aya riya cuanaque? — jadya tujatu inime tupucuaré.

<sup>14</sup> Jesúsja ecuadisha cuanaque tuna Jerusalénju jucuaré jari. Bacatsacuaré tunajatu quisarati Samariaju cuanarapa Jesúsja quisarati amena ejeneya jadya. Jadya bahue juatsu tunajatu cuadishacuaré tuhua Pedro, Juan jadya.

<sup>15-16</sup> Juticuare tatse Samariaju Jesús queja ecatyati cuana queja. Junatitsu tatse Yusu queja bacabacacuare tunaja ishu. Yusuja Espíritu tu juna nama jari jucuare tuna queja ni eje quejadya jutidya. Cutsamereticuare tuna Jesús Ecuana Cuat-sashaquija ebacaniyu camadya.

Tumetu Pedro, Juan jadya Yusu tsehue quisaraticuare tunaja ishu:

—Tata, cuadishacue micue Espíritu Samariaju Jesús queja ecatyati cuanaja ishu, —jadya tatsejatu bacacuare.

<sup>17</sup> Jadya Yusu queja bacabacatsu tatsejatu iyacuare emetucu tunaja iyuca dyaque. Jadya juyajutu Yusuja Espíritu junacuare tuna queja.

<sup>18</sup> Simonratu bacuare Yusuja Espíritu junahuaque Jesúsja ecuadisha ecatsera emetucu tunaja iyuca dyaque ebi rirutsu emetucu iyayaju. Jadya baatsu tujatu ecatsé chipiru cuejacuare tuja tumeque casa ani ishu.

<sup>19</sup> —Ecue dyadi paanidya tumeque metseja aniyaque. Metsera emetucu ejeja iyuca dyaque iyayajutu tuaqueja Yusuja Espíritu junaya. Tsuje tyaya metse era, metsera Yusuja Espíritu juna ishuque casa tyayaju, —jadya tujatu ecatsé acuare.

<sup>20</sup> Jadya juyajutu Pedrora yana ujedá tsehue quemitsacuare:

—Yusura pana aputasha acue. Micue chipiru tumbaedyatu pana aputasha paa. Cuji cuita juatsu tuquemi inime tupuya Yusuja Espíritu chipiru tsehue equemita bucha. Tsujematu Yusura tuja cuanaja ishu cuadishaya. ¡Eje bucha juetie ni tu juma chipiru tsuje!

<sup>21</sup> Mira ni tu eje bucha merree ama Yusu ecuanara mereya bucha. Eje bucha tyae n imi Yusura tuja casa ama ecuana tyahuaque. Miquemi jida ama Yusura baya.

<sup>22</sup> Inime cacuareticue. Ajacacue mira jidamaque ayaque. Yusu queja canerecaticue: “Tata, eratu dyaque jidama inime tupuya. Apupashacue ecue jucha cuana”, jadya Yusu acue.

<sup>23</sup> Eratu adebaya micue eje buchique inime. Yusuja Espíritu era peya cuanaja ishuyabutyayaju mira dyaque jishahua. Miratu jidamaque inime tupuqui ajacaya ama, —jadyatu Pedrora acuare.

<sup>24</sup> —Nequisaraticue Ecuana Cuatsashaqui tsehue ecue ishuy. Nebacacue; patilla tura ecue jucha, tura ique metsera cuejehua bae nerecaturae eau tibu, —jadya tatse Simónra acuare.

<sup>25</sup> Jesúsja quisarati cueja amena aatsu, tatseja ishuyaje bucha Yusura ahuaque cueja amena aatsutu Pedro, Juan ecatsé Jerusalénju yudijidya dirunuca jucuaque. Yudijidya dirunuca juyara tatsejatu Yusu queja judiru ishuyaque quisarati cuejaa-jecuaque epu cuanaju Samaria yahuaque.

*Felipe ecuita Etiopijaju aniyatsehue quisaraticuareque*

<sup>26</sup> Jadya juatsutu Ecuana Cuatsashaquira cuadishacuare barepa juque etsahuaquique Felipe queja. Junaticuaretu Felipe queja. Junatitsu tujatu isaranaticuare:

—Cabajejeticue, Felipe. Cuacue beni diji queja amaca Jerusalén diji Gaza equetiyaju, —jadya tujatu Felipe anaticuare.

27 —Pacua taa ique, —jadyatu Felipera acuare.

Tumetu masadama cabajejeticuare. Cabajejetitsutu cuacuare. Tume cuayaquetu catsuruticuare ecuita Etiopiaju tsehue. Tumeque ecuitatu tuja yahuaju inime metseque jucuare. Turatu merecuare ecuari epuna. Chipiru naruquiquetu jucuare. Tuque Jerusalénju Yusu muira cuachineque jetinucayara tujatu Felipe tsurutsacuare.

28 Tuja yahuaju dirunucayaquetu jucuare. Caretu bae tshuetu dirunucacuare. Diruyara tujatu isaraajecuare Yusuja quisarati etsuri jebuda tsehue. Isaraajecuare tujatu Isaías Yusuja quisarati cuejaqira béru hueneacuareque.

29 —Jipeticue. Tsurutsacue tumeque ecuita ediji eque jetiyaque, —jadyatu Yusuja Espiritura acuare Felipe.

30 Tumetu Felipera tsajajatsurutsa acuare. Jipetsu tujatu bacacuare tura Isaiasra hueneacuareque quirica isarayaju.

—¿Adebayadyami eje buchique isarayaque? ¿Adebayadyami ai jadya ayaque tume mira isarayaque? —jadyatu Felipera bacaduratsacuare.

31 —Aijama. ¿Eje bucha adebae jatsu rique eau? Aira cuejayaju jatsu rique eadebau. Jecue; tsuracue. Ique peque anibutecue, —jadyatu etiopeacuare Felipe.

32 Isaiasja quisarati Yusuja quisaratiju ehuenequetu jucuare riyá cuanaque:

“Uhuisha iye ishú edujuta bucha dujutaetu jucuare iyeta ishú.



Uhuisha tunara eshu ayaju quiquetereya ama buchatu quicueneti queja inime ama jucuare.

Arepa tuna ujeda ujeda acuare ama bucha tujatu abacata idu acuare.

<sup>33</sup> ‘Tudyatu jucha metse’ jadya tunajatu acuare, arepa jadicue ama ama bucha.

Ni airatu icuenecuare ama.

Dyaque jidamatu ecuita cuana tuatsehue jucuaré. Daditaqui amatu quisatati eje bucha cuejae aishu. Iyecuare tunaja tuque”, jadyatu jucuaré Isaiasja quisarati etiopera isaraajecuareque.

<sup>34</sup> —Cuejacue ique riyaque quisarati. ¿Aija quisarati rejari cuejaya riyaque Yusu equeque quisarati cuejaquira? ¿Tujaquedya jutidya ni taa? ¿Peyaja quisarati ni taa rejari jadya aya? —jadyatu acuare etiopera Felipe.

<sup>35</sup> Tumetu Felipera pana cueja acuare eje buchique jadicue.

—Jesús rejari jadya aya, —jadya tujatu acuare.

Pana cueja ejitaju tujatu Yusuja quisarati acuare.

<sup>36</sup> Ediji eque diruyaque tatse judirucuare ena aniyaju. Tuhua judirutsutu etiopera Felipe bacaduracuare;

—Petacue. Rehua taa ri ena aniya. ¿Eutsaudya mira ique? —jadya tujatu bacaduracuare.

<sup>37</sup> —Mique ni Jesús queja catyatiya dutya micue ducuta inime tsehue, tume mique eutsaudya, —jadyatu Felipera acuare.

—Eratu ejeneya Jesús Yusuja Ebacuaqueque. Iyaja cuitadya ique tuaqueja catyatiya, —jadyatu ecuitara acuare.

<sup>38</sup> Yume nityamere cuitadya tujatu acuare caretu caretu dujuqui queja. Caretu juque butetsu tatse betadya enaju buteticuare. Tuhuadyatu Felipera utsacuare.

<sup>39</sup> Tatse ena juque tsurahuajutu Felipe Yusuja Espiritura huesatsu dujuquare. Tumetu etiope opera banucacuare ama. Dirunucacuaretu etiope dyaque pureama tsehue, Jesús jaque amena juhua cabatitsu.

<sup>40</sup> Epu Azoto bacanijutu Felipe ejitaju judirucua. Epu cuanajutu juajecuare, Jesúsja quisarati jidaque cueja juyaque, Cesarea ju judiruya tupu.

## 9

### *Saulo inime cacuareticuareque* (Hch 22.6-16; 26.12-18)

<sup>1</sup> Saulotu cahuititibunecuare Jesús queja ecatyati cuana tsehue. Eje buchadya iyetillacara tujatu ecana acuare. Pae dyaque muida quejatu catsahuamereticara juquare Ecuana Cuatsashaquija cuanaque nerecatura ishu. Jadya juatsutu tuatsehue quisaratira cuacuare.

<sup>2</sup> —Ique cuacara juya Damascoju Jesús queja ecatyati cuanaque sarera. Mira cuatsashayaju cuayaque ique jadique quirica tyacue. Ique Damascoju junatitsu cuaya caradati ishuque etare cuanaju riyaque quirica huaraji cuana bamera. Quirica isaratsu tunara pacueja eje cuanaque Jesús queja ecatyati cuanaque. Bahue juatsu painanati ecana dutyadya jutidya ecuita, epuna cuana jadya. Pabeti ecana Jerusalénju, —jadyatu Saulora aticuare pae cuana cuatsashaquique.

<sup>3</sup> Jadya ahuajutu Saulo cuacuare Damascoju. Ediji eque cuayaquetu Damasco epu ebari piji dyane juajecuare. Muya jutidyatu barepa eque huecara pana udatilla atsacuare.

<sup>4</sup> Hueca baatsutu Saulo huipuchitanatsu yahuaju rumucuta rihui jucuare. Rihuitsu jarayara tujatu etsuri bacacuare:

—Saulo, Saulo, ¿eje bucha juatsu mira nerecatu-  
raya?

<sup>5</sup> Jadya bacatsutu Saulora bacaduracuare:

—¿Aira isaraya?

—Ique Jesús, idya mira nerecaturayaque. Mira ique bijidamadurayaquemi mita tacadya jutidya jidama catiya. Juye tuta tacadya jutidya enimet-sequera muyayaju acui tapatsu ujeda ecatimereu buchique mique.

<sup>6</sup> Jadya bacatsutu Saulo bajida juatsu tadadacuare.

—¿Ai mira amerecara aya, Ique Cuatsashaquique?

—Netitsuracue. Damascoju piisi tuyu cuau jucue. Tuhua tunarami cuejatsaya mique ai jutaquique, —jadyatu Ecuana Cuatsashaquira acuare.

<sup>7</sup> Tumetu Saulo tsehue cuacuare cuanaque dyaque jecutanacuare. Inime tillaqui tuna acuare. Arepa tunara tumeque etsuri bacahua ama bucha, tunajatu bacuare ama ni ejeque buchique.

<sup>8</sup> Tumetu Saulo netitsuracuare yahuaju jujarayaque. Netitsuratsu tujatu busacuare yatuca. Busatsutu capetatitaqui ama jucuare. Shuhuitu jucuare. Jutaquijudyatu tuque

tajiaje juya cuanara ebiju inatsu dujuacuare. Junatiquerecuare tuna Damascoju.

<sup>9</sup> Tuhuatu quimisha huecaca capetatitaqui ama jucuare. Arama, ijima jadyatu jucuare.

<sup>10</sup> Tuhuatu anicuare ecuita Ananías bacani, Jesús queja ecatyatique. Cabamereticuaretu Jesús tahuiju tuaqueja. Cabameretitsu tujatu isaracuare:

—¡Ananías!

—Riyadya ique. Bacayadya mique era, Ique Cuatsashaquique.

<sup>11</sup> —Netitsuracue. Cuacue ediji “Tuyu” bacani eque, ecuita Tarso juque Saulo bacani sarera. Judasja etarejutu junachine. Iyacua cuitatu eatsehue quisaratiya.

<sup>12</sup> Tahuiju ebau bucha bae tujatu ejeque cuana ahua. Bahuadya tura mique tuhua nubitsu micue emetucu tuque dyaque iyayaju tuque capetatinuca ishú. Jadyatu Saulora bahua tahuiju bucha. Jadya tibudya baticue, —jadyatu Jesúsra acuare Ananías.

<sup>13</sup> Jadya bacatsutu Ananías bajida jucuare. Acuare tuja tuque:

—Ique Cuatsashaquique, eje umaja taa ique ecueja tumeque ecuita Saulo bacani eje buchique. Tura patu dyaque nerecaturaya Jerusalénju micue cuanaque, jida juya cuanaque.

<sup>14</sup> Jechine patu rehua micue cuanaque risitsu duju ishú. Pae cuanaja huaraji cuanara patu cuatsashahua ecuana jidama aishu, —jadyatu Ananíasra acuare Jesús.

<sup>15</sup> —Cuacue. Baticue. Tumeque ecuita tu amena ique merequique. Eratu tuque mepehua ecue

quisarati cuejaqui juishu. Cuejabuque tujatu ecana jetiama. Israelita ama cuanaque, tuna naruqui cuanaque, israelita cuana jadya tujatu ecue quisarati cuejadadiya.

<sup>16</sup> Ératu bahue ameredadiya Saulo tuque dyaque canerecatidadiyaque ecue quisarati cuejayaque, —jadyatu Jesúsra acuare.

<sup>17</sup> Tudyatu cuacuare Ananías Saulo junachineque etareju. Nubinatitsu tujatu emetucu ecatse iyacuare Sauloja iyuca dyaque. Isaracuare tuja tuque:

—Bandía, Saulo. Miquemi ecue eatsehuequique. Ecuana Cuatsashaquira cuadishahua miaqueja. Edijiju miaqueja cabameretichinera cuadishahua rehua mique capetatisha ishu. Tura ique cuadishahua, miaqueja Yusuja Espíritu iyabutya ishu, —jadyatu Ananiasra acuare Saulo.

<sup>18</sup> Tuque quisaratiyaju cuitadya tujatu pacacacuare yatuca juque jae bití buchique. Jadya juatsutu jida capetatinucacuare. Tumetu netit-suracuare tuja etahuiqui juque. Cutsamereticuare tuque Jesús queja catyatihuaque jadique adeba ishu.

<sup>19</sup> Jadya juatsutu chamacama amena araaracuare. Araaratsutu amena cacasatinucacuare. Eje uma huecaca pijitu anicuaré Jesús queja ecatyati cuana tsehue tuhua.

*Saulora Jesúsja quisarati Damascoju cuejacuareque*

<sup>20</sup> Damascoju jari tuputu Saulora Jesúsja quisarati cuejajacuare ama. Cuacuaretu israelita cuanaja Yusu mui ishu caradati ishuque etare cuanaju.

—Jesús tu Yusuja Ebacuaque, —jadya tujatu ecana cuejaajecuare.

<sup>21</sup> Tuque jadya bacaqui cuanaquetu anajacatuacuare.

—¿Jeeque ecuita ama jatsu ri Jerusalénju Jesús queja ecatyati cuanaque nerecaturaquíque? ¿Jeeradya ama tuna iyetilacara achine? ¿Jesúsja cuanaque risitsu dujura ama jatsuri jechine? ¿Tuna risitsu duju pae cuanaja huaraji cuana queja Jerusalénju duju jadyara ama jatsuri jechine? —jadya tuna jubarecuare.

<sup>22</sup> Saulora tuna baji tsehue ama cuejaajecuaredya jutidya Jesúsja quisarati. Israelita cuana Damascoju anicuare cuanaque tujatu cuejaajecuare Jesús Mesiasque, Yusuja Emepeque. Quisarati dyaque bahue tsehue tujatu ecana isaracuare. Anatsurutsataqui ama tuna bacuare.

*Saulo israelita cuanaja huaraji cuana quejaque huanacuareque*

<sup>23</sup> Ejetsunue juatsu amatu israelita cuana Saulo tsehue dyaque cahuaicuare. Casitaticuare tuna tuque eje bucha iyee aishuque inime bajeje ishu.

<sup>24</sup> Dutya huecaca tunajatu epu tsecue enubitaquíju narucuare cuinanayaju iye ishu. Jadya ama buchatu ejera cuana cuejacuare Saulo tunara eje bucha acara ayaque.

<sup>25</sup> Jesús queja ecatyati cuanaratu huanashacuare. Peadya meta tunajatu ishacuare jiti ebariju. Butyacuare tunajatu meta epu tachiqui tumu eaque dyaque eque. Jadya huanaetu Saulo jucuare Damasco juque.

### *Saulo Jerusalénju dirucuaque*

<sup>26</sup> Damasco juque cuinanatsutu Saulo Jerusalénju judirucuaque. Judirutsu tujatu Jesús queja ecatyati cuanaque jipecara datse acuare. Dutyara tunajatu mubacuare, tuque Jesús queja ecatyatique ejenecuare ama tibu.

<sup>27</sup> Bernabéra peadyatu ejenecuare tuque Jesús queja ecatyatique. Dujucuaque tujatu Jesúsja ecuadisha cuana queja.

—Yuneridya tu Saulo Jesús queja ecatyatique. Ecuana Cuatsashaquiratu cabamereti ishú achine tuque Damascoju cuayaju. Jesusratu isarachine. Damascoju jari tuputu Saulora baji tsehue ama Jesúsja quisarati cuejachine, —jadya tuna Bernabéra acuare.

<sup>28</sup> Jadya bacatsutu Ecuadisha cuanara batsacuare pureama tsehue. Tuna tsehuedyatu baji tsehue ama Ecuana Cuatsashaquija quisarati cueja jucuaque.

<sup>29</sup> Caquemitsati caquemitsatitu jucuaque israelita cuana griego yana eque quisaratiya cuana tsehue. Ejenecarama tunajatu acuare tura cuejayaque. Dyaque jutidya tuna cahuititsu iyecara acuare.

<sup>30</sup> Jesús queja ecatyati cuanaque tuna bahue jucuaque tunara iyecara ayaque. Jadya bahue juatsu tunajatu Saulo dujucuaque Cesareaju. Tuhuaquedya tunajatu ena eque cuadishacuare Tarso epuju, tuque catemuticuare epuju.

<sup>31</sup> Jida tunajatu bacuaque Jesús queja ecatyati cuanaque Judea, Galilea, Samaria yahua cuanaju aniya cuanara. Jesús queja ecatyati cuanaque

tuna tuaqueja nimeedya jutidya juajecuare. Cuatsashaya eque ecana jucuare. Dyaque tuna muibaajecuare. Yusuja Espirituja inime eque tuna aniajecuaredya jutidya. Tura bacue ecana tsahuajacacuare ama. Dyaque umadadya jutidya tuna Jesús queja catyatiajecuare.

*Eneas chacha nityatsuracuareque*

<sup>32</sup> Pedroratu Jesús queja ecatyati cuanaque cuajajecuare. Baticuaretu Lidaju aniya cuanaque.

<sup>33</sup> Tuhuatu anicuare ecuita Eneas bacani. Quimisacarucu mara patu ebucucujacaque jaracuare. Pedrora patu batitsu acuare:

<sup>34</sup> —Iyacia cuitadyami Jesucristora nityatsuraya, Eneas. Netitsuracue. Huesacue micue etahuiqui; ajecue, —jadyatu Pedrora acuare.

Jadya aya tsehuedyatu Eneas netitsuracuare. Bucucutaqui, ajetaqui jadyatu jucuare.

<sup>35</sup> Dutya jujeri tuna Lida juque, Sarón juque jadya aniya cuanaque jecuare Eneas aniyaju tuque bara. Banacuare tuna enetitsura juneniyaju jadya. Tuque jadya baatsu tunajatu ijehuecuare beruque tunaja quejeneti cuana. Cacualeticuare ecana inime. Catyaticuare ecana Ecuana Cuatsashaqui Jesús queja.

*Yusuja casa tsehue Pedrora Dorcas emajuque nityatsuranucacuareque*

<sup>36</sup> Tume patyatu epu Jope bacaniju anicuare epuna Tabita bacani. Griego cuanaja yanaju tu tumeque ebacani “Dorcas” jadique. Tuquetu Jesús queja ecatyatique jucuare. Tsahua bahue tujatu nerecada cuanaque jucuare tunaja ai aijama juya



cuana tsehue. Ajacacuare ama tujatu jidaque peya cuanaja ishu.

37 Pedro Lidaju jarijutu Dorcas ujejeda jutibunecuare. Ujejeda juatsutu majucuare. Emajuque tunajatu utsatsu bajecuare papati ishu. Utsa amena jadya aatsu tunajatu emajuque ebarucue beta ishu pisuju tuna dujucuare.

38 Jesús queja ecatyati cuanaque tuna bahue jucuare Pedro Lida juque, Jope japadama. Bahue juatsu tunajatu cuadishacuare beta ecuita Lidaju Pedro cuejara. Pedro queja junatitsu tatse cuejanaticuare:

—Pedro, mique jiteque yatse jehua. Dorcastu majuhua. Necuara Jopeju. Netsunutara ama, —jadya tatsejatu Pedro aticuare.

39 Jadya yana bacatsutu dutya cabajejetitsu Pedro ebajarara cuacuare tatse tsehue. Junaticuaretu Dorcas majuhuaque etareju. Tuhua junatihuaaju tunajatu dujucuare tumeque epuna emajuque jarayaju. Jetiamatu tuhua jucuare eahue-maju cuanaque majuhuaaja eadeba cuanaque, majuhuaque enapa juyaque. Bamerecuare tuna Pedro una cuana, camisa cuana jadya tunaja ishu Dorcasra achine cuanaque.

40 Tudyu tuna Pedrora dutya cuinanashatillacuare. Tuna cuinanashatillatsutu Pedro amena nuyucuare. Nuyutsutu Yusu tsehue quisaraticuare. Petacuaretu epuna emajuque.

—Tabita, netitsuracue, —jadya tujatu acuaru epuna emajuque.

Jadya ayaju tujatu busacuare yatuca. Tudyatu Pedro baatsu Tabita anitsuracuare.

<sup>41</sup> Anitsurahuaju tujatu emetucuju inaticuare. Nityatsuracuare tura. Jadya juatsu tujatu ihuaracuare eahuemaju cuanaque, Jesús queja ecatyati cuanaque jadya:

—Nejecue. Nebanacue emaju juhuaque. Chachari junucahua, —jadya tujatu ecana acuare.

<sup>42</sup> Dutya jujeri Jopeju cuanaratu bacacuare Dorcaspa emajuque netitsuranucahua jadique. Jadya bacatsu tuna jetiama Ecuana Cuatsashaqui Jesús queja catyaticuare.

<sup>43</sup> Pedrotu tsunudadya anicuare Simónja etareju. Simóntu ebiti acui biti tsehue jinashatsu puleda amerequique jucuaré.

## 10

### *Pedro, Cornelio jadya*

<sup>1</sup> Anicualetu Cesarea bacani epuju ecuita Cornelio bacani. Israelita amatu jucuaré. Tuquetu cien sudaru cuana cuatsashaquique jucuaré. Riyaque cuare sudaru cuanatu ebacanisha jucuaré “Italiaju Cuanaque” jadya.

<sup>2</sup> Corneliotu ecuita jidaque jucuaré. Yusu queja ecatyatitu jucuaré, arepa israelita ama jucuaré ama bucha. Tumebaedya tuja etareju cuanaque Yusu queja ecatyati jucuaré. Turatu israelita nerecada cuanaque tsahuacuare chipiru tsehue. Yusu tsehue quisarati bahuetu jucuaré dutya huecaca.

<sup>3</sup> Peya huecaca las tres chinequejatu bacuaré tahuiju bucha barepa juque Yusu tsahuaquique. Tumequetu juticuare tuaqueja. Isaracuare tuja tuque:

—Bastare, Cornelio.

<sup>4</sup> Jadya bacatsutu Corneliora pana peta acuare. Bajidatu jucuare. Bacaduracuare tuja tuque:

—¿Ai jitequemi jehua, tata? —jadyatu Corneliora acuare.

—Yusuratu mira tuque isarayaju bacajacaya ama. Tuquetu bahuedia mira israelita nrecada cuanaque tsahuajacayaque ama.

<sup>5</sup> Cuadishacue mere puji cuana Jopeju, Simón Pedro ihuarati ishu.

<sup>6</sup> Tuquetu peya Simónja etareju, ebiti acui biti tsehue jinashatsu puleda amerequi queja. Etare tujatu cueri cuanaja ecuaque peque. Turami cuejanaya mique eje bucha juishuque, —jadyatu barepa juque Yusu tsahuaquira acuare Cornelio.

<sup>7</sup> Quisarati cuejaquique diruhajutu Corneliora ihuaracuare quimisha tuque tsahuaqui cuanaque. Beta tatse tuja etareju mere puji jucuare; peya bacue sudaru. Quimishadya tuna Yusu queja ecatyatique jucuare.

<sup>8</sup> Cuejacuare tujatu ecana dutya eje bucha Yusu tsahuaquira cuejehua cuanaque. Cueja amena aatsu tujatu ecana cuadishacuare Jopeju.

<sup>9</sup> Cuaatsu tuna apunanatitsu edijiju tahuinaticuare. Huecacanucatsu tuna cuanucacuare. Tuna Jope japadama junatihujutu barepatya Pedro tsuracuare etare camahua jepeda dyaque tuque Yusu tsehue quisarati bahueju.

<sup>10</sup> Tuhua Yusu tsehue quisaratitsutu dyaque cuita aracara jucuare. Tunara tuja earaqui bajejeyaju cuitadya tujatu bacuare ai cuana tahuiju bucha.

<sup>11</sup> Bacuaretu barepa pacashatanaya bucha. Bacuare tujatu ai cuana taa sahuana ebari

buchaju. Pushi etsucu cuanajutu sahuana etisune jucuare. Yahujaju butyayaju tujatu bacuare.

<sup>12</sup> Tuaqueja butetu jucuare. Sahuana ducu tujatu jetiama cuanubi cuana, uu cuana, bacua cuana, upati cuana jadya bacuare. Educujutu an-icuare israelita cuanaja arata baecua cuanaque.

<sup>13</sup> Tumetu Pedrora Yusu quisaratiyaju bacuare:

—Netitsuracue, Pedro. Iyecue tume mira petaya cuanaque. Iyetsu aracue, —jadyatu Yusura acuaire.

<sup>14</sup> —¡Aijama, Ique Cuatsashaquique! Eje bucha arae tuque eau tume cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque, —jadyatu Pedrora acuaire.

<sup>15</sup> Bacanucacuairetu Yusu quisaratiyaju:

—Aracue. Asicada bucha baume ni ejeque earaqui buchique era mique aramereyaque, —jadyatu Yusura acuaire.

<sup>16</sup> Cueja beta ishutu Pedro Yusura

—Aracue, —jadya acuaire.

Tuque bacue jucuare:

—Aranime ama tuque ecue —jadya.

Quimisha ishujutu tumbaedy a jucuare. Quimisha ishujutu sahuana buchique tsuranucacuaire barepaju.

<sup>17</sup> Pedroratu adebataqui ama bacuare eje buchique tura jadya bahuaque.

—¿Ai Yusura bahue amerecara aya riya tahuiju bucha eque?

Tupupe tupupe tujatu inime acuare. Tuque tumeque inime tupu tsehuejutu Corneliora cuadishaya cuanaque junaticuare epuju.

—¿Eje queja ri Simónja etare? —jadya tunajatu Jopeju aniya cuanaque bacaduraajecuare.

Junaticuare ecana etareju.

<sup>18</sup> Tuhua junatitsu tuna bacaduracuare:

—¿Rehuadya ri ecuita Simón Pedro bacani?

<sup>19</sup> Pedrotu ebarucue ecamahua jepeda dyaque jucuare jari bahuaque inime tupu tsehue. Tumetu Yusuja Espiritura isaracuare:

—Quimisha ecuitatu junahua mique sare juyaque.

<sup>20</sup> Netitsuracue. Butecue. Cuacue tuna tsehue, arepa ecana israelita ama paju ama bucha. Cuacara cuacarama jadya juume tuna tsehue. Era cuitadya tuna cuatsashahua mique jiteque, —jadyatu Yusuja Espiritura acuare.

<sup>21</sup> Tumetu Pedro butecua, Corneliora cuadishahua cuanaque isarara.

—Idya ique micuanara sarenayaque. ¿Eje bucha juatsu micuana jehua? —jadya tujatu ecana acuare.

<sup>22</sup> —Corneliora ecuana cuadishachine. Tuquetu ecuita inime metseque. Cien sudaru cuatsashaquique tume. Dyaque jidaque tume. Dyaque Yusu queja nimeequi tume. Dutya israelita cuanaratu jida juyaju baya. Barepa juque Yusu tsahuaquiquetu junachine tuaqueja. Tudyu tujatu achine: “Cornelio, cuadishacue mere puji cuana Jopéju, Simón Pedro ihuarati ishu. Paje micue etareju. Turami cuejanaya mique eje bucha juishuque”, jadya patu Yusu tsahuaquira

Cornelio achine, —jadya tunajatu anaticuare Pedro.

<sup>23</sup> —Cuayadya ique metajudya micuana tsehue, —jadya tujatu ecana acuare.

Jadya aatsu tuna Pedrora ihuaracuare etareju nudya ishu. Tuhuadya tuna tahuicuare tumeque meta.

Peya huecacatu Pedro cuacuare tuna tsehue. Umae cuana Jesús queja ecatyati cuanaque Jopeju anicuare cuanaratu tajiticuare Pedro. Edijiju tuna tahuidirucuare.

<sup>24</sup> Peya huecaca tuna judirucuare Cesareaaju. Corneliora ihuayaju cuita tuna tuja etareju junaticuare. Tuna judiruma jarijutu Corneliora cuejamerebarecuare tuja etareju cuaishu tuja ata cuana, eadeba cuanaque jadya. Tuna tsehuedya tujatu ihuacuare Pedro junatiyaque.

<sup>25</sup> Pedro etareju junatihuaajutu Corneliora cuinanatsu tsurutsacuare. Nuyunaticuaretu Pedroja yacuaju.

<sup>26</sup> Yume nityaturatitu Pedrora acuare.

—Netitsuracue. Ique mique baeque ecuitadya. Yusu ama ique, —jadyatu Pedrora acuare Cornelio.

<sup>27</sup> Tuatsehue quisaratiyaque nubinataratu Pedrora banaticuare umada tuhua caradatihua cuanaque.

<sup>28</sup> Isaracuare tujatu ecana:

—Ique, ecue ecare cuana jadya ecuana israelita cuana; micuana bacue israelita ama. Ecuana cacuatsashati eque ecuana nubitaqui ama israelita ama cuanaja etareju. Casitatitaqui ama ecuana. Bahuedya micuana riyaque. Jadya ama bucha ique Yusura butseeju bahue amerechine,

ecue ni ejeque buchique asicada bucha baishu ama, “Miquemi Yusura en ama aya tuaqueja jeyaju” jadya cueja ishu ama. Israelita ama cuana tsehue casitaticarama jadya jutaqui ama ique.

<sup>29</sup> Cornelioja mere puji cuanara ihuaratiyaju jechine ique. Tsunutachine ama ique, micuana israelita ama cuana queja juna ishu. Jecara jecarama jadya tsehue ama jechine, —jadya tujatu ecana acuare.

—¿Eje bucha juatsu mira ihuaramerechine, Cornelio? —jadya tujatu acuare.

<sup>30</sup> Cornelioratu quemitsacuare:

—Ique juchineque mique cuejaya amena pushi huecaca dyane riyaque ura nucadya. Rehua ecue etareju Yusu tsehue quisaratichine, ique jubahue buchadya, las tres chinequeja. Tumbaedy aarama quibetichine Yusu muiyaque. Jadya juyajutu barepa juque Yusu tsahuaquique cabameretichine, Yusura cuadishayaque, una tiquidaque.

<sup>31</sup> Eatsehuetu quisaratichine. “Cornelio, Yusuratu mira tuque isarayaju bacajacaya ama. Tuquetu bahuedya mira israelita nrecada cuanaque tsahuajacayaque ama.

<sup>32</sup> Cuadishacue mere puji cuana Jopeju, Simón Pedro ihuarati ishu. Tuquetu peya Simónja etareju, ebiti acui biti tsehue jinashatsu pudedá amerequi queja. Etare tujatu cueri cuanaja ecuaque peque”, jadya barepa juque quisarati bequira cuejachine.

<sup>33</sup> Masadama tuque ecue mere puji cuana cuadishachine mique ihuarara. Yusurupai mique aya, mique junahua tibu. Yusura ecuana petaya

tuja quisarati baca ishu casitatihuaju. Cuejacue ecuana dutya mique Yusura ecuana cuejamereyaque, —jadyatu Corneliora Pedro acuare.

*Pedrora ecuita cuana Cornelioja etareju Jesúsja quisarati cuejacuareque*

<sup>34</sup> Tumetu Pedrora isaracuare israelita ama cuanaque:

—Iyacua ique bahue Yusura ecuana dutya tupu bayaque israelita cuana, israelita ama cuanaque jadya. Ni ejeque buchique tura ecuana bape ama baya.

<sup>35</sup> Yusu tu jida ecuana tsehue, dutya ecuana tuja inime eque juya cuana tsehue. Turatu dutya jida tsehue baya tuque muiqui cuanaque, ejeque yahua juquedya jutidya.

<sup>36</sup> Yusratu israelita cuana quisarati jidaque Jesús eje buchique bacamerehua. Jesucristo queja catyatitsu cuita camadya ecuana Yusu tsehue ecajipeti ejuu. Jesús tu Dutya Cuatsashaquique.

<sup>37</sup> Micuana micuana bahuedya icuene cuita Juanra Yusuja quisarati dutya queja cuejacuareque. Israelita cuana anicuare cuanaju Galilea equetu catibutecuare. Turatu quisarati ajacacuare ama: “Necacuareticue inime. Necutsamereticue. Masadamatu junaya Yusuja Emepeque”.

<sup>38</sup> Yusratu tuja Espíritu cuitadya Jesús Nazaretju queja cuadishacuare. Tuja casa cuitadya tujatu tyacuare. Jesús tu dutya queja junenicuare ai jidaque ayaque. Quijahuatishajacacuairetu ijahua cuanara quijahuatishaya cuanaque. Micuanaratu



adebayadya riyaque. Jadyatu Jesús jucuaré, Yusu tuatsehue tibu.

<sup>39</sup> Ecuánara cuitadyatu dutya bacuaré Jesúsra Jerusalénju acuaré cuanaque, Judea yahuaju dutya queja acuaréque. Jadya juatsu tunajatu iyemerecuare curusuju tatameretsu.

<sup>40</sup> Majuhuaque quimisha huecaca juatsutu Yusura chacha nityatsuranucuaré. Chacha junucatsutu Jesús cuitadya ecuana queja cabameretinucuaré ecuana tura mepecuaré cuana queja.

<sup>41</sup> Dutya queja ama, ecuana queja camadyatu cabamereticuaré. Yusura ecuana mepecuaré, peya cuana Jesús eje buchique cueja ishu. Araara, iji ishunque iji jadya ecuana jucuaré Jesús tsehue, tuque emajuque chacha netitsuranucahuaju.

<sup>42</sup> Cuadishacuaré tura ecuana ecuita cuana tuja quisarati cueja ishu. Acuaré tura ecuana: “Tere juetihuaju tuque cuejabuque dutya eje bucha judadiyaque, emaju cuanaque, majuma cuanaque jadya. Yusura ique amerehua eque tuque abuque. Riyaque eana necuejaticue”, jadya ecuana Jesúsra acuaré.

<sup>43</sup> Béru yuequedyatu Yusu equeque quisarati cuejaqui cuánara icueneta cueja acuaré Jesús eje buchique. Yusuja Emepequepa junabuque. Tumerapa tu dutya tuaqueja catyatihua cuanaja jucha cuana apupashabuque, —jadya tuna Pedrora cuejacuaré.

*Yusuja Espíritu israelita ama cuana queja junacuareque*

<sup>44</sup> Pedrora riyaque quisarati cuejaya jarijutu Yusuja Espíritu junacuare tuja quisarati baca juya

cuana queja. Israelita ama cuana quejatu jucua-re.

<sup>45</sup> Yusuja Espíritu israelita ama cuana queja junaya baatsutu Pedro tsehue Jope juque junahua cuanaque anajacatacuare. Tuna tuna israelita cuana jucua-re. Israelita cuana queja cuita camadya Yusuja Espíritu junaya bucha tunajatu inime jucua-re.

<sup>46</sup> Israelita ama cuanaque tuna bape yana eque quisaratibunecuare tunara cuita adebayaque amadya.

—Yusu, dyaque jida taa mique, —jadya tuna jucua-re.

Jadya bahueetu israelita cuana jucua-re Yusuja Espíritu israelita ama cuana queja junahuaque.

<sup>47</sup> —Yusuja Espíritu tu junahua tuna queja. Ecuana queja junahua bucha junaedyatu israelita ama cuana queja juhua. Aijama taa tu eje bucha eque riya cuanaque utsama aishu ama, —jadyatu Pedro jucua-re.

<sup>48</sup> Acua-re tujatu israelita ama cuanaque:

—Necutsamereticue micuana amena Jesucristo jaque jadya adebata ishü.

Jadya juatsu tunajatu acua-re:

—Rehuadya ecuana tsehue eje uma huecaca cuana anicue jari, —jadya tunajatu Pedro acua-re.

Tunara amereya equedyatu jucua-re.

## 11

*Pedrora Jesús queja ecatyati cuanaque eje bucha juyaque cuejacua-reque*

<sup>1</sup> Judeaju cuanaratu bacatsacuare quisarati Cesareaju jucuare cuanaque. Jesúsja ecuadisha cuanaque, tumbaedy a maé Jesús queja ecatyati cuanara bacacuare israelita ama cuanara Jesús eje buchique quisarati ejenechineque.

<sup>2</sup> Pedro Jerusalénju judirunucahuajutu maé Jesús queja ecatyati cuanara nereda atsacuare, Cesareaju cuanaque ecuita huitu biti catubutishahua ama tibu:

<sup>3</sup> —¿Eje bucha juatsumi jidama juchine tuhua Cesareaju? ¿Eje bucha juatsumi catubutima cuanaja etareju nubichine? ¿Eje bucha juatsumi casitatitsu ararachine tuna tsehue? —jadya tunajatu Pedro acuare.

<sup>4</sup> Tume tuna Pedrora pana cueja acuare eje bucha juchineque:

<sup>5</sup> —Ique Jopeju Yusu tsehue quisaratiyara tuque batsachine ai cuana tahuiju bucha. Bachine tuque ai cuana taa sahuana ebari buchaju. Pushi etsucu cuanajutu sahuana etisune juchine. Butechinetu barepa juque. Junachinetu eaqueja.

<sup>6</sup> Pana peta tuque achine. Petatsu tuque bachine cuanubi cuana, uu cuana, bacua cuana, upati cuana jadya tuque bachine. Dutyatu juchine ecuanaja arata baecua cuanaque.

<sup>7</sup> Tume tuque bacachine Yusu quisaratiyaju: “Netitsuracue, Pedro. Iyecue tume mira petaya cuanaque. Iyetsu aracue”, jadya Yusura achine.

<sup>8</sup> “¡Aijama, Ique Cuashashaquique! Eje bucha arae tuque eau tume cuanaque asicada baatsu israelita cuanaja ara baecua cuanaque. Aranime ama tuque ecue Moisésra aramerecarama ayaque”, jadya tuque achine.

<sup>9</sup> Tume Yusu quisaratinucachine barepa juque: “Aracue. Asicada bucha baume ni ejeque earaqui buchique era mique aramereyaque”, jadya tura achine.

<sup>10</sup> Cueja quimisha ishu Yusura achine: “Aracue” jadya. “Aranime ama tuque ecue”, jadya achine. Quimisha ishujutu sahuana buchique tsuranucachine barepaju.

<sup>11</sup> Tuequedyatu quimisha ecuita junachine ecuana aniyaju. Israelita ama cuanaque tuna juchine. Cornelio Cesareaju aniyara tuna cuadishachine ique sarera, ique tuja etareju cuaishu.

<sup>12</sup> Yusuja Espiritura cuejachine: “Cuacue tuna tsehue, arepa ecana israelita ama paju ama bucha. Cuacara cuacarama jadya juume tuna tsehue”, jadya tura achine. Riya Jesús queja shucuta ecatyati rehua eatsehue cuanara tajichine. Dutya ecuana cuachine Cesareaju. Nubichine ecuana Cornelioja etareju, israelita amaja etareju.

<sup>13</sup> Nubihuaju tura ecuana cuejachine: “Barepa juque Yusu tsahuaquiquetu eaqueja junachine. Bachine tuque rehua ecue etareju netiyaju. ‘Cuadishacue mere puji cuana Jopeju, Simón Pedro ihuarati ishu.

<sup>14</sup> Turami cuejanaya Yusu queja judiru ishuque quisarati, mique, micue etareju cuanaque jadya Yusu queja judiru ishu’ ”. Riyaque ecuana Corneliora cuejachine ecuana tuaqueja junatihujaju.

<sup>15</sup> Tura ique jadya cuejahujutu era isarati-bunechine tume israelita ama cuanaque Jesús eje buchique. Era tuna quisarati jidaque cuejayajutu Yusuja Espiritu junahua tuna queja. Ecuana is-

raelita cuana queja junachine bucha, jadya ju-naedyatu tume israelita ama cuana queja juchine.

<sup>16</sup> Tume tuque adebachine Ecuana Cuatsashaqui Jesúsra jadya acuareque: “Icuene tuna Juanra ena tsehue utsacuare inime cacuaretihua jadique ejitaju juishu. Tuequedya tuque micuanaja Yusura tuja Espíritu cuitadya cuadishaya micuana ecue cuanaque ejitaju juishu”, jadya ecuana Jesúsra acuare icuene.

<sup>17</sup> Ecuana Ecuana Cuatsashaqui Jesucristo queja catyatihuaajutu Yusura tuja Espíritu cuitadya ecuana queja cuadishahua. Tume israelita ama cuana queja tujatu iyabutyahuadya tuja Espíritu ecuana queja iyabutyacuare baedya. Jida amatu Yusura cuitadya eje bucha achineque ecue bijidamadura yuamatura jadya aishu, —jadya tuna Pedrora acuare.

<sup>18</sup> Tumetu Jesús queja ecatyati cuanaque Jerusalénju anicuare cuanara bacacuare tuque juchineque. Jadya cuejahuaju tunajatu terecuare cahuaiti. Abacatanacuare ecana. Pureama tuna acuare Yusu:

—¡Dyaque jida taa Yusu! Ecuana camadya ama ecuana Yusuja jutaqui, tumbaedya israelita ama cuanaque. Tuna ecuana juhua bucha inime cacuaretihuaaju tuna anisiribuque tuatsehue, — jadya tuna jucuaré.

*Jetiama ecana Antioquiaju cuanaque Jesús queja catyaticuareque*

<sup>19</sup> Esteban tuna iyehuaajutu Jesús queja ecatyati cuanaque huanabarecuare eje uma epu cuanaju, Jesúsja ama cuanara ecana dyaque cuita nerecaturaya tibu. Umae cuana tuna

huanacuare japada. Umaetu huanadiru jucuare Fenicia yahuaaju, Chipreju, epu ebari Antioquía tupu. Tuhua tunajatu Jesucristoja quisarati cuejajacacuare ama. Israelita cuana camadya tunajatu Jesúsja quisarati cuejacuare, israelita ama cuanaque bacue aijama.

<sup>20</sup> Umae Jesús queja ecatyati cuanaque Chipre juque, Cirene juque jadya tuna Antioquíaju cuacuare. Tuhua junatitsu tunajatu cuejacuare israelita ama cuana Jesúsja quisarati.

<sup>21</sup> Yusuratu dyaque tsahuacuare Jesúsja quisarati cuejaqui cuanaque. Quisarati bacatsu tunajatu jetiamara ejenejacacuare tunaja ebaba cuanaquera ejeneacuare cuanaque. Tume tuna Ecuana Cuatsashaqui Jesucristo queja catyaticuare.

<sup>22</sup> Tumetu Jesús queja ecatyati cuanaque Jerusalénju cuanara quisarati bacatsanucacuare jetiamapa Antioquíaju cuanaque Jesús queja catyatichine jadya. Tumeque bahue juatsu tunajatu Bernabé tuhua cuadishacuare.

<sup>23</sup> Bernabétu Antioquíaju junaticuare. Yusura tuhua cuanaque dyaque jida tsehue baya baatsu dyaque pureama jucuare.

—Ecuana Cuatsashaqui queja nimee nejuajecuedya jutidya. Neejenejacaume tuja quisarati, — jadya tujatu ecana acuare.

<sup>24</sup> Bernabéra tuna tsahuacuare jetiama peya cuana Ecuana Cuatsashaqui queja catyati ishu. Bernabétu ecuita jidaque jucuare. Yusuja Espiritura cuatsashaya equetu jucuare. Ducuta Jesús queja catyaticuare.

<sup>25</sup> Bernabétu tuhuaque cuinanatsu cuacuare Tarsoju Saulo sarera.

<sup>26</sup> Tuque daditsu tatse yudijidya judirunuca jucuare Antioquiaju. Tuhua tatse anidirucuare peadya mara Jesús queja ecatyati cuana tsehue. Jetiama tatsejatu ecana Jesúsja quisarati bahuityacuare. Antioquiajutu ecuita cuanara Jesús queja ecatyati cuanaque “Cristoja cuanaque” jadya banishametse acuare.

<sup>27</sup> Bernabé, Saulo ecitse Antioquiaju jarijutu Yusu equeque umae quisarati cuejaqui cuanaque tuhua jucuare. Jerusalén juque tuna junacuare. Jesús queja ecatyati cuana tsehue tuna casitaticuare.

<sup>28</sup> Peadya tuna tsehuequetu Agabo bacani jucuare. Yusuja Espiritura patu icuenetadya bamerecuare eje bucha judadibuqueque. Tume tuna netitsuratsu Agabora isaracuare:

—Mijetu jubuque dutya Judea yahuaju, — jadyatu jucuare.

(Claudio ecuari juyaque marajutu Agabora cuejacuare bae cuitadya judadicuare.)

<sup>29</sup> Agabora cuejahuaque bacatsutu Antioquia juque Jesús queja ecatyati cuanara tsahuacara acuare Jesús queja ecatyati cuanaque Judea yahuaju anicuare cuanaque.

—Necudadishara chipiru ecuana tsehuequi cuanaja ishu, tuna earaqui aniya jari tupu caquemiti ishu. Ecuana eje bucha tsahuataqui baya eque ecana netsahuara, —jadya tuna jucuare.

<sup>30</sup> Tume tunajatu sitacuare chipiru tunara eje uma tyataqui baya tupu. Dutya amena chipiru sitatsu tunajatu cuadishacuare Judea juque Jesús

queja ecatyati cuanaja huaraji cuana queja. Bernabé, Saulo jadya tsehue tunajatu cuadishacuare.

## 12

*Santiago iyetanacuareque, Pedro etare apudaju ishatanacuareque jadya*

<sup>1</sup> Ecuari Herodestu catibuticuare Jesús queja ecatyati cuanaque nerecatura.

<sup>2</sup> Cuadishacuare tujatu sudaru cuana:

—Neiyeticue Santiago, Juan tsehuequique. Cuchiru tsehue neiyeticue.

Jadya ayaju tunajatu cuchiru tsehue piti tubuticuare.

<sup>3</sup> Israelita cuana Jesús queja catyatima cuanaque tuna dyaque pureama jucuare Santiago iyetanahuaju. Tumetu Herodesra dujumerecuare risitsu Pedro. Riyaquetu jadya jucuare, Pascua bacani chine ishucuita, israelita cuanaja pan levaduramaque ara bahueque huecacaju.

<sup>4</sup> Tunara Pedro inahuajutu Herodesra ishamerecuare etare apudaju. Cuadishacuare tujatu peadya tunca shucuta earacana sudaru tuque naru ishucuita, pushira naru pushiradya cuare narunuca; jadya narue tunajatu acuare.

—Pascua chine cuetihuaju tuque ecuita cuanaja yacuaju nitya ishucuita ihuaramereya. Dutyaja yatucaju tuque iyemereya, —jadyatu Herodesra inime tupucuare.

<sup>5</sup> Pana narutu sudaru cuanara acuare Pedro, tuque ehuanaju. Tuque tuhuajutu Jesús queja ecatyati cuanaque Yusu queja inime patya bacabaca jucuare tuja ishucuita. Bacabacajacuare amacana tuja ishucuita.



*Yusura Pedro etare apuda juque  
cuinanashacuareque*

<sup>6</sup> Tumeque chineju, Herodesra tuque iye ishuque huecaca iyahuaque juetima jarijutu Pedro tahuicuare tuhua beta sudaru patya. Jidatu erisi jucuare beta cadena metal tsehue. Peya enaruqui cuanaquetu etsecueju neticuare etare apudaja eteriqui naru.

<sup>7</sup> Muya jutidya cuitatu juticuare barepa juque Yusu tsahuaquique. Juticuaretu Pedro eishaju. Huecaratu huecatillacuare etare apuda ducu. Barepajuratu Pedro epereju pajacuare emetucu tsehue, tuque cabatisha ishu. Cabatishatsu tujatu acuare:

—Netitsuracue ebajarara, Pedro.

Cadena ecatsetu Pedroja ebi risiquique pacacuare.

<sup>8</sup> —Cajututihuishacue. Canaiticue. Jutucue micue chinela, —jadyatu barepajura acuare Pedro.

Tumetu tura cuejaya equedya jucuare. Tuque cajututi amena juhuaju tujatu acuare:

—Jutucue micue caramati ishuque. Cajututitsu ique tupuju jeticue, —jadyatu barepaju Yusu tsahuaquira acuare.

<sup>9</sup> Tume tatse betadya Pedro eisha juque cuinanacuare. Pedrotu barepa juque tupuju cuinanayaque cuinanaya ama bucha cabaticuare. Tahuiju ama bucha tahuiju bucha jadya jutidyatu cabaticuare.

<sup>10</sup> Barecuare tatse icueneque enaruquique. Tupuju tatse beta ishuque barenucacuare. Judirucuare ecatse amena ishuque etsecueju. Tumeque etsecuetu fierro eaque jucuare. Dyaque

arida, bicueda jadyatu jucuare. Amena ishuque etsecue epuju cuinana ishuquetu jucuare. Tatse tumeque etsecueju cajipetiyajutu Yusura tuja inime taca pacashatana amerecuare. Cuinanacuare ecitse. Edijiju ajequerebacatsutu Yusu tsahuaquira jacacuare.

<sup>11</sup> Tumetu Pedro nime jueticuare. Adebacuaretu tahuiju ama jadya juyaque.

—Yuneridya tucue inajacameretahua. Yusratu cuadishahua barepa juque tuque tsahuaquique ique etare apuda juque cuinanasha ishu, Herodesja ique eje bucha aishu ama. Arepa israelita cuanara iyecara aya ama bucha, Yusura taa inajacameretahua, —jadyatu Pedro jucuare.

<sup>12</sup> Einajacaque pana caadebati juatsutu Pedro Mariaja etareju cuacuare. Tumeque Mariatu Juan Marcosja ecaque jucuare. Jetiamatu Jesús queja ecatyati cuanaque tuhua casitaticuare Pedroja ishu Yusu queja bacabaca ishu. Etare apuda juque cuinanashamere ishu tuna bacabacacuare.

<sup>13</sup> Pedrotu etare tsecue judirucuare. Judirutsu tujatu dududirucuare eteriqui. Ihuaracuaretu etsecue capacashamereti ishu. Epuna ehue ebari Rode bacanitu etsecueju junacuare, aira eteriqui duduyaque cuajira.

<sup>14</sup> Tura isarayaju cabacatitsu tujatu adebacuare Pedroja etsuri. Tuja etsuri bacatsutu dyaque pureama juatsu yume cuanucadya jucuare peya cuana cuejara, Pedro nudya ishu etsecue pacashamaquedya.

—¡Pedrolya tu etsecueju! —jadya tuna Rodera aticuare.

15 —¡Aijama! ¡Eje bucha juetu tuque ejuu! Peta jida ama tuquemi ahua. ¡Eje bucha Pedro ni tu juma! —jadya tunajatu abarecuare.

—¡Pana petadya tuque ahua! ¡Pedrodya tume! —jadya tuna Rodera acuare.

—¡Tuque ama tume! Barepa juque Yusu tsahuaquique tu ejuu, Pedro naruquique, —jadya tuna jucuaré.

16 Pedroratu dudunityacuaredya jutidya eteriqui, capacashamereti ishu. Chamacama tunajatu eteriqui pacashaticuare. Bacuare tuna. Tuque baatsu tuna inime tsapema jucuaré. Inime tuputsu tuna tuna camadya jutidya cabacaduratibareya jadya jucuaré.

17 Emetucu ahua tsehuedya jutidya tujatu ecana cuejacuare tuna abacatana ishu. Cuejacuaretu ecana eje bucha cuinanashae Yusura ahuaque etare apuda juque.

—Necuejacue Jesús queja ecatyati cuanaque rehua casitatihua ama cuanaque ique eje bucha juhuaque, Santiago neri neri Ecuana Cuatsashaqui tsehuequique, —jadya tujatu ecana acuare.

Jadya tuna aatsutu cuinanatsu dirucuaré peya queja.

18 Huecacahuajutu sudaru cuanara Pedro etare apudaju datse sareticuare. Dadicuare ama tunara. Eje bucha adebataqui ama tunajatu bacuare Pedro eje bucha juhuaque.

—¿Eje bucha cuinanae jatsuri juhua rehuaque? —jadya tuna jubarecuare.

—¿Eju jatsuri cuahua?

19 Herodesratu saremereticuare. Dadicuaru ama tuna. Ihuaracuaretu sudaru cuana.

—¿Eje bucha cuinanaetu Pedro juhua etare apuda juque? —jadya tujatu ecana bacaduracuare.

Eje bucha quemitsataqui ama tunajatu bacuare.

Tume tujatu ecana iyemerecuare, tunara erisique huanashahua tibu.

Jadya juatsutu Herodes cuinanacuare Judea juque. Dirutsutu anidirucuaru Cesareaju.

### *Herodes majucuaruque*

20 Herodestu ecahuaiti jucuaru ecuita Tiro, Sidón jadyaju anicuaru cuana tsehue. Tuna tsehue ecahuaiti juya tibu tujatu tunaja ara ishucuanaque cuadishajacuaru. Tumetu tumeque epu ecatsuju cuanara cuadishacuaru Herodes tsehue inime bajejeti ishucuanaque. Ecuadisha cuanajatu dyaque eadeba jucuaru ecuari merequique, Blasto bacani. Tumetu icuene cuita Blasto tsehue quisaratira cuadishatahua cuanaque cuacuaru.

—Blasto, mique jiteque ecuana jehua. Ecuana ecuari isaraquereticue, tuque ecuana tsehue cahuitijaca ishucuanaque, earaqui ecuana tyatananuca ishucuanaque, —jadya tunajatu acuaru.

21 Herodesratu iyacuaru huecaca tuna tsehue quisarati ishucuanaque. Tumeque huecaca juetihuajutu cacjututicuaru ejutuqui huecaca cuana dyaque inime metseju jutu bahue tsehue. Tumeque jututsutu anibutecuare huaraji muida cuanaja eaniquiju tuna isara.

22 Tuja quisarati bacatsu tuna quiquecuare:

—¡Miquemi ecuita ama! ¡Yusu mique! —jadyatu ecuita cuanara acuare qui que eque.

<sup>23</sup> Bacatsu tuna Herodesra nereda acuare ama ni abacashacuare. “Yusu camadya nenuicue, ique ama”, jadya cuana tujatu ecana acuare ama cuitadya. Jadya tibutu Yusura barepaju tuque tsahuaquique yume cuadisha cuitadya acuare tuque ujejeda amere ishu. Etsena queja tujatu educuju esere cuana aramerecuare. Masadama cuitatu majucuaré.

<sup>24</sup> Dyaque umada ecuitaratu bacacuare Jesúsja quisarati. Dutya queja Jesús queja ecatyati cuanaratu peya cuana cuejacuaré tuja quisarati.

<sup>25</sup> Bernabé, Saulo jadyaratu Jesús queja ecatyati cuanaja huaraji cuana tyaticuaré chipiru neredada cuanaja ishu Jerusalénju. Tuque tyatitsu tatse dirunucacuare tuhuaque. Judirunucacuare tatse Antioquiaju. Juan Marcostu tatse tshuedya cuacuare.

## 13

*Bernabé, Saulo jadya tatse peya queja Jesúsja quisarati cuejati ishu mepetanacuareque*

<sup>1</sup> Antioquiajutu Jesús queja ecatyati cuana ducu anicuare Jesúsja quisarati cueja, bahuitya jadya juya cuanaque. Jucuaré tuna Bernabé, Simón, Lucio, Manaén, Saulo jadya. Simonjatu peya ebanani anicuare; “Shuedaque” bacanitu jucuaré. Luciotu Cirene juque jucuaré. Manaén patu Herodes Galilea naruqui jucuaré tshue catemutipee jucuaré.

<sup>2</sup> Peya huecacatu Jesús queja ecatyati cuanaque ecasitati jucuaré tuque mui ishu. Arama tuna

equibeti jucuare tuque muiyaque. Tuna tuhuaju tuna Yusuja Espiritura isaracuare:

—Eratu mepehua Bernabé, Saulo jadya. Iyacua ecitse necuadishacue Yusuja mere aishu, —jadya tuna Yusuja Espiritura acuire.

<sup>3</sup> Yusu tsehue quisarati ishu arama quibetitsu emajaca anitsutu Jesús queja ecatyati cuanara emetucu tatseja iyuca matina iyacuare tatse Yusura mepehuaque jadique bamere ishu. Emetucu iya amena aatsu tunajatu Yusuja mere aishu cuadishacuare.

*Ecuadisha ecatsera Chipreju Jesúsja quisarati cuejacuareque*

<sup>4-5</sup> Yusuja Espiritura cuadishayajutu Bernabé, Saulo jadya cuacuare Chipre cububuju. Juan Marcos tatsejatu etsahuaqui dujucuare. Tumeque ecububuju junati ishu, tuna icuene cuita junaticuare Seleuciaju. Tuhuaquedya tuna cuaba ebariju anibutenuacuare Chipreju cuaishu. Junaticuare ecana Chipreju Salamina ebuteju. Junaticuare tuna Jesúsja quisarati cueja jutibunecuare. Nubicuare ecana israelita cuanaja caradati ishuque etare cuanaju Jesús eje buchique cueja ishu.

<sup>6</sup> Batillacuare tuna dutya epu aniya cuanaque ecububuju. Judirucuare ecana epu Pafos bacaniju. Tuhua tunajatu tsurucuare israelita Barjesús bacani. Tuquetu maruhuisa jucuare. Ijahue tujatu ecuita cuana acuire. Pusha pusha tshuetu “Eratu quisarati cuejaya Yusu equeque cuitadya”, jadya jucuare.

<sup>7</sup> Tuquetu Sergio Pauloja etajiqui jucuare. Sergio Paulotu dutya tumeque ecububuju anicuare

cuana naruquique jucuare. Ryaquetu dyaque inime jararaquida cuita jucuare. Ihuaramerecuaretu Bernabé, Saulo jadya Jesúsja quisarati bacacara aatsu.

<sup>8</sup> Barjesusjatu peya ebacani “Elimas” jucuare griego yana eque. Enaruquique tujatu Jesúsja quisarati bacamerecarama acuare. Tuquetu dyaque ecahuaiti jucuare Bernabé, Saulo jadya tsehue. Sarecuare tujatu eje buchique enaruquique Jesús queja catyatisha ishü ama.

<sup>9</sup> Saulojatu beta ebacani anicuaré. Griegojutu “Saulo” bacani jucuare, hebreojü “Pablo” jadique. Tuquetu Yusuja Espirituja biji eque juneniyaque jucuare. Petatsu tujatu maruhuisa Elimas isaracuare:

<sup>10</sup> —Miquemi pusha pusha puji. Jidama cuita mique. Miquemi Satanás jaque. Miratu ujeu bajacaya ama dutya jidaque. Ecuana Cuatsashaqui queja catyatitsu ecuana juneniya ediji tuyu eque bucha. Miratu micue pusha pusha tsehue ecuita cuana ejenemerecarama aya tuja quisarati. Tuquejami ecana catyatishacarama aya. Ediji tuyu eque ama ajeshaya bucha tuquemi ecana amereya.

<sup>11</sup> Iyaja cuitami Yusura nerecaturaya. Shuhui turami amereya. Eje uma huecaca cuanami capetatiya ama. Ni ai buchique tuquemi petaya ama, —jadyatu Pablora acuare.

Muya jutidyatu maruhuisa shuhui jucuare. Dutya tuja ishü apuda jucuare. Ni ai buchiquetu petacuare. Jababanicuaré tuque ejeque dadicara aatsu ebiju inatsu carepemereti ishü.

<sup>12</sup> Sergio Pauloratu bacuaré Elimas jadya

juhuaju. Jadya baatsutu Jesús queja catyaticuare. Ecuana Cuatsashaquija quisarati bacatsu tujatu adebacuare yunerique. Bacamapa tujatu jucuare jadya cuanaque bahuityayaque.

*Pablo, Bernabé jadya Antioquiaju Pisidia yahuaju cuacuareque*

<sup>13</sup> Tuequedyatu Pablo tuatsehue juneniya cuana tsehue cuanucacuare Pafos juque. Ena eque tuna cuacuare Panfilia yahuaju. Junaticuare ecana Perge ebuteju. Tuhua tatse shanatsutu Juan Marcos Jerusalénju judirunucacuare.

<sup>14</sup> Pablo, Bernabé jadya tatse cuanucacuare Perge juque. Cuanucacuare tatse ediji eque Antioquiaju judiruya tupu. Tumeque Antioquiatsu Siria yahuaju ama jucuare. Pisidia yahuajutu jucuare. Canajara huecacaju tatse cuacuare israelita cuanaja caradati ishunque etareju. Nubitsu tatse anibuteacuare.

<sup>15</sup> Tunaja bahuetu israelita cuana tuhua cuanaque Yusuja quisarati isara jucuare etsuri jebuda tsehue. Isaracuare tunajatu Moisésra, Yusu equeque quisarati cuejaqui cuanara jadya huenecuare cuanaque. Tuequedyata tuna quirica isara amena jucuare. Caradati ishunque etareju ecuatsashaqui cuanaratu Pablo, Bernabé jadya cuejamerecuare:

—Tata ecatsé, aniya ni metseja ai ecuana cueja ishunque, necuejacue. Aniya ni metseja ecuana casatura ishunque, necuejacuedya ecuana iyaja cuita, —jadya tunajatu ecatsé acuire.

<sup>16</sup> Tumetu Pablo netitsuracuare. Emetucu tsehue tujatu ahuaracuare ecuita cuana abacasha ishú. Jadya juatsutu quisaratitibunecuare:



—Ecue ata cuana israelita cuana, nebacacue ique. Micuana israelita cuana ama cuana Yusu Neri muiqui cuanaque, nebacacue ique quis-aratiyaju.

<sup>17</sup> Béru yuequedyatu Yusura ecuanaja baba cuana mepecuare, Israel eque ejuracana cuanaque. Tuna tuna tumeque Yusu Neri queja nimee jucuare. Tuna tunaja yahuaju ama Egipto bacanjú aniya jariju tujatu ecana dyaque jetiama umanashacuare. Tuquetu tuna tsehue dyaque jida jucuare. Tuja casa tsehue tujatu ecana cuinanashacuare Egipto juque.

<sup>18</sup> Eje uma mara tuna epu cuana tsecada aniyaju junenicuare. Pushi tunca mara tuna junenicuare. Narujacacuare ama tujatu ecana, arepa tuna eje uma au ama tura cuatsashayaque acuare ama bucha.

<sup>19</sup> Pacarucu bape bape yana cuana equeque tuna Canaánju anicuare. Yusura tuna pana aputashatilla acuare, tuja cuanaque tuhua ani ishú, ecuanaja baba cuana tuhua ani ishú. Tume anie cuanaque tuna aputashatillacuare, ecuanaja baba cuana tunaja epu cuana metsenemere ishú.

<sup>20</sup> Israel Egiptoju dirucuare equeque, tuque ejuracana cuanaque Canaánju yudijidya anidirunuca jucuare equequetu 450 mara dyane jucuare. Tuhua Canaánju tuna Yusura huaraji inime cuana bajeje puji cuana eque narucuare. Samuel tu amena ishúque inime cuana bajeje ishúque jucuare enaruquique. Tuquetu Yusu equeque quisarati cuejaquique jucuare.

<sup>21</sup> “Samuel aniya patyatu ecuita cuana jucuare: ‘Amena ecuana Yusu queja canarumereticarama

juya inime cuana bajejequi cuana eque. Ecuari cuana queja ecuana canarumereticara juya, peya yahua cuanaju bucha' jadyatu ecuita cuana jucuare. Tumetu Yusura Saúl mepecuare ecuari juishu. Tuquetu Cisja ebacuaque; ecuanaja ebaba Benjamín eque ejuracanaquetu jucuare. Pushi tunca mara tujatu israelita cuana narucuare.

<sup>22</sup> Tupujutu Yusura bijidama bacuare Saúl ecuari juishu. Turatu mepecuare David ecuari iyacuaque juishu. 'Pana adeba tuque David aya, Isaíja ebacuaque. Tumeque ecuita tu ecue bijidaque. Turatu aya dutya era amereyaque' jadya patu Yusu jucuare, David jadya ayaque.

<sup>23</sup> Icuenetadya patu Yusu jucuare: 'Cuadishabuque tuque israelita cuana queja David eque juracanayaque tuna inajacamere ishu'.

<sup>24</sup> Jesús, Yusuja quisarati bahuitya catibutima jarijutu Juanra israelita cuana acuare: 'Necacualeticue inime. Necutsamereticue Yusu queja nimee jadique ejitaju juishu' jadya tujatu ecana acuare.

<sup>25</sup> Jucualetu Juan tuque Yusura amerehuaque atillahuie: 'Ique ama micuanara ihuayaque. Mesías ama ique. Tsunutaya amatu peya junayaque. Tujatu dyaque casa aniya, ecue bucha ama. Tuque baatsu ique ni aishuquedya jutidya; mere puji tuja patrón tsehue beta tupu ama ejuu bucha jutidya ique' jadyapa tuna Juanra acuare, —jadyatu Pablora isaracuare Antioquiaju cuanaque.

<sup>26</sup> Isaranucacuare tujatu ecana:

—Ecue ata cuana Abraham eque ejuracana

cuaunque, nebacacue ique. Micuana israelita ama cuaunque Yusu neri muiqui cuaunque, nebacacue ique quisaratiyaju. Yusura micuana bahue amerecara aya eje bucha tuaqueja judirue juishuque.

<sup>27</sup> Dutya jujeri Jerusalénju cuaunque tuna baecua jucuare Jesús Ijahua quejaque inajacamere ishucadadishaque. Tunaja huaraji cuana tuna baecuadya jucuare. Canajara huecacaju cama tunajatu caradati ishucadadishaque etare cuanaju Yusuja quisarati isaranicuare. Isaracuare tunajatu Yusu equeque quisarati cuejaqui cuanara hueneacuare cuaunque. Jadya ama bucha tunajatu adebacuare ama isarayaque.

<sup>28</sup> Jerusalénju cuanaratu Pilato bacacuare tuja iyemere ishucadadishaque, arepa tuna eje bucha iyemere aishucadadishaque ama ama bucha, arepa tuja ni equeque jucha aijama jucuare ama bucha.

<sup>29</sup> Icuenetadyatu Yusu equeque quisarati cuejaqui cuanara hueneacuare Jesús jadya ayaque. Yusuja quisaratiju tunajatu hueneacuare tuque eje bucha judadiyaque. Dutya judadacuare tunara cuejacuare eque cuitadya. Jesús curusuju majuhuaajutu Joséra emajuque butyamereacuare. Butyatsu tujatu cani ducu ishameacuare.

<sup>30</sup> Yusratu yudijidya nityatsuranuca acuar tuque quimisha huecaca majuhuaaju.

<sup>31</sup> Netitsuranucatsutu Jesús cabamereticuare tura mepecuare cuana queja. Tuque iyetanama jariju tuna junenicuare tuatsehue jetiama epu cuana juque bahuiya, Galilea eque Jerusalén tupu. Chacha netitsuranucatsu tuna Jesúsra cabamereti ishucadadishaque. Juneninucacuareadyatu tuna tse-

hue eje uma huecaca. Iyacuatu tuque enityat-suratanaque baqui jucuare cuanara tuja quisarati cuejaya dutya queja. Tunaratu tuja quisarati cuejaya Israel equé ejuracana cuanaque.

<sup>32</sup> “Yatsera micuana tumbaedyá cuejaya Jesús eje buchique quisarati. Tudyatu Yusura ecuanaja baba cuana cuadisha ana acuarequedya.

<sup>33</sup> Tura aana ahua bae cuitadyatu jucuare. Ecuana ecuanana tuna equé ejuracana cuanaque. Ecuanaja ishutu Yusura acuare tura aana ahuaque Jesús yudijidya nityatsuranuca ahuaque. Yuequedyadyatu Yusu jucuare, Jesús emajuquepa nityatsuranucaya jadya. Tura quisarati acuareque tu ehue ne Yusuja quisarati beta ishunque Salmosju:

“Miquemi ecue ebacua.

Iyacua tuquemi ecuita cuana bamereya, ique micue tataque”.

<sup>34</sup> “Tumbaedyatu béru Yusura cuejacuare emajuque patu nityatsuradadiya, tuja ecuita riri ishú ama jadya. Jadyatu Yusu jucuare, jadya quisarati ayaque:

“Jida tuque ameredadiya miatsehue.

David tsehue ique jida jucuare bucha, jadidya judadiya miatsehue.

Yuneridya jadidya judadiya”.

<sup>35</sup> Peya tu Salmo quiricaju ehue ne jadya:

“Ririshabuque amami micue iyuhuedaja ecuita, mique merequi juhuaja ecuita”,

jadyatu Davidra quisarati acuare béru.

<sup>36</sup> “Adebayadya ecuanana David tuta taca ama jadya caticuareque. Davidtu majucuare. Tuque majuma jarijutu Yusuja biji equé anicuare. Jida

tujatu israelita cuana narucuaire. Majuhuaaju tunajatu emaju caniju ishacuaire. Tuja ebaba cuanaque majuhuaaju ishatanacuarejudya tunajatu ishacuaire. Davidtu majutsu ririterecuare.

<sup>37</sup> Jesús bacue riricuare ama, Yusura yudijidya emajuque nityatsuranucacuare tibu, —jadya tuna Pablora cuejacuaire.

<sup>38</sup> Pablora Antioquiaju cuanaque cuejanucacuare:

—Ecue ata cuana, bahue micuana yatsera amerecara aya; Jesús equetu Yusura jucha cuana apupashaya. Riyaque Jesúsdy micuana cuejaya.

<sup>39</sup> Jesús queja catyatitsu cuita camadya tuque micuanaja jucha cuana etillatanau. Moisésja cacuatsashati eque juatsu amatu jucha cuana apupashatanaya, Jesús queja catyatitsu cuita camadya.

<sup>40</sup> Beru patu Yusu equeque quisarati cuejaqui cuanara quisarati acuare, tuque bijidamaduraquiquepa canerecatidadibuque jadya. Necanaruticue micuana, tunara cuejacuaire eque ejuuju.

<sup>41</sup> “Micuanaratu ecue quisarati ejeneya ama.

Micuana micuana quijaribati arida cuanaque.

Inime tilla nejudue.

Baji micuanaja paani.

Iyetanadadiya micuana, ecue quisarati ejenecarama aya tibu.

Idya Yusu.

Micuanaja yacuajudya tuque aya ejeja ataquique ama.

Jadya ama bucha micuanara ejenedadiya ama.

Peya cuanara era ahuaque cuejayaju tuque micuana ejenebuque ama”, jadyatu Yusura quisarati acuare béru tuja quisarati cuejaqui cuana eque, –jadya tuna Pablora acuare.

<sup>42</sup> Jadya aatsutu Pablo tuatsehue juneniya cuanaque jadya tuna caradati ishuque etare juque cuinanacuare. Tuna cuinanayaju tuna ecuita cuanara acuare:

–Peya canajara huecacaju ecuana Jesús eje buchique necuejananucacue, –jadya tunajatu ecana acuare.

<sup>43</sup> Tume caradatihuaque diruterehuajutu umada israelita cuanara tajicuare Pablo, Bernabé jadya. Tumebaedya tatse jetiama israelita ama cuana Yusu muiqui cuanara tajicuare. Tatsera tuna casaturacuare.

–Yusura micuana dyaque iyuhueda bayaque caadebatitsu tuque pureamaturayaque neaniajecuedya jutidya, –jadya tatsejatu ecana acuare.

<sup>44</sup> Semanape piji cuitadya tuna canajara huecacaju dutya jujeri epu ebariju cuanaque casitaticuare Ecuana Cuatsashaquiya quisarati baca ishu.

<sup>45</sup> Jetiama ecuita ecaradatique baatsutu israelita cuanaja huaraji cuana cahuaiticuare Pablo, Bernabé jadya tsehue. Tuna cuita camadya quisaratiyaju bacatacara tuna jucuar tatse jetiama ecuitara quisaratiyaju bacayaju. Tume tunajatu Pablo ecatsé dyaque cuita jishatsu quemitsape ijillahuana jadya atibunecuare:

–Pablo ecatsera micuana pusha pusha cuejaya, –jadya tunajatu ecana acuare.

<sup>46</sup> Tumetu Pablo, Bernabé jadya quisaraticuare casada tsehue, bajida tsehue ama:

—Micuanadya micuana ecuanaja icuene cuita Jesúsja quisarati bacameretaqui jucuare micuana israelita cuana. Jadya ama buchatu micuanara bijidamaduraya. Micuanaratu micuanaja mere equedya jutidya Yusu queja judirutaqui ejuu bucha adebaya. Jadya tibudya tuque tuque yatse iyacua israelita ama cuanaque Jesúsja quisarati cuejaya.

<sup>47</sup> Yusratu béru quisarati acuare:

“Micuana micuana era iyahua, ecue quisarati dutya quejaque cueja ishu.

Hueca bucha micuana jubuque, eje bucha inajacameree era eauque cueja.

Dyaque japada micuana cuabuque, ique eje buchique bahue amereyaque”,

jadyatu Yusura quisarati acuare béru.

Jutaquiju tuque yatse israelita ama cuanaque cuejaya, —jadyatu Pablora israelita cuana acuare.

<sup>48</sup> Jadya bacatsutu israelita ama cuanaque dyaque pureama cuita jucuare.

—¡Dyaque jida taa Yusuja quisarati! —jadya tuna jutibunecuaré.

Yusura tuaqueja judiru ishu mepecuaré cuanaquetu Jesús queja catyaticuaré.

<sup>49</sup> Jadya equetu Jesús queja ecatyati cuanara cuejajacuaré ama dutya queja Ecuana Cuat-sashaquija quisarati. Tumeque yahua dutya epu cuanaju tuna quisarati cueja jucuare.

<sup>50</sup> Israelita cuanatu Pablo, Bernabé jadya tsehue dyaque jutidya cahuaiticuaré. Tunaratu ecuita cuana inime metse cuanaque tatse tsehue cahuaitishacuaredya. Cahuaitishacuare tuna epuna inime metse cuanaque. Tumeque epuna

cuanatu Jesús queja catyatima jucuaré, arepa Yusu muicuaré ama bucha. Dutya tume cuanaque tunajatu ana cuejacuaré Pablo, Bernabé ecátse tumeque yahua juque ijehuemere ishú.

<sup>51</sup> Cuinanayaquetu Pablo ecátse ehúachi juque muru quitatatiqúenacuare. Jadya tatsejatu ecana acuare, “Rehua cuanaque ri jucha metse” jadíque, quisarati bacacarama juya tibu. Jadya juatsu tatse cuacuare Iconioju.

<sup>52</sup> Jadya ama buchatu Antioquía juque Jesús queja ecatyati cuanaque pureama jucuaré, Jesús jáque cabatitsu. Tuna tuna Yusuja Espirituja biji equé anicuaré. Tuque bacue tuna tsehuedya jucuaré.

## 14

### *Pablo, Bernabé tsehue Iconioju cuacuareque*

<sup>1-2</sup> Pablo, Bernabé jadya tatse Iconioju israelita cuanaja caradati ishú etareju nubidirucuaré. Tuhúadya tatsejatu Jesús eje buchique quisarati cuejacuaré. Jetiama tuna Jesús queja catyaticuaré israelita cuana, israelita ama cuanaque jadya. Jadya baatsutu israelita cuana tuaqueja catyaticarama juhua cuanaque dyaque cahúaiticuaré. Quisaraticuaré ecana israelita ama cuana Jesús queja catyatima cuana tsehue. Pusha pusha ecana jucuaré Pablo ecátseja ishú. Jidama tunajatu ecana inime tupumerecuare tatseja ishú, Jesús queja ecatyati cuanaja ishú jadya.

<sup>3</sup> Jadya ama buchatu Pablo ecátse dirushacuare ama. Tsunuda tatse tuhua anicuaré, jetiama ecana Jesús queja catyatihua baatsu. Cuejacuaré



tatse Ecuana Cuatsashaquiya quisarati bajida tsehue ama.

—Yusura micuana dyaque iyuhueda baya, —jadya tatse ecuita cuana cuejacuejanicuare.

Yusuja casa tsehue tatsejatu ni ejeque ecuitaja ataquiye ama acuare. Yusura tatse jadya amerecuare, ecuita cuana tuja quisarati yunerique bahue amere ishu.

<sup>4</sup> Umada ecuita cuana tumeque epuju anicuare cuanara tatse ejencuare ama. Dutyara tupu ama tuna inime tupucuare. Umaetu israelita cuanara inime tupuya equo jucuare. Peya cuana bacue jucuare Pablo ecatsēja inime equo.

<sup>5</sup> Tumetu Iconioju cuanaque tuna cama quisaraticuare, israelita cuana, israelita ama cuanaque jadya. Huaraji cuana tsehue tunaja dutyaja tupu inime jucuare Pablo, Bernabé jadya jidama ijahue ijahue aishu.

—Neiyera ecatsē tumu tsehue, —jadya tuna jucuare.

<sup>6</sup> Pablo, Bernabé jadya tatse bahue jucuare tunara iyecara ayaque. Bahue juatsu tatse Listra, Derbeju jadya huanacuare. Tumbaedyā tatse cuacuare epu cuana japadama. Jeeque beta epu tu Licaonia yahua juque.

<sup>7</sup> Tuhua tatsejatu cuejacuaredya jidaque quisarati Jesús eje buchique.

*Pablo tuna Listraju tumu tsehue iyejer-icuareque*

<sup>8</sup> Tuhua Listrajutu anicuare ecuita ajebaecuāque. Huachi jidamaque cuinanacuare tibutu ajebaecua jucuare.

<sup>9</sup> Jeeque ecuitaratu bacaanicuare Pablora Jesúsja quisarati cuejayaque. Pabloratu pana peta acuare. Petatsutu Pablora inime tupucuare:

—Riyaque ecuitara taa ri ejeneya Yusura ajebaecuaque eajeshauque, —jadyatu Pablora inime tupucuare.

<sup>10</sup> Tumetu Pablora jadya acuare etsuri jebuda tsehue:

—Netitsuracue. Pana neti jucue.

Tura jadya ayajutu ecuita putitanacuare. Ajeti-bunecuare. Etsaca ecatsé tujatu jida ajetaqui jucuaque.

<sup>11</sup> Umada ecuitaratu bacuare Pablora ajebaecuaque ajeshahuaju. Baatsu tuna quiquetibunecuare tunaja yana eque, Pabloja yana eque ama:

—¡Yusu ecatséri ecuaná queja cabameretihua! ¡Cacuitatitsu retse ecuaná queja cabameretihua! —jadya tuna jucuaque.

<sup>12</sup> —Riyaque ecatsé rique ecuanaja yusu ecatsé. Tumeque tu Zeus, —jadyatu Bernabé petatsu jucuaque.

—Tumeque tu ecuanaja yusudya. Riyaque ri Hermes, —jadyatu Pablo petatsu jucuaque.

Jadya tuna Pablo, Hermes bucha adebacuare, tuque dyaque quisaratihua tibu.

<sup>13</sup> Tuna jadya quiquetereya tsunumeetu pae Pablo, Bernabé ecatsé paera jipeticuare. Tuquetu Zeus merequique jucuaque. Zeus mui ishunque etarejutu mere jucuaque. Tumeque etare cacatu epu ejunacuareju jucuaque. Quetimerecuare tujatu toro cuana, tatseja ebacaniju iye-mere ishú. Shasha cuanatu paera tatse bajeje

ishu quetimerecuare. Paera, ecuita cuanara jadyatu Pablo, Bernabé jadya muicara acuare; tunaja yusu cuana mui ea bucha tunajatu ecitse muicara acuare.

<sup>14</sup> Ecuita cuanara Yusu mui ea bucha muicara ayajutu Pablo, Bernabé ecitse dyaque peya inime jucuaré. Cachajaticuare tatse tatseja una, peya inime juya jadique cabamereti ishu. Quiqueajecuaré tatse tuna queja:

<sup>15</sup> —Tata ecana, ¿aishu micuana jadya juya? Yusu ama yatse, ecuitadya jutidya. Micuana buchique cuitadya yatse. Jidaque quisarati micuana cuejara yatse jechine, micuanaja yusu cueya cuana muijaca ishu. Yanacana tuque micuana muiya. Ni aishu buchique tuna jida ama. Tume cuana queja nimee nejujacacue. Yusu Neri queja nimee nejuque. Tuquetu Yusu Chachaque. Turatu barepa iyacuare. Yahuatu iyacuaredya. Cueri cuanaja ecuaquetu iyacuare. Dutya tume cuanaju aniyaque tujatu iyacuare. Jadya eque tu tuque dutya iyaquique.

<sup>16</sup> Berutu ecuita cuana Yusu Nerija inime eque ama anicuare. Tunaja inime equedya jutidya tuna anicuare. Yusura patu quisarati acuare: “Eaqueja nimee jucarama juya cuanaque paani tuna eje bucha tunadya jutidya anicara juya eque”.

<sup>17</sup> Jadya ama buchatu tuna tsehue jida jujacahua ama. Jadya bameree tujatu ecana ahua tuque peadya camadya Yusu nerique. Turadya tuque micuanaja tee cuana nei queja amereya, micuana cuhuatiya cuanaque jida huija ishu. Turadya micuana tyaya dutya micuanara ara

ishu cuanaque sareyaque, micuana pureama juishu. Jadya bae tura micuana jida aya, micuana tuaqueja catyati ishu, —jadya tatsejatu ecana acuare.

<sup>18</sup> Jadya tuna Pablo, Bernabé ecatsera acuare tunaja tatseja ebacaniju uu cuana iye ishu ama, tunara tatse cueya cueya cuana ebajejeu bucha bajejee eauju. Jadya ama bucha tuna eje bucha jadya amerejacataqui ama bucha jujericuare.

<sup>19</sup> Judirucualetu israelita cuana Antioquía juque, Iconio juque jadya. Tuna tuna Jesús queja ecatyatique ama jucuare. Cahuaitishacuare tuna ecuita cuana, tunaja Pablo, Bernabé jadya ujeu baishu. Tumetu ecuita cuanara Pablo tumu tsehue marereshacuare. Iyehua bucha tuna cabaticuare. Tume tunajatu epu juque repeajetsu ijehueticuare etsecueju. Tuhuadya tunajatu shanacuare.

<sup>20</sup> Jesús queja ecatyati cuanaque tuna caradaticuare tuque jarayaju. Tunara tuhua petayajudyatu netitsuracuare. Yudijidya judirunucatu jucuare epuju. Jadya juu huecaca nuca jadya juatsutu Bernabé tsehue cuacuare Derbeju.

<sup>21</sup> Tuhua tatsejatu cuejatinucacuare quisarati jidaque Jesús jucha cuana tsujetyaqui majucuaque. Jadya bacatsu tuna jetiama Jesús queja catyaticuare. Tuequedya tatse judirunucacuare Listraju, Iconioju, Antioquiaju jadya.

<sup>22</sup> Tumeque epu cuana eque cuetiyara tatsejatu casaturacuare Jesús queja ecatyati cuanaque.

—Jesús queja nimeedya jutidya nejuajecue. Dyaquetu canerecati anibuque Jesúsja cuanaja

ishu, –jadya tatsejatu ecana aeticuare.

<sup>23</sup> Dutya epu cuanaju tatsejatu Jesús queja ecatyati cuanaque naru ishu cuanaque iyabarecuare. Arama quibeti jucuaré, Yusu tsehue quisarati ishu emajaca ani ishu. Naru ishu cuanaque iyabaret-sutu Pablo, Bernabé ecatsé quisaraticuare tunaja ishu Jesús tsehue.

–Ecuana Cuatsashaquique, jida narucue micue cuanaque naruqui mira mepehua cuanaque. Mi-aqueja tuna catyatihua, –jadya tatsejatu Jesús bacacuare.

*Pablo, Bernabé jadya Antioquiaju Siria yahuaju judirunucacuareque*

<sup>24</sup> Pablo, Bernabé jadyatu cueticuare Pisidia yahua eque. Judirucuaré tatse Panfilia yahuaju.

<sup>25</sup> Tueque cuetinuayara tatsejatu cuejaetibenuacuare Jesúsja quisarati Pergeju. Juetinucacuare ecatsé Ataliaju.

<sup>26</sup> Tuequedya tatse dirunucacuare ena eque Antioquiaju judirunuca ishu. Riyaque epu juquedya tatse cuacuare Jesúsja quisarati cuejara. Tatse cuinanama jarijudyatu Jesús queja ecatyati cuanaque tuhua anicuare cuanaque Yusu queja bacabacuare tatseja ishu: “Narucue ecatsé jida, tatsera mique mereya tibu, tatse micue quisarati cueja juyaju”, jadyapa tunajatu bacacuare icuenedya. Tumeque mere amena aatsu patu Pablo, Bernabé ecatsé Antioquiaju judirunucacuare.

<sup>27</sup> Tuhua Antioquiaju judirutsu tatsejatu sitacuare Jesús queja ecatyati cuanaque. Pablora tuna cuejacuare dutya tatse eque Yusura eje bucha ahua cuanaque:

—Yusura yatse tsahuachine dyaque yatse Jesúsja quisarati cueja juyaju. Yusuja jadya inime juya tibusu jetiama israelita ama cuanaque Jesús queja catyatichine tuja quisarati bacatsu, —jadya tuna Pablora cuejacuare.

<sup>28</sup> Pablo, Bernabé ecatsetu anidirucua tuhua tsunuda Jesús queja ecatyati cuana queja.

## 15

*Jesús queja ecatyati cuanaque naruqui cuanaque Jerusalénju casitaticuareque*

<sup>1</sup> Tume patyatu umae ecuita cuana judirucua Judea yahua juque Antioquiaju. Judirutsu tunajatu Jesús queja ecatyati cuanaque cuejati-bunecua:

—Berutu Moisésra cacuatsashati iyacuare israelita deca nana cuana ecuita huitu biti catubuti ishu Yusu jaque jadya adeba ishu. Yusu queja ni micuana judirucara juya, catubumeretitaquidya micuana, arepa micuana israelita cuana ama juya ama bucha. Catubutiya ama ni micuana, Yusura micuana Ijahua quejaque inajacamerebuque ama, —jadya tunajatu ecana cuejacuare.

<sup>2</sup> Jadya bacatsutu Pablo, Bernabé jadyara acuare ecuita cuana:

—Yuneri ama tuque; neejeneume ecana, —jadya tatsejatu ecana acuare.

Caquemitsati caquemitsati tatse jucua Judeaju cuana tsehue. Tuna dutya cati cati juyajutu Antioquiaju cuanaque baecua jari jucua ecuita huitu biti catubutitaquique, jadya ama juatsu catubitaqui ama jadique.

—Necuadishara eje uma ecuita Jerusalénju inime bajeje ishú. Jesúsja ecuadisha cuana tsehue ecana tuhua paquisaratiti. Emuiba cuana tsehue ecana paquisaratiti, —jadya tuna jucuaré.

Jadya quisarati aatsu tunajatu mepecuare Pablo, Bernabé, umae peya cuana jadya.

<sup>3</sup> Jesús queja ecatyati cuanara cuadishaya cuanaque tuna Antioquía juque cuacuare. Cuayaque tuna cueticuare Fenicia, Samaria yahua ecatsé equé. Cuayaque tuna epu cuanaju junatitsu Jesús queja ecatyati cuana tsehue caradatiajecuare.

—Jetiama israelita ama cuanaratu amena ejenejacachine tunara icuene ejenehua cuanaque. Jetiama tuna Jesús queja catyatichine, —jadya tunajatu ecana cuejaajecuare.

Jadya bacatsutu Feniciaju cuanaque, Samariaju cuanaque jadya dyaque pureama jucuaré.

<sup>4</sup> Cuadishataya cuanaque Jerusalénju junatihua-jutu Jesús queja ecatyati cuanaque naruquirá ecana jida batsacuare. Jesúsja ecuadisha cuanara, emuiba cuanara jadya ecana jida batsacuare. Pablora tuna cuejacuare Yusura tuna equé dutya ahuaque.

<sup>5</sup> Umae fariseo cuana tuhua jucuaré cuanaque tuna quisarati ishú netitsuracuare. Tuna tuna Jesús queja ecatyati cuanaque jucuaré, arepa fariseo cuana ama bucha.

—Israelita ama cuanaque Jesús queja catyatitsu tuna Moisésra ecuana dutya cacuatsashati cuana iyahua equé anitaqui. Ecuana baedya tuna ecuita huitu bití catubumeretitaqui, Yusu jaque jadique adebataqui juishu. Jadya tuque ecuanaja ecana bahuityataqui, —jadya tuna quisaraticuare.

Jadya eqe tunajatu Pablora inime tupuya bucha ama inime tupucuaré.

6 Tumetu Jesúsja ecuadisha cuanara casitatuquerecuare Jesús queja ecatyati cuanaque naruqui cuanaque, riyaque inime bajeje ishu.

—¿Israelita ama cuanaque tuna ecuita huitu biti catubutitaqui, aijama ni taa? —jadya tuna cabacaduraticuaré.

7 Tsunuda tunajatu tumeque quisarati acuaré dutyara tupu inime tupu ishu. Tuequedyatu chamacama Pedro netitsuracuaré quisarati ishu:

—Ique amena beru Yusuja emepeque israelita ama cuanaque Yusu queja judiru ishuque quisarati cueja jucuaréque. Micuanaratu adebayadya riyaque. Turatu Jesúsja quisarati bacamerecara aya. Tura tuna Jesús queja catyatishacara aya.

8 Yusuratu dutyaja inime tupu adebaya. Israelita ama cuana queja tujatu tuja Espíritu cuitadya cuadishahua, ecuaña queja cuadishahua bucha. Jadya bameree tujatu ahua tuna dyadi Jesús queja catyati ishu.

9 Yusuratu dutya tupu baya, israelita cuana, israelita ama cuana tsehue. Tuna Jesús queja catyatiyaju tujatu ecana ecuanaja jucha cuana tillahua bae tillaedy aya.

10 Yusura tujaque amerehua tibu ¿eje bucha juatsu jatsu tuque micuanara tura ahuaque yuamaturacara aya? Ecuanaña baba cuanaratu eje bucha ataqui ama bahua dutya cacuatsashati cuana ehuené eqe juishu. Iyacuatu ecuanara eje bucha ataqui ama neridya baya dutya cacuatsashati eqe. Tume jatsu tuque micuana ¿eje bucha juatsu israelita ama cuanaquetu



dutya cacuatsashati eque anitaqui jadya aya, ecuana israelita cuanaradya eje bucha ataqui ama bayaque? Riyaque tu micuanara cuitadya ai dyaque bicuedaque abumereya buchique.

<sup>11</sup> Yusura ecuana tsujema inajacamere aya Ecuana Cuatsashaqui queja catyatitsu eque, ecuana israelita cuana, tumbaedy a israelita ama cuanaque, —jadya tuna Pedrora cuejacuare.

<sup>12</sup> Tume tuna dutya abacatanacuare. Tuequedy-atu Pablo, Bernabé ecatsera casitatihua cuanaque isaracuare:

—Yusura yatse cuadishahua Yusu queja judiru ishunque quisarati israelita ama cuanaque cueja ishu. Yatse equetu casa cabameretihua israelita ama cuana ducu, —jadya tatsejatu ecana acuare.

<sup>13</sup> Santiagoratu tatse tsehue tupupee inime acuare. Tatse tsehue quisarati amena juatsu tujatu tuhua cuanaque isaratibunecuare:

—Tata ecana, nebacacue ique.

<sup>14</sup> Bacahuadya micuanara Simón Pedrora cuejahuque. Butseejupa Yusu cabameretichine tuja jidaque israelita ama cuana queja. Cuejahua tura ecuana, israelita ama cuanaquepa amena Yusuja jutaqui, Jesús queja catyatiya cuanaque.

<sup>15</sup> Jadyatu Yusura ahua, béru tuque eque quisarati cuejaqui cuanara jadya tujatu adadiya jadya acuareque. Ehuenedya tu Yusuja quisarati:

<sup>16</sup> “Ique Yusu.

Junanucabuque ique micuana queja.

Arepa David eque ejuracana cuanara jacacuare ama bucha tuna eaqueja nimee amerencabuque.

Camuimeretinuabuque ique.

Ecue inime eque tuna anishanucabuque.

Etare erihuitereque era yudijidya nityatsuranuca aya buchatu jubuque.

<sup>17</sup> Jadya tuna abuque dutya queja cuanaque eaqueja catyati ishu, israelita ama cuanaque eaqueja catyati ishu.

Dutya israelita ama cuanaque era ihuarahuaquetu ecuique jubuque.

<sup>18</sup> Ique Micuana Cuatsashaquique juya tibu, riyaque micuana bahue amerehua.

Béru yuequedya rique ecue inime jadicque ejitaju ahua”,

jadyatu Yusura quisarati iyahua tuja quisarati cuejaqui cuana eque.

<sup>19</sup> Santiagora jadya cuejanucacuare:

—Ecue inime tupu tu riyá cuanaque. Israelita ama cuanaque tuna Jesús queja catyatihua. Beruque quejeneti cuana tunajatu amena iyahua. Tupupe tupupe ecana inime netupumerera ama. Casada tsehue ecana Moisésja cacuatsashati eque anishacara neara ama.

<sup>20</sup> Quirica eque ecana jadya juishuque cuita camadya necuejara: “Nearaume erami yusu cueya cueya cuanaja yacuaju iyahuaque. Micuanaja caquemitiqeremaque nejaraquereume. Nearaume erami cuanubi, uu jadya pana sucucurusha ami amaque. Nejjiume ami”. Riyaque cuita camadya ecana necuejara.

<sup>21</sup> Béru yuequedyatu canajara huecaca cuanaju Moisésja cacuatsashati cuana isaratanahua caradati ishuque etare cuanaju. Dutya epu cuanajutu aniya ejeque tumeque cacuatsashati bahuitya

juya cuanaque. Jutaquiiju israelita cuana ec-  
ahuaishau tibu, israelita ama cuanajatu ataqwi  
riya era cuejahua cuanaque, —jadya tuna Santi-  
agora cuejacuare.

*Israelita ama cuanaja Jesús queja ecatyati cua-  
naja quirica cuadishatanacuareque*

<sup>22</sup> Jesúsja ecuadisha cuanara, emuiba cuanara  
jadya tunajatu jida bacuare Santiagora  
cuejahuaque, tumbaedyá Jesús queja dutya  
umae ecatyati cuanara. Tumetu enaruqui  
cuanara huenequere quirica Antioquiaju Jesús  
queja ecatyati cuanaja ishú. Mepecuare tunajatu  
Judas, Silas jadya quirica duju ishú. Betadya tatse  
ecuita dyaque inime metseque ecatsé jucuaré.  
Judasjatu peya ebacani anicuare “Barsabás”.  
Tatse tunajatu cuadishacuare Pablo, Bernabé  
jadya tajira tuhuaque dirunucayaju.

<sup>23</sup> Tuna tsehue tunajatu quirica cuadishacuare.  
Jadya tunajatu huenequere:

“Ecuánara ríque micuanaja ríyaque quir-  
ica cuadishaya, ecuana Ecuadisha cuanara,  
Jesús queja ecatyati cuanaque naruqui cuanara,  
tumbaedyá dutya tuaqueja ecatyati juhua cua-  
nara jadya. Isamereya micuana ecuanara  
israelita ama cuanaque ecuana tsehuequi cua-  
naque. Micuana Antioquiaju, Siriaju, Ciliciaju  
cuanaque micuana ecuanara isamereya.

<sup>24</sup> Riya cuitari ejeque cuana cuachine  
micuana queja. Ecuánara cuatsashayaju ama  
rena cuachine. Tupupe tupupe tunara micuana  
inime amerechine. Adebataqui ama tuque  
micuana bachine tunara cuejachineque. ‘Yusu

queja judirucara juatsu micuana ecuita huitu biti catubumeretitaqui israelita cuana bucha. Moisésja cacuatsashati eque cuita micuana anitaquidya' jadya tunara micuana cuejatichine.

<sup>25</sup> Jadya bahue juatsu ecuana casitatichine riyaque inime bajeje ishu, dutyaja tupu ecuanaja inime juishu. Amena tuque ecuana beta ecuita mepeya micuana queja cuadisha ishu. Pablo, Bernabé ecatsé tsehue tatse cuaya. Ecuanaja iyuhueda ecatsé tsehue tatse cuaya, ecuana tsehuequi ecatsé tsehue.

<sup>26</sup> Umada cuautu Bernabé, Pablo jucuare tuhua eiyetauju, muda aniyaju, Ecuana Cuatsashaqui Jesucristoja quisarati cuejara.

<sup>27</sup> Cuadishaya tuque ecuanara ecatsé Judas, Silas jadya. Tatsera micuana pana cueja atiya dutya ecuanara inime tupuchine cuanaque, rehua quiricaju ecuanara huenehuaque.

<sup>28</sup> Ecuana ni Yusuja Espiritura micuana amerecarama aya dyaque ibeda cuitaque. Micuanajatu ataquí riyá cuanaque cuita camadya:

<sup>29</sup> Nearaume erami yusu cueya cueya cuanaja yacuaju iyahuaque. Neijiume ami. Nearaume erami cuanubi, uu jadya pana sucururusha ami amaque. Micuanaja caquemitiqueremaque nejaraquereume. Jadya camadya micuana ecuanara cuejaya. Riya cuanaque cacuatsashati eque ni micuana aniya, tume micuana jida juya. Dutya micuanaja jida pajuaje. Riya tupu camadya".

Jadya Jerusalénju Jesús queja ecatyati cuanaque naruqui cuanara quirica huenequare israelita ama cuanaja ishu.

<sup>30</sup> Cuadishatahua cuanaratu quirica

Antioquiaju dujucuaire. Tuhua junatitsu tunajatu radacuare Jesús queja dutya ecatyati cuanaque. Tyacuare tuna quirica.

<sup>31</sup> Jesús queja ecatyati cuanaque naruqui cuanaratu etsuri jebuda tsehue isaracuare dutyaja baca ishu. Jadya bacatsutu dutya dyaque pureama jucuaire. Dyaquepa tuna cacasaticuare Jerusalénju cuanara cuejahua cabatitsu.

<sup>32</sup> Judas, Silas jadya tatse Yusu equeque cuitadya quisarati cuejaquiquedya jucuaire. Tatsera Jesúsja quisarati cuejahuajutu Jesús queja ecatyati cuanaque cacasaticuare. Tatsera tuna nime casaturacuare.

<sup>33</sup> Tuhua tatse aniticuare eje uma huecaca cuana. Jadya juatsu tatse Jesús queja ecatyati cuanara isarayaque jadya acuare:

—Yusura nenarucue metse diruyaju, —jadya tunajatu ecatsé acuare.

Tatse cuadishaqui cuana queja judirunuca ishu tatse yudijidya judirunuca jucuaire.

<sup>34</sup> Silastu anicara datse jucuaire.

<sup>35</sup> Pablo, Bernabé jadya tatse anicuare jari Antioquiaju. Tatsera tuna cuejacuare jari quisarati Ecuana Cuatsashaquique eje buchique. Peya cuana tsehue bahuityapeedya tatsejatu acuare tuja quisarati.

*Pablo, Bernabé tsehue cajacaticuareque*

<sup>36</sup> Eje uma huecaca junucatsutu Pablora jadya acuare Bernabé:

—Necuanuca Jesús queja catyaticuare cuanaque casaturara icuene yatse epu cuanaju junenicuare cuanaju. Bahue jucara juya tuna

tuaqueja nimeedya jari eje buchique, –jadya tujatu acuare.

<sup>37</sup> Bernaberatu dujucara ebari datse acuare Juan Marcos.

<sup>38</sup> Pablora bacue dujucarama acuare.

–Aijama, cuataqui amatu yatse tsehue. Icuene tura yatse jacacuare Panfiliaju. Merenucacarama tujatu Yusu acuare, –jadyatu Pablora Bernabé acuare.

<sup>39</sup> Arepa tatse cuinetse cuitadya dyaque quisaraticuare ama buchatu eje bucha bajejetaqui ama inime jucuare. Jadya tibudya tatse cajacaticuare. Bernaberatu dujucuare Marcos. Ebuteju junatitsu tatse anibutenaticuare cuaba ebariju. Cuacuare tatse Chipreju.

*Cuabeta ishu Pablo Jesúsja quisarati cuejara cuanucacuareque*

<sup>40</sup> Pabloratu Silas mepecuare tuja etajiqui juishu. Tatse cuama jarijutu Jesús queja ecatyati cuanaque Antioquiaju cuanaque Yusu tsehue quisaraticuare tatseja ishu:

–Tata, narucue micue iyuhue tsehue micue mere puji ecatsé, –jadya tunajatu Yusu bacacuare.

Yusu tsehue quisarati amena juatsu tatse cuacuare Pablo, Silas jadya.

<sup>41</sup> Cueticuare tatse Siria, Cilicia jadya eque. Casaturaajecuare tatse Jesús queja ecatyati cuanaque.

## 16

<sup>1</sup> Pablo, Silas jadya tatse yudijidya judirunuca jucuare Derbe, Listra jadyaju. Listrajutu anicuare

Jesús queja ecatyatique Timoteo bacani. Tuja ecuaquetu israelita jucuare, Jesús queja ecatyatiquedya. Tuja etataque bacue israelita ama jucuare, griego.

<sup>2</sup> Listraju, Iconioju cuanaque Jesús queja ecatyati cuanaratu jida quisarati acuare Timoteoja ishu.

<sup>3</sup> Pabloratu Timoteo tuque tajiQUI datse dujucara acuare. Jadya ama buchatu Timoteo ecuita huitu biti catubumeretima jucuare, tuja etataque israelita ama jucuare tibu. Tumetu tuna tsehue cuama jarijudya Pablora tubumerecuare israelita cuanaja bahue. Jadya tujatu amerecuare, tuna cuayaque epuju jetiama israelita cuana anicuaré tibu. Tume cuanaratu pana adeba acuare Timoteo griego jabacuaque.

<sup>4</sup> Jadya juatsutu Pablo, Silas, Timoteo jadya Listraju jetiama epu cuana eque cuetiajecuare. Isaracuare tunajatu quirica Jerusalén eque cuadishayaque ecatyati cuanaja huaraji cuana, emuiba cuanaque patya netitsu.

<sup>5</sup> Tumetu Jesús queja ecatyati cuanaque cabahuityatiajecuaredya jutidya Yusu pureamatura. Umanaajecuaredya jutidyatu Jesús queja ecatyati cuanaque.

*Pablora Macedonia juque ecuita tahuiju bucha bacuareque*

<sup>6</sup> Yusuja Espirituratu Pablo, Silas, Timoteo jadya cuejamerecarama acuare quisarati Asia yahuaju. Jadya tibu tuna cuacuare Frigia, Galacia jadyaju camadya.

<sup>7</sup> Junaticuare tuna Misia yahua jiruru. Bitinia yahuaaju tuna cuacara datse jucuare. Jadya ama bucha tuna Jesúsja Espiritura tuhua cuejamerecarama acuare.

<sup>8</sup> Tume tuna tuyu cueti Misia eque jucuare. Junaticuare ecana ebute Troas bacaniju epuju.

<sup>9</sup> Tuhuatú Pablora tahuiju bucha bacuare ecuita netiyaju. Tumequetu jecuare Macedonia juque.

—Carequetique Macedoniaju. Tsahuaticue ecuana, —jadya tujatu Pablo acuare tahuiju.

<sup>10</sup> Tume patya ique Lucas tuhuadya jucuare Pablo tsehue Troasju. Yume cabajejetidya ecuana jucuare Macedoniaju cuaishu, Pablo jadya tahui juhuaju. Pana caadebati ecuana jucuare Yusura cuitadya ecuana tuhua cuadishayaque jidaque quisarati Jesús eje buchique cueja ishu.

### *Lidia Jesús queja catyaticuareque*

<sup>11</sup> Cuinanacuare ecuana Troas juque cuaba ebari eque. Tume tuyu cuau ecuana jucuare ecububu ebari Samotracia bacaniju. Peya huecaca ecuana judirucuare Neápolis epuju.

<sup>12</sup> Tuequedya ecuana Filiposju cuacuare. Tuhuatú anicuare jetiama ecuita cuana epu ebari Roma juque ejueti cuanaque. Filipos tu epu dyaque aridaque jucuare Macedonia yahuaaju. Tuhua ecuana tsunuda huecaca ama netinaticuare.

<sup>13</sup> Canajara huecacaju ecuana cuacuare cueri jiruru queja israelita cuana Yusu tsehue quisarati bahueju. Tuhua ecuana tuna tsehue caradaticuare. Eje uma epuna cuanatu tuhua ecaradati jucuare. Cuejacuare ecana ecuanara jidaque quisarati Jesús eje buchique.



<sup>14</sup> Tuhuatu anicuare epuna Lidia bacani. Tuquetu jucuare Tiatiraju aniyaque. Tumeque epunatu ejutuqui sehuesahuau tsuje aridaque catyati puji jucuare. Yusu muiquitu jucuare. Quisarati bahuetu jucuare Yusu tsehue. Bacacuare tujatu jida inime tsehue Pablora cuejayaque, Yusura pana bacamere aya tibu. Pana baca aatsutu Jesús queja catyaticuare.

<sup>15</sup> Cutsamereticuare tuque, Jesús queja catyatihua jadique ejitaju juishu. Tumbaedyu tuja etareju cuanaque cutsamereticuarenya. Jadya juatsu tura ecuana amena bacacuare:

—Micuanara ni ique Ecuana Cuatsashaqui queja ecatyatique ejeneya, nenubicue rehua ecue etareju, —jadya tura ecuana acuare.

Tura jadya ahuaju ecuana tuja etareju anibacacuare Filiposju anibacacuare jari tupu.

*Pablo, Silas tsehue Filiposju etare apudaju ishatanacuareque*

<sup>16</sup> Ecuana Filiposju jarira tuque ecuana epuna ehue ebari ijahua cuanara quijahuatishayaque banaticuare. Ecuaita cuana Yusu tsehue quisarati bahueju cuayara tuque ecuana banaticuare. Tumeque ijahuaja casa equetu tuja casa anicuare eje bucha judadiyaque cueja ishu. Tura chipiru inayaquetu tuque metse cuanaja ishu jucuare, tuque metsequique jucuare tibu.

<sup>17</sup> Tumeque epuna ehue ebarira ecuana tupujudya aajecuare. Quiqueajecualetu ecuana tupuju:

—Riyaque ecuita cuana rena Yusu merequi cuanaque. Yusu barepaju aniyaque renajari mereya.

Ecuana Yusu queja eje bucha judirue juishuque quisarati cuejaqui cuana rena, —jadyatu epuna ehue ebari jebuda quiueajecuare.

<sup>18</sup> Jadyatu tumeque epuna dutya huecacadya jutidya jucuare. Amenatu Pablo ecahuaiti jipenee cuita jucuare. Jadya bacahuillatsu tujatu tibene bajiyu acuare epuna ehue ebari. Tume tujatu ijahua acuare:

—Jesúsja ebacaniju mique jadya aya. Tumeque epuna quejaque cuinanacue; jacacue tumeque epuna.

Pablora jadya cuinanashayajutu ijahuara pana jaca acuare.

<sup>19</sup> Tumeque epuna ijahuara jacahua baatsutu epuna ehue ebari metse cuanaque dyaque cahuaiticuare Pablo, Silas jadya tsehue.

—Amena tujatu cuejanime ama eje bucha judadiyaque, tumeque ijahuara jacahua tibu. Amena tujatu chipiru inajacahua ecuanaja ishu, —jadya tunajatu inime tupucuare.

Jadya juhuaju tunajatu Pablo, Silas ecatse inamerecuare. Inameretsu tunajatu ecatse dujumerecuare ecuita cuana tarepe jubahueju huaraji cuana queja.

<sup>20</sup> Inime bajeje puji cuana queja tunajatu bamereticuare.

—Riyaque ecuita ecatse ri israelita ecatse. Ret-serari bape bape inime tupumereya ecuanaja epuju cuanaque.

<sup>21</sup> Tatsera ecuana bahuityacara aya tatseja bahuequedya jutidya. Tuyu ama tu ecuana peya yahuaju cuanaja bahue eque juishu. Tatsera amereya eque ecuana jutaqui ama, ecuana

ecuada Roma juque enaruquira cuatsashaya equa camadya juya, —jadya tunajatu ecaña acua.

<sup>22</sup> Tume tuna dutya tuhua jucaua cuanaque dyaque cahuaicuare Pablo, Silas jadya tshue. Tume tatse huaraji cuanara tacamerecuare tattera jutuyaque. Tacameretsu tunajatu ecatsa catsa amerecuare acui tshue.

<sup>23</sup> Catsa amena au jadya aatsu tunajatu ecatsa ishamecuare etare apudaju.

—Pana naru bacue ecatsa neacue ecuinanaju, —jadya tunajatu etare apuda naruquique cuatsashacuare.

<sup>24</sup> Jadya bacatsu tujatu ecatsa nudyaacuare yuqueja educuju cuita. Tume tujatu ecatsa pana calla cuita ehuachi ecatsa acua cepaju, tatse ehuanaju.

<sup>25</sup> Metapatyatu Pablo, Silas ecatsa Yusu tshue quisaraticua. Jerucaua ecatsa jida pureama tshue Yusuja ish. Tume peya cuana etare apudaju netiya cuanara tatse bacacuare jeruyaju.

<sup>26</sup> Tatse jadya juyajutu muya jutidya yahua bucucucua. Dutya etare apudaquetu bucucucua dudu cuana, esipi cuanaque jadya. Pacashatanacuare dutya eteriqui cuana. Eisha cuanaque risiqui ea cuanaquetu pana tibitanatere jucaua.

<sup>27</sup> Jadya juyajutu etare apuda naruquique cabaticua. Cabatitsu tujatu bacua eteriqui cuana epacashatanatere. Jadya baatsu tujatu inacuare tuja cuchiru cuerudaque tuta taca quiyeti juish. Quiyeticaratu jucaua, etare apudaju eisha cuanaque huanaterehua bucha baatsu.

28 Amena quiyeticara cuita juyajutu Pablo jebuda quiquecuare:

—¡Quiyetiume! Riyadya ecuana dutyadya. Ni ejeque buchique ecuana huanahua ama, —jadya tujatu acuare.

29 Tumetu etare apuda naruquira ude bacacuare. Ude tyahuajutu ude inatsu nubiticuare. Tsajaja nubititu jucuare Pablo, Silas jadya queja. Tadadaya jadyatu jucuare bajida juatsu. Nuyucualetu tatseja yacuaju.

30 Jadya juatsu tujatu ecitse dujucuare etare apuda juque. Tuja etarejudya tujatu ecitse dujucuare.

—Tata ecitse, ¿eje bucha ejuu Yusu queja judiru ishu? —jadya tujatu ecitse bacaduracuare.

31 —Yusu queja judiru ishu Ecuana Cuatsashaqui Jesús queja catyaticue dutya micue etareju aniya cuana tsehue, —jadya tatsejatu cuejacuare.

32 Cuejacuare tatsejatu tumeque ecuita Jesúsja quisarati, tumbaedyu tuja etareju aniya cuanaque jadya.

33 Arepa metapatya juya ama bucha tatse etare apuda naruquira cuinanaqueretsu utsacuare acui tsehue catsacatsa ayaque pucucushahua cuanaque. Tuhua dutya tuja etareju aniya cuana tsehuetu cutsamereticuare, Jesús queja catyatihuaque jadicue ejitaju juishu.

34 Jadya juatsu tujatu ecitse nubiquerenucacuare Pablo, Silas jadya tuja etareju, tatse mihua ishu. Tuja etareju cuana tsehuetu pureama jucuare, Jesús queja catyatihua cabatitsu.

<sup>35</sup> Huecacatsu apudajudya cuitatu huaraji cuanara cuadishacuare sudaru cuana etare apuda naruqui queja.

—Inajacacue jeeque beta ecuita ecitse. Cuinanashacue ecitse etare apuda juque, —jadya tunajatu ecana cuejamerecuare.

<sup>36</sup> Sudaru cuanaratu cuejaticuare etare apuda naruquique huaraji cuanara cuejamerehuaque. Jadya cuejamerehuaju tujatu Pablo, Silas jadya cuejaticuare:

—Huaraji cuanara cuadishahua metse inajacamere ishu. Necuinanacue amena. Yusura nenarucue metse eju judiruyaju, —jadya tujatu ecitse aticuare.

<sup>37</sup> Pablotu etehua inajacatacarama jucuar. Tume tujatu sudaru cuana cuejacuare:

—Jida yatse nebacue. Romaju cuanaque ebau bucha bae yatse neaacue, quirica yatseja tuhuaque enaruquiya ehuenegue aniya tibu. Roma juque enaruquira cuatsashaya equedya yatse juya. Dutyara petayaju yatse catsacatsa atanachine. Tunara yatse inime cuana bajejequi cuanaja yacuaju quicueneti ishu emajaca tyachine ama. Yuneridya ni yatse inime metse, inime metse ama jadique baecuaque tunara yatse etare apudaju ishamerechine. Iyacu tunara yatse etehua inajacamere acara aya. ¡Jadya tuna jutaqui ama! Huaraji cuitadyatu jetaqui yatse dutyaja yatucaju inajacana ishu, —jadyatu Pablora sudaru cuana atsacuare.

<sup>38</sup> Jadya atsayajutu sudaru cuana masadama yudijidya dirunuca jucuar huaraji cuana queja.

Cuejadirucuaire tunajatu ecana Pablora quisarati ahuaque.

—Tumeque ecuita ecitseja patu aniya quirica cuana enaruqui Roma juque ebacani equiyatique. Tura cuatsashaya equedyapa tatse juya, —jadya tunajatu ecana cuejadirucuaire.

Huaraji cuanatu dyaque bajida jucuaire, tatseja quirica cuana enaruqui dyaque aridaque Roma-juja ebacani ehuenegue aniya jadya bacatsu.

<sup>39</sup> Tume tuna cuacuare etare apudaju. Canerecatiticuaire tuna Pablo, Silas ecitse queja tatseja ecana nerecaba ishu:

—Nenerecabacue ecuana. Ecuana jucha metse jadya neaume, —jadya tunajatu ecitse aticuaire.

Cuinanashaticuaire tunajatu ecitse etare apuda juque.

—Necuinanacue riyaque epu ebari juque, —jadya tunajatu ecitse acuare.

<sup>40</sup> Etare apuda juque cuinanatsu tatse cuacuare Lidiaja etareju. Tuhua tatse quisaratiticuaire Jesús queja ecatyati cuana tsehue. Casaturaticuaire tatsejatu ecana. Tuna casaturadiru jadya juatsu tatse dirucuaire epu juque.

## 17

### *Pablo, Silas tsehue Tesalonicaju cuacuareque*

<sup>1</sup> Filipos juque cuinanatsutu Pablo, Silas ecitse cuacuare Anfipolisju, tuequedya Apoloniaju. Tuequedya ecitse judirucuaire Tesalonicaju. Tuhuatu anicuaire israelita cuanaja caradati ishunque etare.

<sup>2</sup> Dutya canajara huecacaju tatse cuau cuau jucuaire. Quimisha canajara huecacajutu Pablora

ecuita cuana Yusuja quisarati ehuenequé bahuityacuare.

<sup>3</sup> Cuejacuaretu ecana Yusuja quisarati Mesías eje buchique ehuenequé:

—Beru yuequedyatu Yusu equeque quisarati cuejaqui cuanara huenequere Mesías canerecatidadibuqueque. “Majudadiya tuque. Majutsutu chacha netitsuranucabuque”, jadya tuna jucuaré. Jadyatu judadicuaré Jesús Nazaret juque tunara icueneta huene acuare bae cuitadya. Tudyá micuana era cuejaya. Tumeque Jesúsdyá tu Mesías, Yusuja Emepeque, —jadya tujatu ecana acuare.

<sup>4</sup> Jadya ayaju bacatsutu umaé israelita cuana Jesús queja catyaticuaré. Tuaequeja catyatitsu tuna Pablo, Silas ecátse tsehue junenicuaré. Tsahuatsahuanicuaré tunajatu ecátse. Tumebaedyá ecana catyaticuaré Jesús queja umada griego cuana Yusu Neri muiqui cuanaque. Tumebaedyá umada epuna cuana inime metse cuanaque tuna Jesús queja catyaticuaré.

<sup>5</sup> Israelita cuana tuaqueja catyatiya ama cuanaque tuna dyaque cahuaicuaré Pablo ecátse tsehue. Cahuaicuaré tuna, umada tunaja ata cuana Jesús queja catyatihua baatsu. Sitacuare tuna jidama, dyai usi cuanaque ni aishu bucha jida ama cuanaque. Casitatishatsu tuna jidama quisaratishacuare Pablo, Silas eatseja ishú, tuna tumebaedyá tatse tsehue cahuaiti ishú. Sica-caturacuare tuna ecuita cuana. Dudyá jujeri tumeque epuju aniya cuanaque tuna tatse tsehue cahuaitishacuare. Jasónja etareju tuna Pablo,

Silas ecatse sareticuare, tatse cuinanasha ishu. Inacara tunajatu ecatse acuare ecuita cuanaja yacuaju duju jidama amere jadya aishu.

<sup>6</sup> Dadicuaré ama tunajatu ecatse tuhua. Tume tunajatu inacuare Jasón. Tumebaedya tuna inacuare peya cuana Jesús queja ecatyati cuanaque tuhua jucuaré cuanaque. Inatsu tunajatu huaraji cuanaja yacuaju dujucuaré. Quiquecuare ecana:

—¡Pablo, Silas ecatse tu ecuita cuana yuamaturaque! Epu cuana tupu tatse juneniya dutya queja cuanaque yuamatura juyaque. Iyacia retse ecuanaja epuju tumebaedya junachine.

<sup>7</sup> Jasónra tatse tuja etareju nudyatsachine. Tatse tatse Roma juque enaruqira cuatsashaya eque ama juya. César patu ecuatsashaquique neri ama. Peya patu aniya, Jesús bacani, jadya tatse juya, —jadya tunajatu epu juque huaraji cuana acuare.

<sup>8</sup> Jadya bacatsutu ecuita cuanara, huaraji cuanara dyaque jidama inime bacuaré. Dyaque ecahuaiti tuna jucuaré.

<sup>9</sup> Jasón queja, peya cuana queja jadya tuna chipiru catyamereticuaré.

—Necuinanashacue Pablo, Silas jadya ecuanaja epu juque. Tatse cuinanahuaju piisi micuana ecuanara micuanaja chipiru tyanucaya, —jadya tunajatu ecana acuare.

Jasónra, peya cuanara jadya chipiru tsehue tsujetyahuaju tunajatu ecana inajacacuaré.

*Pablo, Silas jadya Bereaju cuacuareque*

<sup>10</sup> Huaraji cuana Pablo, Silas jadya tsehue dyaque ecahuaiti baatsu tunajatu ecatse masadama tumeque chineju cuitadya Jesús queja



ecatyati cuanara epu juque huanashacuare. Betadya tatse yume diru jucuaré Berea queja amaca. Tuhua judirutsu tatse cuacuare israelita cuanaja caradati ishuque etareju.

<sup>11</sup> Tuhua cuanaquetu Pablora Jesúsja quisarati bahuityacuare. Bereaju cuanaque tuna Tesalónicaju cuanaque bae ama jucuaré. Bacacarama ama tunajatu Pablora bahuityayaque acuare. Bacacara ebaridya jutidya tuna acuare. Dutya huecaca tuna isaracuare Yusuja quisarati, eje yuneriú ri Pablo, Silas jadya quisaratiya jadique adeba ishu.

<sup>12</sup> Yusuja quisarati isaratsu, Pablora cuejayaque bacatsu tuna jetiama israelita cuana Jesús queja catyaticuare. Tumbaedyá griego cuana umada catyaticuare tuaqueja. Epuna inime metse cuanaque, deca griego cuana jadya tuna jadya jucuaré.

<sup>13</sup> Israelita cuana Tesalónicaju aniya cuanaratu bacacuare Pablo Bereaju Jesúsja quisarati cueja juyaque. Tume bahue juatsu tuna tuhua cuacuare. Junatitsu tunajatu ecana capuritishanaticuare.

<sup>14</sup> Jesús queja ecatyati cuanaratu Pablo masadama tsahuacuare tuhuaque cuinana ishu. Ena jiruru queja tunajatu dujucuaré. Silas, Timoteo ecatsé Pablo tsehue dirupeé ama jucuaré. Bereaju tatse anicuare jari.

<sup>15</sup> Tuque huanayaju tsahuaqui jucuaré cuanaratu Pablo Atenasju dujucuaré. Tuna Atenas juque cuinanama jariju,

—Necuejacue Silas, Timoteo ebajarara ecatsé paju. Pacatsuruti ecuana Atenasju, —jadya tuna

Pablora cuejamerecuare.

Riyaque quisarati tatse cuejamereyaque cuejahuaju tuna dirunucacuare.

*Pablora Jesúsja quisarati cuejacuareque*

<sup>16</sup> Pablotu Silas, Timoteo jadya Atenasju ihua jucuare. Atenas epu ebariju dutyajupa tunajatu umada cueya cueya cuana neticuare. Jadya baatsutu Pablo dyaque capeya inimeticuare, ecuita cuanara peadyaque Yusu Neri ama muiya baatsu.

<sup>17</sup> Dutya huecacatu tumeque epu ebariju cuana tsehue quisaraticuare. Caradati ishucue etare cuanajutu quisaraticuare israelita cuana tsehue, tumbaedy a israelita ama cuana Yusu Neri muiqui cuana tsehue. Dutya huecaca quisaraticuare ecuita cuana tarepe bahueju tura tuhua tsuruya cuana tsehue.

<sup>18</sup> Anicualetu umae dyaque iyuca jararada cuanaque. Epicúreo cuana, estoico cuana jadya tunajatu ebanani jucuare. Pablo tsehue tuna caquemitsatijacama jucuare. Tumeque iyuca jararada cuanaque tuna quisaraticuare tuna cama Pablo eje buchique:

—¿Ai quisaratitu aya tume bahuepa ejuu jadyara? Tuquetu adebayaque ama quisaratiya, —jadyatu umae jucuare.

—Quisarati bahue jiu taa tuque. Peya Yusu ecuanara adebayaque ama cuejacara aya bucha cuita tuque, —jadyatu peya cuana jucuare.

Jadya tuna jucuare, Pablora Jesús eje buchique quisarati ayajudya jutidya bacatsu. “Riyaque Jesússtu emajuque chacha netitsuranucacuare”, jadique quisaratitu tura ajacacuare ama.

<sup>19</sup> Tumetu Pablo bahue cuanara dujucuaré tuna eje bucha inime iyacua cuanaque quisarati ishucasitati bahueju. Tumequedyatu Areópago bacani jucuaré. Tuhua tunajatu bacaduracuare:

—¿Ai tu tumeque mira iyacuaque bahuityayaque? Cuejacue ecuana.

<sup>20</sup> Mira bahuityayaque tu bape iyacuaque. Ecuanaajatu bacama neri mira cuejayaque. Pana cueja ecuana acue tumeque quisarati eje buchique jadya, —jadya tunajatu acuare.

<sup>21</sup> Atenasju anicuare cuanaratu bacacaradya jutidya acuare ejeque iyacuaque bahuityayaque. Tumebaedya peya yahuaju cuanara tuhuaque junaya cuanara bacacaradya jutidya tunajatu ai iyacuaque acuare. Dutya jujeri tuna ai iyacuaque cueja bahuitya jadya camadya jucuaré. Jetiama ecuitatu tuhua Areopagoju jucuaré, dyaque bahue cuanaque camadya ama, tumebaedya dutya tumeque epu ebariju cuanaque.

<sup>22</sup> Tumetu Pablo netitsuracuare tunaja yacuaju Areopagoju tuna isara ishuc:

—Tata ecana Atenasju cuanaque, isaraya micuana era. Nebacacue ique. Dyaque cuita cueya cueya ea cuanaque micuanaja epu ebariju baatsu, bahue ique micuanara dyaque yusu cuanaju inime tupuqui ayaque.

<sup>23</sup> Ique cueya cueya cuana petapetani juhua. Bahua tuque micuanara eju muiyaju. Bajiyutsu tuque bahua peadya tumu ebari riyaque quisarati ehuenecue: “Riyaque ri ecuanara Yusu adebayaque ama mui ishucue”. Yuneridyatu aniya peadya Yusu micuanara adebayaque ama, Yusu

Neri. Riyaque Yusu micuanara adebayaque ama muiyaquedya micuana cuejacara aya.

<sup>24</sup> Tumeque Yusuratu iyacuare riyaque yahua, dutya rehua aniya cuanaque jadya. Tuquetu barepa, yahua jadya metseque. Tuquetu aijama ama ni ejeque etare caca ecuitaja eaju.

<sup>25</sup> Ecuana ni tu eje bucha tsahuae ama tuque. Turatu ni ai buchique sareya ama. Dutyatu tujá aniya. Tura cuitadya ecuana anishaya. Tura cuitadya ecuana ujejedama, jida jadya amereya. Tura ecuana tyaya dutya ai ecuanara sareya cuanaque.

<sup>26</sup> Turatu iyametse ahua icueneque deca, icueneque epuna. Dutya quejatu anibareya Yusura icueneque ecuita iyahua equé ejuracana cuanaque. Turatu iyabarehua emajaca peadya peadya cuareja ishú, peya cuana peya quejaque, peya cuana bacue peya quejaque jadya. Turatu iyabarehua ejeque badi, huecaca emajaca eju ecuana cuinanayaju cuinana ishú.

<sup>27</sup> Tura ecuana iyahua dutya ecuana, ecuanaja tuque sare ishú, tuaqueja ecuana catyati ishú. Riyaque Yusu tuque ecuana japada ama baya. Yuneridya ni ecuana dadicara aya, dadiyadya tuque ecuanara.

<sup>28</sup> Chacha ecuana aniya, tura anishaya ademe. Ajeya, bucucuya jadya ecuana juya, peya queja peya queja, tura casa tyayaju. Tura ecuana casa tyaya dutya ecuanara ai acara ayaque aishu. “Dutyá ecuana Yusu jabacua cuana, tura ecuana iyahua tibu”, jadyatu umae micuanaja yahuaju cuanara huenecuare béru.

<sup>29</sup> Ecuana Yusu jabacua juya tibu, eje bucha

jueni tuque ecuanaja Etata juma oro eaque, tumu, acui ea cuanaque. Eje bucha jueni tuque ecuanaja Etata juma cueya cueya ecuita cuanaja eaque, tunajadya jutidya inime tuputsu eaque. Yusu tu aidyá jutidya ecuitaja ai ea tsehue beta tupu ama.

<sup>30</sup> Beru yuequedyatu Yusura inime tupuhua: “Adebaya ama jari tunara ique. Jadya tibu tuna jucha metse aya ama” jadya. Iyacuatu dutyaja emajaca aniya tuque adeba ishu. Jadya tujatu quisarati iyacuare: “Dutya ecana inime pacacuareti, cajuchatijaca ishu”, jadyatu Yusu juya. Jadya equetu Yusura dutya quejaque tu- aqueja nimee amerecara aya.

<sup>31</sup> Turatu iyahua huecaca dutya tuja yacuaju neticuina ishuque. Tumeque huecaca tura ecuana tuyu abuque ecuana peadya peadya eje bucha judadiyaque. Jadya tura ecuana adadiya tura casa iyahua eque. Jesucristo eque tujatu jadya adadibuque. Tumeque Jesús majuhujutu Yusura chacha nityatsuranucacuare. Jadya tujatu acuare, Jesússtu huaraji tuyuque jadique ejitaju amere ishu, —jadya tuna Pablora cuejacuare.

<sup>32</sup> “Tumeque Jesús majuhujutu Yusura chacha nityatsuranucacuare” jadya bacatsutu umaecuanara ejenecuare ama. Ijaribacuare jutidya tunaja tuque. Peya cuanara bacue dyaquedya jutidya bacacara acuare Pablora cuejacara ayaque.

—Peya huecaca ecuana cuejanucacue, —jadya tunajatu acuare.

<sup>33</sup> Tumetu Pablo tuna shanatsu Areópago juque dirucuare.

<sup>34</sup> Umaecuanaratu tupujudya acuare, tuja quisarati cuejayaque bacacara aatsu. Tunadya tuna

Jesús queja catyaticuare. Peadyatu Dionisio bacani jucuare. Tuquetu peya dyaque ecabahuityatiquedya jucuare. Aeropagoju tujatu ecana bahuityajacacuare ama. Peadya epuna Dámaris tu Jesús queja catyaticuaredya. Tumbaedy a umada peya cuana catyaticuare tuaqueja.

## 18

### *Pablo Corintioju cuacuareque*

<sup>1</sup> Jadya juatsutu Pablo dirucuare Atenas juque. Cuacuaretu epu ebari Corinto bacaniju.

<sup>2</sup> Tuhua tujatu tsurucuare israelita Aquila bacani, Pontoju ecuinanaque. Ehuaneque tujatu Priscila bacani jucuare. Icuenepa tatse Italia yahuaju anicuare Roma epu ebariju. Cuinanacuare tatse Roma juque, enaruqui Claudiora dutya israelita cuana pacuinana Roma juque jadya cuatsashahuaju. Butseeju Corintoju ejuetique tatse jucuare. Pablora tatse baeticuare.

<sup>3</sup> Aquilatu ebiti etare puji jucuare, Pablo jucuare baedy. Jadya tibutu Pablo anicuare tatse tsehue mere juishu.

<sup>4</sup> Dutya canajara huecacajutu Pablo cuacuare israelita cuanaja caradati ishunque etareju. Quisaraticuaretu israelita cuana tsehue, israelita ama cuana tsehue jadya. Adebamerecara tuna tura acuare Jesús Ecuana Inajacamerequique.

<sup>5</sup> Silas, Timoteo ecatsetu dirunucacuare Macedonia juque. Dirunucatsu tatse judirucuare Corintoju Pablo queja. Tatse judiruhujutu Pablo Jesúsja quisarati cueja cuita camadya jucuare. “Jesús tu Mesías. Tuquetu Yusuja Emepeque

micuanara ihuacuareque”, jadya tujatu israelita cuana cuejajacuare ama.

<sup>6</sup> Jadya cuejayaju bacatsutu jetiama israelita cuana dyaque cahuaicuare Pablo tsehue. Jidamaque quisarati tuna acuare. Tumbaedy a tuna Jesús ijillahuanacuare. Tume tuna Pablora jacacuare. Tuna jacayaque tujatu tura jutuyaque itataquenacuare, tuque ama inime metseque jadique.

–Judirubuque ama micuana Yusuja yacuaju, micuana Jesús queja catyaticarama juya tibu. Jesúsja quisarati micuana cuejaha. Jadya ama bucha micuana ejenecarama ahua. Jadya tibu micuana micuana cuitadya micuanaja juchaju inime metse, ique ama. Rियाque huecaca eque tuque cuejaya Yusu queja judiru ishuque quisarati israelita ama cuanaque, –jadya tuna Pablora cuejacuare.

<sup>7</sup> Jadya tuna cuejatsutu cuinanacuare caradati ishuque etare juque. Cuacualetu Ticio Justoja etareju. Tuja etaretu jucuaire caradati ishuque etare peque. Arepa tuque israelita ama jucuaire ama bucha, turatu Yusu Neri muicuare. Pablotu tuja etareju cuacuare Jesúsja quisarati cuejara.

<sup>8</sup> Crisporatu Pablora cuejayaju bacacuare. Bacatsutu Jesús queja catyaticuare. Rियाque Crispotu caradati ishuque etareju ecuat-sashaquique jucuaire. Tuja etareju cuanaque tumbaedy Jesús queja catyaticuare. Jetiama peya cuana Corintoju cuanaque tumbaedy catyaticuare Jesús queja, quisarati cuejayaju bacatsu. Tuaqueja catyatitsu ecana cutsamereticuare.

<sup>9</sup> Ecuana Cuatsashaquiquetu meta tahuiju Pablo queja cabamereticuare.

—Bajida juume, Pablo. Cuejajacaume ecana ecue quisarati. Abacatanaume.

<sup>10</sup> Ique miatsehuedya. Naruyadya mique era. Ni ejera buchiquemi jidama aya ama ni nerecaturaya. Era tuna jetiama riyaque epuju cuanaque eaqueja catyatishaya, mira cuejayaque bacatsu, —jadyatu Ecuana Cuatsashaquira cuejacuare Pablo.

<sup>11</sup> Tumetu Pablo Corintoju anicuaire peadya mara, peya patya patya tupu. Tuhua aniyaque tujatu ecana bahuityacuare Jesúsja quisarati.

<sup>12</sup> Tuequedyatu umae israelita cuana Pablo tsehue cahuaiticuare. Inacuare tunara. Inatsu tuna dujuacuare Galión queja. Galióntu Acaya yahua naruquique jucuaire.

<sup>13</sup> —Riyaque ecuitatu Moisésra cacuatsashati iyacuare eque ama aniya. Arepa Yusu ecuanaja muitaqui jadya juya ama bucha, tuyu amapa ecuana muiya, jadyatu juya, —jadya tunajatu Galión aticuare.

<sup>14</sup> Pablo quicueneti ishü equisaratisshauquetu Galiónra jutidya isaracuare israelita cuana:

—Tata ecana, nebacacue ique. Erari nereda aya ama riyaque ecuita. Tura ni Roma juque enaruquija cacuatsashati eje bucha aquena juhua, enerecaturau rique era. Tura ni ai dyaque jidama cuitaque aquena juhua, enerecaturaudya rique era, micuanara amerecara aya bucha.

<sup>15</sup> Riyakeri eje bucha juhua ama Romajuja cacuatsashati tsehue, micuana israelita cuanaja cacuatsashati tsehue camadya. Micuana micuana



cati cati jucara juya ebacani cuana tibu, quis-arati eje buchique jadya tibu. Eratu nerecatu-raya ama. Eratu riyaque inime bacarama aya. Tuque ni micuanaja cacuatsashati eque ama juya, jutaquiju taa micuanaradya nereda neacue. Eratu nerecaturaya ama, —jadyatu Galiónra acuare israelita cuana.

<sup>16</sup> Jadya aatsu tujatu ecana casada tsehue cuinanashacuare inime bajeje ishucue etare juque.

<sup>17</sup> Cuinanayajutu tuhua cuanara inacuare Sóstenes. Tumequetu caradati ishucue etareju ecuatsashaquique jucuaré. Miri miri tunajatu atibunecuare inime cuana bajeje ishucue etare tuyu. Galionratu icuenecuare cuana ama cuitadya.

*Pablo Antioquía queja amaca yudijidya dirunuca jucuaréque*

<sup>18</sup> Pablotu tsunuda aninucacuare jari Corintoju Jesús queja ecatyati cuana tsehue. Tuequedyatu tuna isaraquenatsu dirunucacuare Corinto juque. Priscila, Aquila jadya tatse tuatsehue dirucuaré. Jueticuare ecana ebute Cencrea bacaniyu. Cuahuietu Pablo iyuca tsaru pana cajeremereti jucuaré, “Aya tuque era jadya Yusu cuejachineque yana equedya juchineque” adeba ishucue. Cencrea juque tuna cuaba ebari eque dirunucacuare Siri-aju judiru ishucue.

<sup>19</sup> Siriaju diruyaque tuna jueticuaré Efesoju. Tuhua tujatu ecatsé shanacuare Aquila, Priscila

jadya. Pablotu cuacuare israelita cuanaja caradati ishunque etareju. Nubititsu tujatu tura tuhua jucuaque cuanaque Jesúsja quisarati cuejacuare.

<sup>20</sup> Efesoju cuanaque tuna tuaqueja canerecaticuare:

—Anicue jari rehua eje uma huecaca cuana ecuana tsehue.

—Aijama. Padirunuca jutidya ique.

<sup>21</sup> Jerusalénju chine ishú Jesúsja quisarati cuejara cuataquique ique. Yusuja inime jadya juyaque juatsu, juetinucaya rehua micuana queja yudijidya, —jadya tujatu ecana acuare.

Jadya tuna isaratsutu Pablo Efeso juque cuacuare cuaba ebari eque.

<sup>22</sup> Jueticuaretu Cesareaaju. Tuhua juetitsutu Pablo cuacuare Jerusalénju Jesús queja ecatyati cuanaque isarara. Tuequedyatu dirunucacuare Antioquiaju. Tuhuatu eje uma huecaca cuana aniticuare.

*Pablo cuaquimisha ishú Jesúsja quisarati cuejara cuanucacuareque*

<sup>23</sup> Tuequedyatu cuanucacuare Jesús queja ecatyati cuanaque casaturara nuca. Uhua equetu cuacuare Galacia, Frigia yahua juque epu cuana cuajira. Bahuityacuare tujatu ecana Jesúsja quisarati. Nime casaturacuairetu ecana Jesúsja inime eque anijaca ishú ama.

*Apolos Efesoju Yusuja quisarati cueja jucuaque*

<sup>24</sup> Tume patyatu israelita Apolos bacani jecuare Efesoju. Tuquetu Alejandría juque jucuaque.

Ecuíta dyaque jida quisarati bahuequetu jucuare. Jidatu adebacuare Yusuja quisarati ehuenegue.

<sup>25</sup> Tuja patu riya piji ebaca jucuare Ecuana Cuat-sashaqui Jesús eje buchique. Bahuedyatu jucuare Juan Ecuíta Cuana Utsaquira Jesús eje buchique cuejacuareque. Bahuedyatu jucuare Juanra inime cacuaretiya cuanaque utsacuareque. Dyaque inime patya tshuetu Apolosra bahuityacuare riya piji tuque Jesús eje buchique bahueque.

<sup>26</sup> Bajida tshue ama tujatu bahuityacuare israelita cuanaja caradati ishuque etare cuanaju, arepa tura adeba jida ama Jesús eje buchique acuare ama bucha. Aquila, Priscila jadyaratu quisaratiyaju tuhua bacacuare. Bacatsu tatsejatu dujucuare tatseja etareju, dyaque jida Jesús eje buchique pana bahuitya aishu.

—Jesús equé tu Yusu queja judiru ishuque, — jadya tatsejatu pana bahuitya acuare.

<sup>27</sup> Tumetu Apolos cuacara jucuare Acayaju. Jadya bahue juatsutu Jesús queja ecatyati cuanara casaturacuare tuque cuaishu. Huenecuare tuna quirica tuque tuna queja nubinati ishu, Jesús queja ecatyati cuana Acayaju cuanaja ishu, jida tunaja batsa ishu. Tuque judiruma jarijutu jetiama Acayaju cuanaja ebaca jucuare Yusura tunaja ishu jida ayaque. Cuejayaju bacatsu tuna Jesús queja catyaticuare. Tumetu Apolos tuhua junatitsu israelita cuana tshue quisaraticuare.

<sup>28</sup> Dutyaja yacuajutu tuque caquemitsati caquemitsati jubahue jucuare. Yusuja quisarati ehuenegue tujatu tsumecuare tuna Jesús Mesiasque ejenemere ishu. Dyaque jidatu

quisarati acuire. Israelita cuanaratu bape quemitsae ataquí ama bacuire.

## 19

### *Pablo Efesoju cuanucacuireque*

<sup>1</sup> Apolos Corintoju jarijutu Pablo cueticuire emata cuana eque jetiamaju epu cuana cuaji-aje juyaque. Tueque cuetitsutu judirucuire Efesoju. Tuhua tujatu tsurucuire eje uma Jesús queja ecatyati cuanaque.

<sup>2</sup> —¿Butechinetu Yusuja Espíritu micuana queja, micuana Jesús queja catyatihuaju? —jadya tujatu ecana bacaduracuire.

—Juhua aba. ¿Ejeque tu tumeque Yusuja Espíritu mira ecuana cuejayaque? Ni eje tupu ecuanaja bacama tumeque, —jadya tuna caquemitsaticuire.

<sup>3</sup> —¿Eje bucha eque micuana cutsameretichine? —jadya tuna Pablora bacaduranucuire.

—Cutsameretichine ecuana inime cacuaretihuaque adeba ishú, Juanra bahuityahua eque.

<sup>4</sup> —Yuneridyatu Juanra ecuita cuana utsacuire inime cacuaretihua jadique adeba ishú, cajuchati-jacacara juya jadique. Jadya ama buchatu tura quisarati ajacuire ama: “Junaya queja micuana catyatitahuí” jadya. Junayaque jadya ayaque tujatu Jesús jadya acuire. Tuaequeja catyatihua jadique adebataquí juishu necutsamereticue, —jadya tuna Pablora acuire.

<sup>5</sup> Jadya bacatsu tuna cutsameretinucuire yuneri cuitadya tuna Ecuana Cuatsashaquí Jesucristo queja catyatihuaque caadebamereti ishú.

<sup>6</sup> Pablóratu tuja emetucu tunaja iyuca dyaque iyacuire. Jadya ayajutu Yusuja Espíritu tuna

queja butecuare. Quisaratitibunecuare ecana peya yana tunara adebaya eque ama. Tunaratu cuejacuare Yusura quisaratishayaju quisaratihuaque.

<sup>7</sup>Jucuaré tuna peadya tunca beta eracana ecuita tume patya cutsamereticuareque.

<sup>8</sup>Quimisha badi tuputu Pablo cuau cuau jucuaré israelita cuanaja caradati ishunque etareju. Bajida tsehue ama tujatu ecana tuhua Jesúsja quisarati cuejacuare. Eje buchadya ejenemerecara tujatu ecana acuare Jesús eque cuita camadya Yusura dutya naruyaju judirutaquique.

<sup>9</sup>Umaetu dyaque ecahuaiti jucuaré Pablora cuejayaque bacatsu. Ejenecarama tunajatu acuare. Jidama tunajatu quisarati acuare Jesúsja ishucuita cuanaja ijacaju. Tume tuna Pablora jacacuare. Tuque, peya cuana Jesús queja ecatyati cuanaque jadya tuna cuacuare Tirano bahuitya bahuityayaju. Tumetu Pablora tuhua cuejati-bunecuare Jesúsja quisarati dutya huecaca.

<sup>10</sup>Beta mara tuputu Pablora tuhua Jesúsja quisarati bahuityacuare. Jutaquijudyatu jetiama Asiaju anicuare cuanara bacacuare Ecuana Cuatsashaqui Jesús eje buchique. Israelita cuanara, tumbaedyá israelita ama cuanara bacacuareadya.

<sup>11</sup>Yusuja casa tshuetu Pablora ni ejeque ecuitaja ataquique ama acuare.

<sup>12</sup>Jutaquijudyatu eraca cuana Pablora inahuaque ecuita cuanara dujucuaré ujejeda cuana queja. Pablora inahuaque jabatsutu ujejeda cuanaque chacha jucuaré. Tume ijahua cuanara quijahuatishaya cuanaque bacue

chacha jucuaredya, ijahua cuana tuna quejaque cuinanatsu.

<sup>13</sup> Anicuaretu peya ijahua cuana ijehuecuinaqui cuanaque. Israelilta cuana tuna jucuaire. Epu cuanaju tuna junenicuaire jadya ayaque. Arepa ecana Jesús queja catyatima jucuaire ama bucha tuna Ecuana Cuatsashaquiya casa tsumecara acuare ijahua cuana ijehuecuina ishu. Jadya tibudya tunajatu ijahua cuana abahue jucuaire: “Jesúsja ebacaniju, Pablora cuejayaya ebacaniju micuana aya, ‘Necuinanacue riya cuana quejaque. Paquijahuatijaca ecana’ ”, jadya quisarati tsehue tunajatu ijahua cuana abahue jucuaire.

<sup>14</sup> Jadya tuna jubahue jucuaire israelita Esceva bacaniya pacarucu ebacua cuanaque. Escevatu tuhua pae cuanaja huaraji jucuaire. “Jesúsja ebacaniju, Pablora cuejayaya ebacaniju micuana aya: ‘Necuinanacue riya cuana quejaque’ ”, jadya tunajatu abahue jucuaire ijahua cuana.

<sup>15</sup> Tunara jadya ayaju tuna ijahuara jadya apidya acuare:

—Adebaya tuque Jesús. Adebaya tuque Pablo. ¿Micuana jatsu micuana ai? Micuana micuana Jesúsja cuanaque ama, —jadya tuna ijahuara acuare.

<sup>16</sup> Ijahuara jadya ahuajutu ecuita ijahuara quijahuatishayara putiriquecuare tuna pacarucuque. Mirirshacuaretu ecana ijahue atillaya tupu ebajararaque. Chamacama ecana huanacuare etare juque unamaque, ujeda eaque. Jadyatu Efesoju Escevaja pacarucu ebacua cuanaque jucuaire.

17 Tuhua cuanaque tuna bahue jucuare pacarucu ecuita cuana jadya juhuaque. Israelita cuanara, israelita ama cuanara jadyatu bacacuare jadya juhuaque. Bahue juatsu tuna anajacatacuare. Dyaquedya jutidya tunajatu Ecuana Cuatsashaqui Jesúsja casa bacaajecuare. Jadya juatsu tunajatu pureama acuaré.

18-19 Jetiama maruhuisa cuana tuna Jesús queja catyaticuare. Tuaqueja catyatitsu tuna dutyaja ijacaju cacuejatibarecuare tuna jidama juhua cuanaque. Sitacuare tuna dutya quirica cuana tuna maru cabahuityatiqui jucuare cuanaque. Sitatsu tunajatu pahuacuare dutyara petayaju. Pahuama jarijutu tumeque quirica cuanaja dyaque etsujequi anicuare, pishica tunca mil ficha tupu dyane.

20 Dyaquedya jutidya tunajatu tuque amaca bacaajecuaredya jutidya Yusuja quisarati, Yusuja casa jadya.

### *Efesoju cuanaque capuriticuareque*

21 Jadya juatsutu Pablora inime tupucuare:

—Pacua ique Jerusalénju. Pacuete epu cuana equé Macedonia, Acaya ecátse yahua equé Jesús queja ecatyati cuanaque cuajiaje. Jerusalénju cuaatsu, cuacara juya Romaju, —jadya tujatu inime tupucuare.

22 Tumetu Pablora Macedoniaju cuadishacuare icueneta beta tuque tsahuaquique, Timoteo, Erasto jadya. Tuquetu anicuare jari eje uma huecaca cuana Asiaju.

<sup>23</sup> “Iyacuaque tu Jesús eque Yusu queja judiru ishuque”, jetiamatu Efesoju cuanaque jadique quisarati bacatsu cahuaitsu capuriticuare.

<sup>24</sup> Peadya ecuita Demetrio bacaniratu ecuita cuana cahuaishacuare. Tuquetu cueya cueya cuana mere puji jucuare. Yusu epuna Artemisa mui ishuque etare cueya cueya mere pujitu jucuare. Tsuje aridaque metal tujatu acuare. Catyati aatsu tujatu jetiama chipiru inacuare. Tumbaedy tuatsehue mere jucuare cuanara dyaque etsujequi inacuare.

<sup>25</sup> Demetrioratu tuja mere puji cuana sitacuare. Tumbaedyatu ihuaramerecuare dutya peya cuana cueya cueya mere puji cuana.

—Tata ecana, nebacacue ique. Micuanaratu adebaya ecuanara riyaque mere tsehue umada chipiru inayaque.

<sup>26</sup> Bachine micuana Pablora cuejahuaju eje bucha juchineque. Bacachine micuana tura cuejayaju. “Ecuita cuanara yusu cueya cueya ayaque tu Yusu ama”, jadyatu ajacachine ama ecuita cuana. Jadya tibusu eje umara Artemisa muijacaya. Artemisa tuna muijacaya ecuanaja epuju cuanara. Asiaju dutya queja cuanaratu muijacaya yusu cuana ecuanara mere aya cuanaque.

<sup>27</sup> Riyaque tu dyaque jidama ecuanaja ishu. Jaidya jutidya ni juajeya, mere tuque ecuanaja ajama ejuu. Chipiru tuque ecuanaja einanucanama. “Artemisaja etaretu ni aishu buchique ejuu”, jadyatu ecuita cuana ejuu. Jadya ni juya, peya epu cuanajura ni tu emuijacadadiu, Asiaju dutya yahua-jura. Bijidamatu ebatau riyaque yusu epuna. Emuiu ama tunaja tuque, —jadya tuna Demetri-



ora acuare.

<sup>28</sup> Jadya bacatsu tuna dyaque cahuaiticuare. Quiqueterecuare tuna:

—¡Artemisa tuque ecuanaja esumique! ¡Tumeque yusu epuna ecuanara muiyaque, dutya Efesoju cuanara! —jadya tuna jubarecuare quique eque.

<sup>29</sup> Bape bapedya jutidyatu epu ebariju cuanara cueyanecuare. Gayo, Aristarco Macedonia juque ecitse inaticuare. Pablo taji juyaque tatse jucuare. Repeajetsu tuna ecitse ani ishuhuanaque pataca pataca baruda eaque ducu repeajecuare. Tuhuatu ecuita cuana caradaticuare.

<sup>30</sup> Pablotu nubicara tuhua jucuaru ecuita cuana isara ishuhuanaque. Jesús queja ecatyati cuanaratu cuejamerecuare tuque nubi ishuhuanaque.

<sup>31</sup> Umae Asia juque huaraji cuanara tujatu quisarati cuadishacuare. Tuna tuna Pabloja eadeba cuanaque jucuaru.

—Panubi ama tuhua, —jadya tunajatu cuejamerecuare.

<sup>32</sup> Ecuita ecapuritique tuna jucuaru. Dutya jujeri baecua jucuaru aishu casitatihuaque. Umaera bape, peya cuanara peya quisarati jadya jutidya ecanajucuaru. Umae cuana quiqueya peya queja eje bucha quiqueya jadya tuna jucuaru. Dutya tuna ecahuaiti jucuaru Pablo tsehue, dutya israelita cuana tsehue jadya.

<sup>33</sup> Israelita cuanara tuna jetiamaque isaracara datse acuare. Jadya tibudya tunajatu Alejandro casada tsehue dutya ecuita cuana acuatsumerecuare. Tuna israelita cuana tsehue cahuaishajacacara aatsu tujatu ecanajucuaru.

34 Tudyá cuitadya israelitaque adebatsu ecuita cuana dyaque jebudadya jutidya quiqueterecuare:

—¡Artemisa tuque ecuanaja esumique! ¡Tumeque tu yusu epuna ecuanara muiyaque, dutya Efesoju cuanara! —jadya tuna quiquecuare beta ura jujeri dyane.

35 Tumetu epu juque huenehuene puji huarajira inime eque inime equetu ecana abacashacuare.

—Tata ecana, nebacacue ique. Ecuana riyaque epu ebari juquedya ecuana tumeque etare yusu epuna Artemisa mui ishuque etare naru ishuque. Tumbaedyá ecuanajadyatu narutaquí yusu epuna cueya cueya barepa juque epacacaque. Dutya quejaquetu bahue riyaque.

36 Dutyatu bahue ecuanaja riyaque bataquique. Nebacatanacue. Jidama jumaradya jida inime netupura.

37 Yanacana tuque micuana tumeque ecuita ecitse behua. Ni ai buchique tatsejatu chirihua ama Artemisa mui ishuque etare juque. Jidama tatse quisaratihua ama yusu epuna ecuanara muiyaja ishu.

38 Demetriora, peya cuana cueya cueya mere puji cuanara ni baya ai tatsera jidama ayaju, pacua ecana inime cuana bajejequi cuanaja yacuaju. Pacacuejatiti ecana tuna eje bucha juhuaque. Dutya peadya peadya ecana paquicuenetiti. Jadique tu tuyu.

39 Aniya ni micuanaja tumeque inimeju quisarati aishuque, casitatitaquí ecuana, ecuanaja cacuatsashati eque, jida tsehue inime bajeje ishu.

<sup>40</sup> Riyaque huecaca ecuana tuyu ama juhua ecuanaja cacuatsashati eque ama. Ecuana eje bucha juhua equetu enaruquique Roma juque dyaque ecahuaitiu ecuana tsehue. Ecuana tu-atsehue cahuitihua bucha tura ecuana ebau. Bacaduraya ni tura ecuana “¿Eje bucha juatsu micuana Efesoju capuritichine?”, ai cuejataqui ama tuque ecuana ebau, –jadya tujatu ecana acuare.

<sup>41</sup> Jadya quisarati amena aatsu tujatu ecana cuadishacuare tunaja etare cuanaju tuhua caradatihua cuanaque.

## 20

*Pablo Macedonia yahuaju, Grecia yahuaju jadya cuacuareque*

<sup>1</sup> Dutya ecahuaiti cuanaque tunaja etareju diruterehuajutu Pablora ihuaramerecuare Jesús queja ecatyati cuanaque, tuna tuja ai cuejataquique cueja ishu. Tuna cueja amena aatsu tujatu ecana macacatsu isarabarecuare. Tuna isaratsutu cuinanacuare Macedoniaju cuaishu.

<sup>2</sup> Cueticuaretu epu cuana Macedonia yahua eque. Baticuare tujatu tura icuene cuita Jesús queja catyati tsahuacuare cuanaque. Dyaque tujatu ecana tuja quisarati tsehue casaturacuare. Jadya juu jadya juatsutu Grecia yahuaju cuacuare. Tumeque yahua nucadyatu Acaya bacani jucuaré.

<sup>3</sup> Tuhuatu anicuare quimisha badi. Cuahuietu amena jucuaré Siriaju ena eque. Israelita cuanaratu Pablo iyecara acuare.

—Tuque cuaba eque cuayaju neiyera, —jadyapa tunajatu inime tupucuaire.

Jadique bahue juatsutu Pablora inime tupucuaire:

—Yahua eque padirunuca —jadya.

Yahua eque cuaatsutu cuetinucacuare Macedonia epu cuana eque.

<sup>4</sup> Jesús queja ecatyati cuanaratu tajicuaire. Jucuaire tuna: Sópater, Aristarco, Segundo, Gayo, Timoteo, Tíquico, Trófimo jadya. Sópater tu Berea juque jucuaire. Tuquetu Pirroja ebacuaque jucuaire. Aristarco, Segundo jadya tatse Tesalónica juque jucuaire. Gayotu Derbe juque jucuaire. Tíquico, Trófimo ecatsetu Asia yahua juque jucuaire. Riyaque pacarucuratu Pablo tajicuaire tuque Filiposju cuayaju.

<sup>5</sup> Jueticuaire tuna Filiposju; ique Lucas riyaque quirica huenequi juyaque tuhuadya jucuaire. Tume tuna pacarucu cueticuaire ecuana Troasju ihuanati ishu.

<sup>6</sup> Amena chine pan levaduramaque ara ishuque chine cuetihuaju ecuana ique Lucas, Pablo, peya cuana jadya cuacuare Troasju. Cuaba ebari tsehue ecuana ebute juque cuinanacuare. Pishica huecaca juatsu tuque ecuana peya cuana Troasju adadinucacuare. Tuhua ecuana pacarucu huecaca netinaticuaire.

*Pablora Jesús queja ecatyati cuanaque Troasju aniya cuanaque baticuaireque*

<sup>7-8</sup> Domico huecaca ecuana Pablo tsehue cuacuare cuanaque ecuana caradaticuaire Jesús queja ecatyati cuana tsehue. Casitaticuaire ecuana pan ara ishu, Jesús majucuaireque adeba ishu.

Cuarto ebariju quimisha ishuque pisoju ecuana caradaticuare. Pablotu Jesúsja quisarati bahuitya jucuare. Huecacape pijidya cuanucaya tibu tura ecuana metapatya tupu bahuityacuare. Jetiamatu ude cuana jujunetibarecuare tumeque cuartoju.

<sup>9</sup> Peadya ehue ebari Eutico bacanitu juanicuare tuhua huetanaju. Tahuicaraquetu juanicuare, Pablo tsunuda quisaratiya tibu. Amena tahui tahui juyaquetu pacacacuare yahuaju, quimisha ishuque piso juque. Pacacahua baatsu ecuana butecuare tuque huesara. Emajuque tunajatu nityatsuraticuare.

<sup>10</sup> Tumetu Pablo butetsu cuinanacuare etare juque. Majuhuaquetu baticuare. Emaju dyaquetu jarabutecuare. Macacanaticuare tura, Yusuja casa tsehue chacha nityatsuranuca ishu.

—Peya inime nejuume. Yusurari yudijidya chacha nityatsuranucaya, —jadya tujatu ecana acuare.

<sup>11</sup> Tume ecuana Pablo dutyadya ecuana jadya tsuranucacuare ecuana casitatihuaque cuartoju. Tsuradirunucatsutu Pablora pan cuesicuare. Cuesitsu tura ecuana peadya peadya ecuesi tyabarecuare. Aracuare tuque ecuana Jesús majucareque adeba ishu. Amena ecuana pan araqueretsu ecuana Pablora Jesúsja quisarati cuejanucacuare huecaca japadama tupu. Huecacayajutu tuhuaque cuanucacuare ehuachi eque.

<sup>12</sup> Tumeque ehue ebari pacacatsu majuhua-quetu chacha junucacuare. Dujucare tuna etareju. Dutyaja tunajatu jida inime jucuare,

tuque chacha junucahua baatsu.

*Pablo Troas juque, Miletoju cuacuareque*

<sup>13</sup> Ecuana ecuana icuene cuacuare. Cuacuare ecuana cuaba ebari tsehue Asón epu tupu, Pablo tuhua ihuara. Cuama jarira tura ecuana jadya acuare: “Ique ehuachi eque cuaya Asón tupu. Tuhuadya necaturutira” jadya.

<sup>14</sup> Tuhua ecuana catsuruticuare Pablo tsehue. Cuaba ebari tsehue ecuana dutyadya Asón juque cuanucacuare. Cuacuare ecuana Militene epuju.

<sup>15</sup> Tuhuaque cuinanatsu ecuana cueticuare peya huecaca Quío tuyu eque. Huecacape ecuana jaratsuraeticuare ebute Samos ecububuju. Canajaruare ecuana Trogilioju. Peya huecaca ecuana jueticuare Miletoju.

<sup>16</sup> Cuanucacuare ama ecuana Efesoju, Pablo Asia yahuaju tsunutacarama juya tibu. Huenacuaretu Pentecostés chine ishú Jerusalénju jueticara juatsu.

*Pablora Jesús queja ecatyati cuanaque naruqui cuanaque Efeso juque isaracuareque*

<sup>17</sup> Arepa Efesoju cuaishu emajaca aijama jucuaré ama buchatu Pablora quisarati cuadishacuare tuhua Jesús queja ecatyati cuanaja huaraji cuana queja:

—Nebanacue ique Miletoju ebajarara cuita, — jadya tujatu ecana cuejamerecuare.

<sup>18</sup> Tuna junatihujutu Pablo tuna tsehue quisaraticuare:

—Tata ecana, micuana micuana bahuédya ique eje bucha jucuaréque Asiaju junametse jucuaré eque riyaque huecaca tupu.

19 Dutya huecaca ique micuana tsehue jucuare patya tuque Ecuana Cuatsashaquique merecuare. Ique micuana ducu inime metse ama cabaticuare. Dyaque peya inime jucuare Efesoju cuanaque cajuchatiya baatsu; pacuare ique.

20 Cuejajacacuare ama micuana tsahua ishuhua cuanaque quisarati, micuanaja jida ishuhua. Bahuityajacacuare ama micuana jidaque quisarati. Caradati ishuhua cuanaque etare cuanaju micuana dutyara bayaju bahuityacuare. Tumbaedyahua micuanaja etare cuanaju micuana bahuityacuare.

21 “Necacuareticue inime Yusu iyuhueda banuca ishuhua. Ecuana Cuatsashaqui Jesucristo queja necatyaticue”, jadyahua micuana quisarati cuejajacacuare ama, israelita cuana, israelita ama cuanaque jadyahua.

22 “Iyacua cuayahua Jerusalénju, Yusuja Espiritura cuadishayaju. Juhua abahua eje buchahua cuana taa tuhua jutiya.

23 Camadyahua ique bahue tuhua dyaque canerecatidadiyaque. Bahue ique tunarahua etare apudaju ishadadiyaque. Jadyahua Yusuja Espiritura bahue amerechine ique epu cuana tupu juneniya patyahua.

24 Jadyahua ama buchahua ique bajidahua juyahua ama. Jidamahua ama tuque inime bayahua tunarahua ique iyeyaju. Eratuhua jidahua bayahua ecue mere atillahua ishuhua, Ecuana Cuatsashaqui Jesúsrahua ique amerehuaque. Turahua ique cuadishahua jidaque quisarati cuejarahua. Cuadishahua turahua ique Yusura ecana iyuhueda bayaque cuejahua ishuhua. Ique pureamahua juyahua turahua ique mere amerehuaque mere ahuahua cabatitsu.

25 “Icuene ique cueticuare micuanajahua epu cuana

eque eje bucha narue Yusura dutya ecuita cuana ayaque micuana cueja juyaque, micuana Jesús queja catyati ishu. Ique caadebatiya micuana ni ejeque buchique riyaque yahuaaju banucayaque ama.

<sup>26-27</sup> Micuanaja epu cuanaju junenicuare patya micuana cuejacuare ejitaju micuana eje bucha inajacameree Ijahua quejaque Yusura eauque. Tehuacuare ama micuana Jesúsja quisarati. Dutya micuana pana cueja acuare. Jutaquiju ejeque ni Jesús queja catyaticarama juya, ique ama jucha metse. Micuanaratu adebayadya riyaque yunerique.

<sup>28</sup> Jutaquiju neaniajecuedya jutidya jida Yusuja biji eque. Nenaruajecuedya jutidya jida Jesús queja ecatyati cuanaque. Yusuja Espiritura micuana iyacuare, ecuatsashaque bucha tuna naruqui juishu. Uhuisha naruquira tuja uhuisha cuana naruya bucha narue ecana neacue. Tuna tuna Jesús jaque, tuque tuna jiteque ami quijehuetitsu majuhua tibu.

<sup>29</sup> Eratu adebaya ique amena micuana tsehueju ama dyaque jidama cuanaque junabuque micuana queja. Pusha pusha tunara micuana abuque, Jesús queja nimee amerejacacara aatsu. Iba mureda cuanaque uhuisha cuana ducu ejuu bucha tuna jubuque.

<sup>30</sup> Arepa umae micuana tsehue casitatitsu Jesús pureama abahue ama bucha tunara cuitadya micuana pusha pusha bahuityabuque. Tunara micuana Jesús queja nimee amerejacacara abuque.

<sup>31</sup> Jutaquijudya necanaruticue tunara micuana



ijahue eauju. Mara mara micuana bahuityahua Jesúsja quisarati. Huecada tupu, meta tupu jadya micuana tuque eje buchique cuejajacahua ama. Dyaque iyuhueda micuana baatsu, micuana Jesúsja inime eque ama juya baatsu, paana caca capajacashati bahue juhua.

<sup>32</sup> “Inime netupucue era micuana cuejahuaju, micuana ecue eatsehuequi cuanaque. Yusura nenarucue tuja quiyuhuebati tsehue. Yusuja quisarati dyaque inime tupuqui neacue. Micuanara ni quisarati inime tupuqui ajacaya ama, dyaque micuana cabahuityatiajeya Yusuja Espirituja biji eque ani. Yusura micuana tyabuque dutya jidaque tura tuja cuanaque tyaana ahuaque tura cuatsashaya eque aniya cuanaque.

<sup>33</sup> Eratu micuana tsehueju Ecuana Cuatsashaquique merehua. Bijiserihua ama tuque peyaja ai aniyaque, chipiru, ejutuqui ni ai buchique.

<sup>34</sup> Ecue emetucu tsehue cuitadya ebiti etare caca cuana mere juhua, era, ique tsahuaqui cuanara jadya sareya cuanaque cadaditi ishü. Adebayadya tuque micuanara.

<sup>35</sup> ‘Mere nejudue micuanara ai sareyaque cadaditi ishü. Netsahuacue nerecada cuanaque’ jadya micuana cuejajacahua ama. Neadebacue beru Ecuana Cuatsashaqui Jesucristo jadya jucuaque: “Dyaque jida tu peya ai tyau, ecuanaja tacaja ishü ai radanityaya bucha ama” jadya. Neadebacue riyaque, —jadya tuna Pablora acuaque.

<sup>36</sup> Jadya quisarati amena aatsutu Pablo nuyucuaque Efesoju cuanaque Jesús queja ecatyati cua-

naque naruqui cuana tsehue. Dutya tuna Yusu tsehue quisaraticuare.

<sup>37</sup> Dutya tuna pacuare, Pablora amena jaca ishü isaraya cabatitsu. Macaca, dyahua, isara jadya tunajatu Pablo acuare.

<sup>38</sup> Dyaque peya inime ecana jucuaire, Pablora “Banucaya ama micuanara ique riyaque yahuaju”, jadya ayaju. Jadya aatsu tunajatu tajiticuare cuaba ebari tupu ebuteju.

## 21

### *Pablo Jerusalén epu ebariju dirucuaireque*

<sup>1</sup> Jesús queja ecatyati cuanaque naruqui cuanaque, ecuana diruyara isaratsu ecuana cuaba ebariju anibutecuare. Dirucuaire ecuana Cosju piisi. Peya huecaca ecuana judirucuaire Rodasju. Tuhuaque dirunucatsu ecuana judirunucacuare Pataraju.

<sup>2</sup> Pataraju judirutsu ecuana dadinucacuare peya cuaba ebari Fenicia yahuaju cuayaque.

<sup>3</sup> Cueticuare ecuana Chipre bacani ecububu peque eque. Diruyaque tuque ecuana jani eque amaca iya acuare. Dirucuairedya jutidya ecuana cuaba tsehue Siria yahua tupu. Jaratsuradirucuaire ecuana Tiro ebuteju, cuaba aquereniqui cuanaja ai iyadirutaqui jucuaire tibu.

<sup>4</sup> Cuaba juque cuinanatsu ecuana cuacuare Jesús queja ecatyati cuanaque sarera. Tuhua cuana tsehue catsurutitsu ecuana anicuare pacarucu huecaca. Yusuja Espiritura Pablo Jerusalénju canerecatidadiyaque bahue amerehuaju tunajatu

—Cuaume, —jadya acuare.

<sup>5</sup> Jadya ama buchatu Pablo bahuedya jucuaré tuque tuhua cuataquique. Pacarucu huecaca juatsu ecuana cuinanacuare. Ecuana amena cuita diruyaju ecuana Jesús queja dutya ecatyati cuanara ebuteju iyabutyaticuare. Deca cuana, epuna, ebacua jadya tuna ebuteju cuacuare ecuana tsehue. Tuhua enaja ecuaqueja mejijiju ecuana nuyucuaré, Yusu tsehue quisarati ishu.

<sup>6</sup> Yusu tsehue quisarati amena juatsu, tuque ecuana ecana isaracuare:

—Diruya ecuana, —jadya tuque ecuana ecana acuare Tiroju cuanaque.

—Nedirucue taa, —jadya tunara ecuana acuare.

Jadya juatsu ecuana anibutecuare cuaba ebariju. Anibutehuaju tuna dirubarecuare tunaja etare cuanaju.

<sup>7</sup> Tiro juque ecuana cuinanacuare. Judirucuaré ecuana Tolemaidaju. Tuhua tupu ecuana ena eque dirucuaré. Cuaba ebari juque cuinanatsu ecuana cuacuare tuhua Jesús queja ecatyati cuanaque isarara. Tuna tsehue ecuana anicuare peadya huecaca.

<sup>8</sup> Peya huecaca ecuana Pablo tsehue cuaya cuanaque cuinanacuare. Judirucuaré ecuana Cesarea epu ebariju. Cuacuare ecuana Felipeja etareju. Tudyatu Jesúsja ecuadisha cuanaque et-sahuaquique jucuaré tunara béru pacarucu et-sahuaqui cuanaque mepecuaré patya. Tuaqueja ecuana eje uma huecaca cuana piji aninaticuare.

<sup>9</sup> Anicuare tujatu pushi ebacujuna cuanaque, ahuema cuanaque. Tumeque epuna cuanatu Yusu equeque quisarati cuejaqui cuanaque jucuaré.

<sup>10</sup> Tuhua ecuana eje uma huecaca cuana piji anicuare. Ecuana tuhuajutu jueticuare ecuana queja peadya ecuita Agabo bacani. Judea yahua juquetu jueticuare. Tumequetu Yusu equeque quisarati cuejaquiquedya jucuaré.

<sup>11</sup> Eje uma cuejadyatu Yusura acuare eje bucha judadibuqueque. Huicacuare tujatu Pabloja cinturu. Cinturu huicatsutu Agabo carisiticuare ehuachi ecatse, ebi ecatse jadya cinturu tsehue. Jadya carisititsu tujatu Pablo cuejacuare:

—Pablo, cuejaya mique era Yusuja Espiritura ique bahue amerehuaque mique eje bucha atayaque. Israelita cuanara pami Jerusalénju huachi risi birisi jadya aya. Ique ebi ecatse, ehuachi ecatse jadya carisitihua bucha, jadya risipa tunarami aya mique cinturu metseque. Inamereya tunara mique israelita ama cuana queja, —jadyatu Agabora Pablo cuejacuare.

<sup>12</sup> Jadya bacatsu ecuana Pablo tsehue quisaraticuare. Cesareaju cuanaque, ecuana jadya datse ecuana canerecaticuare tuaqueja:

—Cuaume Jerusalénju.

Enapacuare tuque ecuanara, tumebaedya Cesareaju cuanara Pablo tuhua eje bucha judadiyaque adebatsu.

<sup>13</sup> —¿Eje bucha juatsu micuana paya? ¿Eje bucha juatsu micuanara nime huallacara aya Jerusalénju cuaishu ama? Ecuana Cuatsashaquira amerecara ayaque cuita camadya tuque acara aya. Risitana ishú camadya ama cuaya, tumebaedya iyeta ishú, tuja jadya inime juyaque juatsu, —jadya ecuana Pablora acuare.

<sup>14</sup> Tura ecuana bacacarama acuare. Eje bucha abacashataquima baatsu, tuque ecuana cuejajacacuare.

—Paju Ecuana Cuatsashaquiya biji eque, —jadya ecuana jucuaire.

<sup>15</sup> Eje uma huecaca tarepe juatsu ecuana cabajejeticuare abu ishu cuanaque. Cabajejetitsu ecuana cuacuare Jerusalén diji eque.

<sup>16</sup> Jesús queja ecatyati cuanaque umae Cesareaju aniya cuanara ecuana tajiajecuare. Jerusalénju junatihuaaju tunara ecuana dujucucuare Mnasónja etareju. Tuquetu Chipre juque jucuaire. Amena eje uma maratu Jesús queja ecatyatique jucuaire. Tuaqueja ecuana anibacacuare.

*Pablora Santiago baticuareque*

<sup>17</sup> Ecuana Jerusalénju junatihuaaju ecuana Jesús queja ecatyati cuanara pureama tsehue batscuare.

<sup>18</sup> Huecacatsutu Pablo cuacuare Santiago queja, Jesús queja ecatyati cuanaja huaraji queja. Ecuana ecuana cuacuaredya tuatsehue. Écaradatinucadya tuna jucuaire tuhua Jesús queja ecatyati cuanaja huaraji cuana.

<sup>19</sup> Pablora tuna isaracuare. Isara amena aatsu tujatu ecana cuejacuare:

—Ique equetu Yusura israelita ama cuanaque Jesús queja catyatishahua, —jadya tujatu ecana acuare.

<sup>20</sup> Tuque jadya bacatsu tunajatu Yusu pureama acuare:

—¡Dyaque jida taa Yusu!

Yusu pureama amena aatsu tunajatu Pablo isaracuare:

—Isaraya mique ecuanara, ecuanaja ecuana tsehuequique. Jetiamatu israelita cuana Jesús queja catyaticuare. Eje uma mil tuna catyatihua. Miquemi bahuedya. Arepa tuja cuanaque juya ama buchatu eje uma juya, dutyapa ecuana Moisésja cacuatsashati eque jutaqui jadya.

<sup>21</sup> Aniyari quisarati sicacada micue ishü. Mira patu bahuityaya israelita cuana israelita ama cuana ducu aniya cuanaque: “Moisésja cacuat-sashati eque nejujacacue. Netubujacacue micuanaja bacua cuana, Yusu jaque jadicue adeba ishüque. Ecuanaja bahue eque neanijacacue”, jadyapa tuquemi ecuanaja ata cuana bahuityaya. Jadyari israelita cuana micue ishü quisaratiya.

<sup>22</sup> Masadamadya tuna bahue juya mique junahuaque. Bahuedya eana amerecue mira Moisésja cacuatsashati bijidamadurayaque ama, israelita juya tibu. ¿Eje buchami juya?

<sup>23</sup> Ecuana cuejaya eque jucue. Riya rehua pushi ecuita Jesús queja nimee cuanaque, Yusu ai tyaana juhuaque. Baretaqui ama tunajatu quisarati.

<sup>24</sup> Necuacue tuna tsehue pae cuana queja. Tuna tsehue apeedyä acue cacuatsashati eque Yusu queja jida cajuchatima cabamereti ishüque. Tsujetyacue tunaja manu tunara aana eaque ahua tibu. Eshu eana pacatimere, tunaja aana eaque ahua jadicue caadebamereti ishü. Dutyaja yacuaju Moisésja cacuatsashati eque juyaque baatsutu rehuaque israelita cuana bahue juya tunara mique eje buchique bacatsahuaque pusha pushaque. Tume tuna bahuedya juya yuneridya mique Moisésja cacuatsashati eque juyaque.

<sup>25</sup> Ecuánara tuna amena cuejacuaredya israelita ama cuanaque eje bucha juishuque ama. Cuadishacuare tuque ecuana quirica israelita ama cuana Jesús queja ecatyati cuanaja ishu. “Nearaume erami yusu cueya cueya cuanaja yacuaju iyahuaque. Neijiume ami. Nearaume erami cuanubi, uu jadya pana sucururusha ami amaque. Micuanaja caquemitiqueremaque nejaraquereume”, jadya tuque ecuana quirica cuadishacuare icuene, –jadya tunajatu Pablo acuare.

<sup>26</sup> Tumetu Pablo huecacatsu piji cuitadya cuacuare pushi ecuita tsehue. Tuna tsehue apeedyu tujatu acuare cacuatsashati equé Yusu queja juchama cabamereti ishu. Cuacuaretu Yusuja etareju. Tuhuatu pae cuana tsehue quisaratiticuare:

–Pacarucu huecacaju tuque ecuana Yusuja jida juchama baishuque atillaya. Tumeque huecaca tuque ecuana uu cuana beya iyetsu micuanaja Yusu tya ishu, –jadyatu Pablora acuare pae cuana.

*Israelita cuánara Pablo Yusuja etareju inacuareque*

<sup>27</sup> Pablotu Yusuja etareju jucuare. Umae israelita cuana Asia yahuaju cuanaratu bacuare tuhua. Pabloja ishu tuna jidama quisarati acuare dutya tuhua cuanaque tuatsehue cahuaishaya tupu. Tsajaja, inati tunajatu acuare.

<sup>28</sup> Quiquecuare ecaná:

–¡Netsahuanacue ecuana, ata cuana! Neinara riyaque ecuita. Riyaquedyu ri dutya queja ecuita cuana yunerique ama bahuitya juyaque.

Riyaque ri ecuanaja baba cuanaja bahue juhua cuanaquepa jidama jadya juyaque. Moisésra cuatsashahua equepa jutaqui ama, jadyari juya. Jidama rejari quisarati aya Yusuja etareja ishu. Iyacua rejari rehua nudyahua peadya ecuana jaque ama, israelita ama. Jadya asicaturae tujatu Yusuja etare aya, –jadya tuna pusha pusha jucuare.

<sup>29</sup> Icuenedyapa tunajatu Pablo epuju Trófimo tsehue juneniyaju bacuare. Tumeque tu israelita ama. Efeso juquetu jucuare. Cahuaiticuare israelita cuana, Pablora tumeque ecuita israelitaque ama Yusuja etareju nubiquerehua bucha baatsu.

<sup>30</sup> Dutya jujeri cuitatu Jerusalén juque ecuita cuana cahuaiticuare. Masadama cuita tuna tsajabecuare. Caradatitsu tuna inacuare Pablo. Inatsu tuna repetsu, cuinanashacuare etsecueju Yusuja etare juque. Repe cuinanashatsu tunajatu yume teri etsecue cuana acuare, tuque catachiti ishu nubitinuca ishu ama.

<sup>31</sup> Ejera cuanatu mil sudaru romano cuana cuatsashaquique Jerusalén juque cuejaticuare:

–Dutya epu jujeritu capurutiya. Pablo tunajatu iyecara aya, –jadyatu ejera cuana cuejaticuare.

<sup>32</sup> Jadya bacatsu tujatu ihuaracuare sudaru cuana, sudaru cuana cuatsashaquique jadya. Tuna tshuetu Pablo queja tsajaja cama cuacuare. Banaticuare tuna tunara Pablo ebi tsehue ayaju. Mil sudaru cuana cuatsashaquique, tuja sudaru cuana tsehue baatsu, tunajatu ajacacuare Pablo.

<sup>33</sup> Tumetu mil sudaru cuana cuatsashaquira jipeticuare. Inamerecuaretu sudaru cuana queja



Pablo. Beta sogá tsehue tunajatu ebi ecátseju risicuaré. Jadya aatsu tujatu caradatihua cuanaque bacaduracuare:

—¿Ejeque ri riyaque ecuita? ¿Eje buchari juhua?  
—jadya tujatu ecaná acuare.

<sup>34</sup> Tumetu ecuita cuana dyaque cuita quiqueterecuare. Umae cuanara bape, peya cuanara bape cueja jadya tuna jubarecuare. Dutya tupu quisarati ayaque ama tuna quiqueterecuare. Jadya tibutu mil sudaru cuana cuatsashaquira adebataqui ama bacuare eje bucha juatsu tuna sicacada juyaque.

—Nedujucue riyaque ecuita ecuana aniyaju, — jadya tujatu tuja sudaru cuana acuare.

<sup>35</sup> Jadya ayajutu sudaru cuanara Pablo dujuacuare tuna aniyaju. Ecuita jetiamaratu tupujudya aajecuare. Patacaju junatitsutu Pablo sudaru cuanara medequetsu dujuacuare ecuita cuanara einaju. Dyaque cuita cahuititsu tunajatu iyecara acuare.

<sup>36</sup> Dutya tuna tuque tupuju quiqueajecuare:

—¡Neiyecue tumeque! —jadya tuna quiqueajecuare.

*Pablo ecuita cuanaja yacuaju quicueneticuareque*

<sup>37</sup> Tunara sudaru cuana aniquique etareju ishacara ayajutu tura jadya acuare sudaru cuanaja huaraji:

—¿Equisaratishaudya mira riyá piji? —jadyatu Pablora acuare griego yana eque.

Huaraji ecuatsashaquiratu quemitsacuare:

—¿Griego yana ni taa mi bahuedya?

<sup>38</sup> ¿Mique ama mi Egiptoju cati inime jucuaque? Amena eje uma mara cuanatu “Roma juque enaruquira cuatsashaya eque nejura ama”, jadya jutibunecua. Tuquetu pushi mil ecuita quiyeti puji cuana cuatsashaquique jucua. Riya cuitadya tujatu ecana anitaya amaju dujucuaque. ¿Mique ama mi tumeque ecuita?

<sup>39</sup> —Aijama, tuque ama ique. Ique israelita. Tarsoju ecuinanaque ique. Cilicia yahua juque ique. Eratu isaracara aya ecuita cuana. Nenerecabacue ique. Nequisaratishacue ique, —jadyatu Pablora acua.

<sup>40</sup> —Isaracuedya ecana, —jadya tujatu acua.

Pablotu netitsuracuare patacaju tsura ishuj. Emetucu tsehuetu ecana cuejacua ecuita cuana abacatana ish. Tuna abacatanahuaju tujatu ecana isaracuare israelita cuanaja yana eque, hebreo bacani eque.

## 22

<sup>1</sup> —Tata ecana, nebacacue ique. Ecue ata cuana, nebacacue ique, era ique quicueneti ish quisarati ayaju, —jadya tujatu ecana acua.

<sup>2</sup> Tuque quisaratiyaju bacatsu tuna jucua:

—Nebacacue. Ecuana ja yana eque cuitadyatu quisaratiya, —jadya tuna jubarecuare.

Tume tuna dutya abacatanaterecuare tuque pana baca ish. Pablora tuna isaranucacuare:

<sup>3</sup> —Ique israelita. Tarso Cilicia yahua ju cuinanacuareque ique. Catemuticuare rehua Jerusalénju. Gamaliel tu ique bahuityaqui jucuaque. Turadya ique dyaque jida

bahuityahua ecuanaja baba cuanaja bahue equé cuanaque. Dutya huecacatu era muicara acuare ecue dutya ducuta inime tsehue Yusura cuatsashayaque, dutya micuana iyacua juya baedya.

<sup>4</sup> Tume patya ique dyaque ecahuaiti jucuaré Jesús queja ecatyati cuana tsehue, iyacuaque quisarati ejenequi juhua cuana tsehue. Dyaque ecana ijahue ijahue acuare. Inamerecuare ecana. Deca, epuna jadya ecana etare apudaju ishamerecuare. Iyemerecuare ecana.

<sup>5</sup> Pae dyaque muidaquetu dyaque jida bahue ique eje bucha juhuaque, tumbaedyá israelita emuiba cuanaque. Tunaradya tyacuare quirica Damascoju israelita cuana aniya cuana queja duju ishú, Jesús queja ecatyati cuanaque ina ishú. Cuacara jucuaré tuna rehúa Jerusalénju risitsu beti ishú. Dyaque tuna nerecaturacara acuare, — jadyatu Pablo cacuejaticuare.

*Pablo eje bucha cacualetie inime jucuaréque cacuejaticuareque*

*(Hch 9.1-19; 26.12-18)*

<sup>6</sup> Isaranucacuare tujatu ecana:

—Damascoju cuayaque piji dyane juajecuaré. Barepatya huie muya jutidya barepa equé huecara pana udatilla atsacuare.

<sup>7</sup> Hueca baatsu ique huipuchitanatsu yahuaju rumucuta rihui jucuaré. Rihuitsu jarayara tuque etsuri bacacuare: “Saulo, Saulo, ¿eje bucha juatsu mira nerecaturaya?”

<sup>8</sup> Jadya bacatsu tuque bacaduracuare: “¿Aira isaraya?” jadya tuque acuare. “Ique Jesús Nazaret

juque idya mira nerecaturayaque,” jadya tura acuare.

<sup>9</sup> Eatsehue cuaya cuanaque tuna dyaque jecutanacuare. Arepa hueca baya ama bucha tunajatu Jesús quisaratiyaju bacacuare ama. Adebataqui ama tunajatu bacuare.

<sup>10</sup> “¿Ai mira amerecara aya, Ique Cuatsashaquique?” jadya tuque acuare. “Netitsuracue. Damasco piisi tuyu cuau jucue. Tuhua tunarami cuejatsaya mique ai jutaquique”, jadya tura acuare.

<sup>11</sup> Tumeque hueca dyaque huecadara atuca secacuare. Ique tajiaje juya cuanara dujuacuare ebiju inatsu, Damascoju junatiya tupu.

<sup>12</sup> “Tuhuatu anicuare Ananías. Tumeratu dyaque Yusu muicuare. Turatu muibajacacuare ama Moisésra cuatsashahua cuanaque. Dutya israelita cuana Damascoju anicuare cuanaratu “Ananías tu ecuita dyaque jidaque” jadya acuare.

<sup>13</sup> Tuquetu jecuar eaqueja. ‘Bandía, Saulo. Miquemi ecue eatsehuequique. Ecuana Cuatsashaquira iyacua cuita capetatihanucacue’ jadya tura aticuare. Tura jadya ayaju cuitadya capetatinucacuare. Capetatitsu bacuare netiyaju.

<sup>14</sup> Ananiasra isaranucacuare: ‘Yusu ecuanaja baba cuanara muicuarerami mepechine. Turami mepechine tuja inime eque dyaque jida juishuque adebamere ishu. Jesús cuitadya baishu turami mepechine. Tumeque Jesús mira bachineque: tu Tuyu Neri bacanique. Turami mepechine tuque micue quisaratiyaju baca ishu. Bacachinedya tuquemi amena.

<sup>15</sup> Jadyami Yusura ahua, micue dutya queja

cuaunque cueja ishu, mira bacahuaque bahuaque jadya cueja ishu.

<sup>16</sup> ¿Eje bucha juatsumi tsunutaya? Netitsuracue. Cutsamereticue Ecuana Cuatsashaquiija ebanijju, tuja micue jucha cuana apupasha ishu bacayaque. Jadya inime cacuaretie jucuaire, —jadyatu Pablo cacuejaticuare.

*Pablora tuna eje bucha cuadishatanae israelita ama cuana queja jucuaireque cuejacuaireque*

<sup>17</sup> Cacuejatinucacuare tuque:

—Juetinucacuare ique rehua Jerusalénju. Rehua juetitsu cuacuare Yusuja etareju Yusu tsehue quisaratira. Yusu tsehue quisaratiyaque tuque ai cuana tahuiju bucha bacuare.

<sup>18</sup> Bacacuare tuque Ecuana Cuatsashaquira isarayaju. “Ebajarara cuinanahuishacue Jerusalén juque. Eejeneu ama tunajatu mira ecue quisarati cuejayaque” jadya.

<sup>19</sup> “Ique Cuatsashaquique, eje bucha bijidamadurae ni tunara ama rehua cuanara, ique ecue inime cacuaretihuaque baatsu. Dutyara tunara adebaya. Tuna tuna bahue ique icuene dutya caradati ishucue etare cuanaju junenihuaque Jesús queja ecatyati cuaunque sare juyaque. Tunaratu adebayadya era Jesús queja ecatyati cuaunque inatsu ebi tsehue acuare cuaunque etare apudaju ishacuareque.

<sup>20</sup> Mique merequique Esteban iyetanayaju, ique tuhuadya jucuaire. Eratu jidadya jutidya bacuare tunaja iye ishu. Eradyatu narucuare Esteban tumu tsehue iyequi cuanaja tunara dyaque jutuya

cuanaque catacatihuaaju”, jadya tuque Ecuana Cuatsashaquique acuare.

<sup>21</sup> “Cuinanacue rehuaque, Pablo. Erami cuadishaya japada, israelita ama cuanaque ecue quisarati cuejara,” jadya Ecuana Cuatsashaquira acuare tahuiju bucha, –jadyatu Pablo cacuejaticuare.

### *Sudaru cuanara Pablo inacuaque*

<sup>22</sup> Yusura israelita ama cuanaque tuja quisarati cuejamerehuaque bacatsu tunajatu amena cuejayaju bacacarama acuare. Quiquetibunecuare ecaña:

–¡Neiyecue tumeque ecuita! ¡Pamaju! –jadya tuna quique eque jucuare:

<sup>23</sup> Quiquejacacuare ama tuna jadya. Dyaque ecahuaiti tuna Pablo tsehue jucuare. Dyaque jutuyaque, muru jadya tunajatu ebarucue queja marecuare, Pablo tsehue cahuaitiyaque cabamereti ishu.

<sup>24</sup> Jadya juya baatsutu mil sudaru cuana cuatsashaquira cuatsashacuare sudaru cuana Pablo sudaru cuana aniquique etareju isha ishu. Bahuetu jucara jucuare eje bucha juatsu ecuita cuana tuatsehue sicacada juyaque.

–Catsacatsa neacue, tuque jidama juhuaque cacuejati ishu. Tura ni ecuana ecuejau ecuita cuana eje bucha juatsu tuatsehue sicacada juyaque, –jadyatu sudaru cuana cuatsashaquira acuare sudaru cuana.

<sup>25</sup> Tumetu sudaru cuanara risicuare. Tunaja catsacatsa ahuietu Pablo quisaraticuare:

—Ique Roma juque enaruquira cuatsashaya eque aniyaque. Ecuetu aniya enaruquique quiricaju ebacani equiyatique. Micuanara ique catsa catsa acara aya, ique ni inime metse jadya ama juatsu aijama jadique baecuaque. Dujuhua ama micuanara ique jidama inime cuana bajejequi cuana queja, ique catachiti ishu. Tuyu amatu micuanaja ique jadya aishu, —jadyatu Pablora acuaire.

<sup>26</sup> Jadya bacatsutu cien sudaru cuana cuatsashaqui juhuara cuejaticuaire mil sudaru cuana cuatsashaquique:

—Eje bucha tsehue ama bacue tumeque ecuita. Aniya tujatu quiricaju Romaju enaruquique ebacani equiyatique, —jadya tujatu aticuaire.

<sup>27</sup> Mil sudaru cuana cuatsashaquira Pablo bacaduraticuaire:

—¿Yuneridya tuque micue aniya Roma juque quirica cuana?

—Jejee, aniyadya tuque ecue, —jadya tujatu acuaire.

<sup>28</sup> —Jetiama ique chipiru quijehueticuaire Roma juque quirica cuana caquemiti ishu, —jadya tujatu Pablo acuaire.

—Ecuetu tsujetyataqui ama jucuaire, ique Roma-juja quirica cuana aniyaja ebacuaque tibu. Tuque jucuaire baedya ique, —jadyatu Pablora mil sudaru cuana cuatsashaquique acuaire.

<sup>29</sup> Jadya tuque juyaju bacatsutu Pablo catsacara juya cuanaque tuque peque netiya cuanaque netisicuacuare, tunara ejera cuana Pablo nerecaturahuaju ecuejauju. Mil sudaru cuana cuatsashaquiquetu dyaque bajida jucuaire, Roma juque quirica cuanaquique cadena tsehue

risimerehua tibu, jucha metse, jucha metse ama jadique baecuaque risimerehua tibu.

*Pablo israelita cuanaja huaraji arida cuanaja yacuaju eje bucha jucuareque*

<sup>30</sup> Mil sudaru cuana cuatsashaquiquetu baecua jari jucuare eje bucha juatsu israelita cuana Pablo tsehue dyaque ecahuaiti jucuareque. Huecacanucatsu tujatu casitatishanucacuare pae cuanaja huaraji cuana, dutya israelita cuanaja inime cuana bajejequi cuanaque jadya. Casitatishatsu tujatu sudaru cuana acuare:

—Nebecue Pablo ecuana casitatuaju.

Pablo tuhua jutihuajutu sudaru cuana cuatsashaquira israelita cuanaja huaraji cuanaja yacuaju nityacuare.

## 23

<sup>1</sup> Pablорату huaraji cuana petacuare. —Ecue ata cuana, ique taa jida jujacahua ama. Jidaque inime ique cadujutijacaya ama Yusuja yacuaju, —jadya tujatu ecana acuare.

<sup>2</sup> Jadya bacatsutu pae dyaque muidaque Ananías bacani Pablo tsehue dyaque cuita cahuaicuare.

—Ecuatsaju neacue, —jadya tujatu tuque peque netiya cuanaque acuare.

<sup>3</sup> Jadya quisarati bacatsutu Pablora acuare:

—Yusura mique dyaque nerecaturacuedya. Mique ecuita cuana jahue aquique. Miquemi espique eririque jida piji epepa baeque. Iquepa Moisésra cuatsashahua equa ama juya, jadya mira ique ahua. Tumbae cuitadyatu eque catsataqui ama jucha metseque baecuaque. Jutajuju taa mi



midya cuitadya Moisésra cuatsashahua equé ama juya, —jadyatu Pablora acuare.

<sup>4</sup> —Miratu pae dyaque muidaque ijillahuanaya, —jadyatu tuhua jucuare cuanara acuare.

<sup>5</sup> —Ecue ata cuana, nenerecabacue ique. Cueyanehua ama tuque era. Baecua ique juhua tuque pae dyaque muidaque. Bahue juatsu tuque quisarati jadya aquena ama juhua. Jadidya tu Yusuja quisarati ehuene: “Jidama quisarati tsehue aume ecuatsashaquique” jadya, —jadyatu Pablora acuare.

<sup>6</sup> Pablotu bahue jucuare umae huaraji saduceo cuana jucuareque, peya cuana bacue fariseo cuana cuare jadique. Jadya tibudya tujatu fariseo cuana petatsu etsuri jebuda tsehue jadya acuare:

—Ecue ata cuana, ique taa fariseodya. Ecue etatatu fariseodya jucuare. Jucha metse jadya tunara aya, era majutsu ecuana chacha netitsuranucaya jadique ejeneya baatsu, —jadya tujatu fariseo cuana acuare.

<sup>7</sup> Jadya tura quisarati ahuajutu fariseo cuana, saduceo cuana jadya tuna cama caquemitsati, caquemitsati jucuare.

—Ni ai buchiquetu Pablora jidama ahua ama, —jadyatu fariseo cuana jutibunecuaré.

—Aijama, tudyatu jucha metse, —jadyatu saduceo cuana caquemitsaticuaré.

Jadya equetu huaraji cuana dutya tupu nimee ama jucuare.

<sup>8</sup> Saduceo cuanaratu ejeneya ama emaju cuanaque chacha netitsuranucayaque. Ejeneya ama tunajatu barepaju Yusu tsahuaqui cuanaque aniyaque. Ejeneya ama tuna espíritu cuana

aniyaque. Jadya tuna cuji cuita eju jucuare. Fariseo cuana bacue, jida bahue emaju cuanaque chacha netitsuranucabuqueque, barepaju Yusu tsahuaqui cuanaque aniyaque, espíritu cuana aniyaque jadya. Tuna tuna cuji ama jucuare.

<sup>9</sup> Jutaquijudya tuna dutya caquemitsati caquemitsati jucuare. Bape bape tunajatu inime tupu jucuare. Quiqueterecuare tuna. Umae fariseo cuana tuna netitsuracuare quisarati ishu. Tunnaratu pana adebadya acuare Moisésja cacuat-sashati.

—Riyaque ecuitaratu ni ai jidama ahua ama. Ejeque espiritura cuana ni tu isarahua, jadya ama juatsu barepa juque Yusu tsahuaquira, —jadyatu fariseo cuana jucuare.

<sup>10</sup> Jadya bacatsutu huaraji cuana dyaque casada caquemitsaticuare. Dyaque tuna ecahuaiti jucuare peadya cuare peya cuare cuana tsehue. Mil sudaru cuana cuatsashaquiquetu bajida jucuare, Pablo dyaque ujeda eauju. Jadya tibudya tujatu sudaru cuana cuatsashacuare:

—Necuinanashaticue Pablo ecuita ducuque. Nedujunucacue ecuana aniyaju tuhua icuetaquiju, —jadya tujatu ecana acuare.

<sup>11</sup> Tumeque metatu Pablo Ecuana Cuatsashaquira cabamereti ishu acuare.

—Banuchi, Pablo. Bajida juume. Cuejataqui tuque micue Jerusalénju cuanaque ique eje bucha juhuaque. Romaju cuanaque tumbaedy a micue ecana cuejataqui, —jadya tujatu acuare Pablo.

*Israelita cuanara Pablo iyecara acuareque*

<sup>12</sup> Huecacanucatsutu umae fariseo cuana quisaraticuare Pablo eje bucha iyee aishuque:

—Neiyera Pablo. Arama, ijima jadya nejura tuque iyeya tupu. Iyeya ama ni ecuanara, Yusura nenerecaturara, —jadya tuna jucuaire tuna cama.

<sup>13</sup> Jetiama tuna en jucuaire tuque iye ishu. Pushi tunca ecuita dyaque cuitadya tuna jucuaire.

<sup>14</sup> Pablo iye ana aatsu tuna cuacuare pae cuanaja huaraji cuana queja, tumbaedy a israelita emuiba cuana queja, tuna tsehue quisaratira.

—Dutyara tupudya tuque ecuana inime tupuhua Pablo iye ishu. Tumeque iyetsu piisi araara, ijiji jadya nejura. Jadya ama ni ecuana aya, Yusura nenerecaturara.

<sup>15</sup> Jadya tuque ecuana inime bajejehua. Micuana umae huaraji cuanara jadyara nebacacue mil sudaru cuana cuatsashaquique Pablo ecuana queja cuadisha ishu. “Ecuana ratu Pablo quisaratiyaju bacacara aya jari”, jadya neacue. Ecuana ecuana ediji jiruru catehua juya tuque micuana queja junatimajudya iyetsa ishu, —jadya tunajatu israelita cuanaja huaraji cuana aticuare.

<sup>16</sup> Pabloja ebuqueratu bacacuare tumeque ecuita cuanara tuja ecucuque iye ana ayaque. Cuacuaretu ebajarara sudaru cuanaja eanicuareju, Pablo cuejara. Nubitsutu ehue ebari tuatsehue quisaraticuare. Cuejacuare tujatu ai tura bacahuaque.

<sup>17</sup> Pablорatu jadya bacatsu ihuaracuare cien sudaru cuana cuatsashaquique:

–Dujucue riyaque ehue ebari mique cuatsashaqui queja. Aniya tujatu ai cueja ishucue, –jadya tujatu acuare.

<sup>18</sup> Jadya ahujaju tujatu ehue ebari dujucua Claudio Lisias queja.

–Pablo erisi netiyara ihuaramerehua. Bemerehua tura ique riyaque ehue ebari rehua miaqueja, ai tuja cueja ishucue aniya baatsu, –jadya tujatu acuare.

<sup>19</sup> Tumetu Claudio Lisiasra ehue ebari peya queja duju acuare, tura cuejayaque peya cuanara ebacaju.

–¿Ai mira cuejacara aya? –jadyatu Lisiasra bacaduracuare.

<sup>20</sup> –Israelita cuanaratu ecue ecucu Pablo iye ishucue inime bajejehua. Era tuna bacahua tuna cama quisaratiyaju. Metajudya tunarami bacananucaya Pablo micue tuna queja cuadishanuca ishucue. “Pabacanuca ecuana quisaratiyaju”, jadyami israelita huaraji cuanara anaya.

<sup>21</sup> Ejeneume ecana. Jadya ijahuee tunarami acara aya. Pushi tunca cuana ni tuna catehua juya ediji jiruru, ecue ecucu cuetiyaque ihua. “Yusura nenerecaturara ecuana Pablo iyemaque araara, ijiji jadya juyaque juatsu”, jadya tuna jubarehua. Amena tuna ecabajejeti. Mira cuadishayaque bahue juyaque camadya tunajatu ihuaya, –jadya tujatu acuare.

<sup>22</sup> Tumetu Lisiasra isaratsu cuadishacuare:

–Cuejaume ni ejequedya jutidya mira ique bahue amerehuaque.

Jadya cuejatsu tujatu cuadishacuare ehue ebari tuja etareju.

*Pablo Félix queja cuadishatanacuareque*

<sup>23</sup> Ehue ebari diruhuajutu Liasra ihuaracuare beta sudaru cuana cuatsashaquique ecatsé.

—Nebajecue sudaru cuana Cesareaju cuaishu. Las nueve chineju necuinanacue. Beta ciento sudaru nedujucue. Tumbaedyá nedujucue beta ciento nucadya piya junudaque mare bahue cuanaque. Pacarucu tunca tuna cahuayu eque cuanucayadya.

<sup>24</sup> Nebajecue cahuayu Pablo cahuayu dyaque eque cuaishu. Jida narutsu Félix queja nejunati-querécue, Cesarea enaruqui queja. Chacha tuque Pablo junatishacara aya, —jadyatu Liasra acuare sudaru cuanaja huaraji ecatsé.

<sup>25</sup> Liasratu quirica huenequare Felixja ishu, tuna tsehue cuadisha ishu.

<sup>26</sup> “Riya micue quirica cuadishaya, Félix. Miquemi ecuanaja emuique neri enaruquique. Ique Claudio Lias. Isaramereya mique era.

<sup>27</sup> Cuadishaya rique miaqueja peadya ecuita erisique Pablo bacani. Israelita cuanaratu risimerechine. Iyejerichine tunaja tuque. Tuja quirica cuana Roma juque enaruquija ebacani equiyatique bahue juatsu, cuachine ecue sudaru cuana tsehue tuque inajacamerera.

<sup>28</sup> Ique bahue jucara juchine eje bucha juatsu tuna tuatsehue cahuaityaque. Tume tuque dujumerechine israelita cuanaja huaraji cuana ecasitatiju.

<sup>29</sup> Tuque patu Moisésra israelita cuana cuatsashacuare eque ama juya. Jadya ama buchatu tura ni ai jidamaque achine ama ecuanaja cacu-

atsashati eque. Ecue ishü tu tuyu ama risi, etare apudaju isha jadya aishu.

<sup>30</sup> Tume tuque bacatsachine israelita cuanaja amena inime ebajejeque tuque iye ishü. Jadya bahue juatsu tuque miaqueja cuadishaya. Tuque ujeu baqui cuanaque tuna cuejachine: ‘Necuacue Félix queja. Necuejaticue Pablo eje bucha jidama juchineque’ jadya tuna achine tuque inacara juya cuanaque. Riya tupu camadya,” jadyatu Lisiasra quirica Cesarea juque enaruquiija cuadisha ishü huenecuare.

Jadya huenetsu tujatu sudaru cuana tyacuare quirica, Félix tunaja tyati ishü.

<sup>31</sup> Tumetu sudaru cuanara Pablo dujucuaré tuna cuatsashaquira amerehua baedya. Inatsu tunajatu dujucuaré tumeque chineju Antipatriaaju. Cahuayu eque tuna cuacuare.

<sup>32</sup> Peya huecacatu sudaru cuana ehüachi eque cuacuare cuanaque judirunucacuare tunaja eanicuareju. Pablo, cahuayu dyaque eque cuanaque jadya tuna cuacuaredya jutidya Cesareaaju.

<sup>33</sup> Tuhua junatitsu tuna Félix enaruqui queja cuacuare. Tyacuare tuna quirica Lisiasra cuadishahuaque.

—Jeedya Pablo, miaqueja ecuana cuatsashaquira cuadishamerechineque, —jadya tunajatu acuare.

<sup>34</sup> Enaruquiratu quirica isaracuare. Quirica isara amena aatsu tujatu Pablo bacaduracuare:

—¿Ejeque yahua juque mique?

—Cilicia yahua juque ique, —jadyatu Pablora enaruquique acuare.

<sup>35</sup> Tuque jadya bacatsu tujatu jadya acuare:

—Mique ujeu baqui cuanaque junahuaju, mique ihuaramereya mique quicuenetiyaju baca ishu, —jadya tujatu Pablo acuare.

—Neiyacue Herodesja etare eaju. Tuhua nenarucue, tuque ehuanauju, —jadyatu Felixra acuare tuja sudaru cuana.

## 24

*Israelita cuanara Felixja yacuaju Pablo eje bucha juhuaque cuejacuareque*

<sup>1</sup> Pishica huecaca juatsutu pae dyaque muidaque Ananías bacani junaticuare Cesareaju. Umae israelita cuanaja huaraji cuanatu tuatsehue junaticuare. Tumebaedyatu juticuare peadya ecuita eje bucha juhuaque cuejaquique, Tértulo bacani. Tumeque ecuita cuanatu cuacuare enaruquique Félix queja, eje bucha juatsu ecana Pablo tsehue cahuaitiyaque cuejara. Tuna junatihujutu Felixra sudaru cuana queja Pablo quetimerecuare.

<sup>2</sup> Tunara Pablo junatiquerehuajutu Tertulora cuejatibunecuare Pablo eje bucha juhuaque. Isaracuare tujatu Félix:

—Isaraya mique era, enaruqui emuinerique. Mira ecuana dyaque jida naruya tibu, aniya ecuana rehua jida inime tsapema, jidama inime cuanaju nubima. Miquemi dyaque bahueque. Miratu dyaque ahua ecuanaja jida ishu.

<sup>3</sup> Ecuana naruquique, muiya mique ecuanara. Yusurupai mique ecuana aya, dutya ecuanaja jida ishu mira aya tibu, jida ecuana mira naruya tibu.

<sup>4</sup> Bahue ecuana mique dyaque cuita emajaca aijamaque ecuana quisaratiyaju baca ishu. Jadya tibudya nrecabacue ecuana. Riya piji cuita ecuana ijacabacacue.

<sup>5</sup> Jeeque ecuita Pablo ri inime yuamaturaque. Sicacatura bahue tujatu dutya. Turatu bahuityaya iyacuaque bapeque. Jadya juatsu tujatu israelita cuana dutya quejaque cahuitishaya. Tuquetu Jesús Nazaretju anicuare queja ecatyati cuanaque cuatsashaquique.

<sup>6</sup> Turatu Yusuja etare asicaturachine, israelita amaque tuhua nudyatsu. Ecuannaratu becara achine inime jidama cuanaque bajejequi queja, tudya inime metse jadya ama juatsu aijama jadique bahue ishu.

<sup>7</sup> Ecuannara bajejecara ayajutu sudaru cuana cuatsashaqui Lisias ecuana queja cuachine. Dyaque casada tsehue tura ecuana secatichine.

<sup>8</sup> “Pablo ujeu baqui cuanaque tuna cuataqui Félix queja, tuja inime bajeje ishu”, jadyatu juchine. Jadya tibudya ecuana jehua miaqueja, enaruquique. Midya cuitadya tuatsehue quisaraticue. Tuque isaratsumi bahuedya juya tudya inime metseque, ecuanara aya bae cuitadya, — jadyatu Tertulora Félix cuejacuare.

<sup>9</sup> —Tertulotu yuneri quisaratiya, —jadya tuna jucuare dutya israelita cuanaja huaraji cuana tuhua jucuare cuanaque.

*Pablo Felixja yacuaju quicueneticuareque*

<sup>10</sup> Tumetu enaruquira tuja emetucu tsehue piye cuejacuare Pablo quisarati ishu. Jadya juatsutu Pablo quicuenetitibunecuare Felixja yacuaju.



—Isaraya mique era, emuique neri enaruquique. Ique pureama juya micue yacuaju quicuenetiya cabatitsu, mique ecuana naruquique eje uma mara jucuare tibu.

<sup>11</sup> Peadya tunca beta earacana huecaca piji di taa ique Jerusalénju Yusu muira cuachineque. Miquemi bahuedya riyaque yunerique.

<sup>12</sup> Arepa ique Yusuja etareju ama bucha, ni eje tsehue ique cati cati juhua ama. Ecuíta cuana sicacatura ique juhua ama. Ni ejeque buchique tuque Yusuja etareju eje bucha ahua ama, caradati ishuque etare cuanaju, ni eje queja buchique.

<sup>13</sup> Arepa tunara erapa ecuíta cuana sicacaturaya jadya aya ama bucha, yuneri ama tuque. Tunaratu ebamereu ama tunara erapa jidama ahua jadique.

<sup>14</sup> Erami cuejayadya ique eje buchique. Eratu muiya Yusu ecuanaja baba cuanara muicuaque. Muiya tuque era iyacuaque inime eque. Dutya jujeri israelita cuanaratu jeeque iyacuaque inime jidama bucha adebaya. Jadya ama tuque. Eratu ejeneyadya dutya Moisésra huenecuareque, tunara ejeneya baedya. Tumbaedya tuque ejeneya Yusu equeque quisarati cuejaqui cuanara huenecuare cuanaque, tunara ejeneya baedya.

<sup>15</sup> Eratu ejeneya majutsu ecuana dutya chacha netitsuranucabuqueque. Jida cuanaque, jidama cuanaque jadya tuna chacha netitsuranucabuque. Israelita cuanaratu ejeneyadya.

<sup>16</sup> Jadya tibudya eje bucha jida jucara juya Yusu cahuitisha ishu ama ni ecuíta cuana.

17 “Eje uma mara cuana peya yahua queja Jesúsja quisarati cuejayaque junenitsu, juetinucachine Jerusalénju. Juetinucachine ique nrecada cuanaque tunaja ishu chipiru sitachineque tyara, tumbaedyera era tyaana ahuaque Yusu tyara.

18 Umae israelita cuana Asia yahuaaju cuanara bachine Yusuja etareju, ique tuhua ecuanaja bahue quibetira cuahuaju. Casitatishabarechine ama tuque ecuita cuana. Capuritishabarechine ama tuna era.

19 Eatsehue tuhua catsurutichine cuanaque tuna iyacua cuita rehua ama. Tunara ique jidama juchineque cuejacara ayaque juatsu, tuna jetaqui micue yacuaju. Tunajadya ni aniya ique jidamaque juchineque cueja ishu, tunara cuitadya cuejacue.

20 Ique Jerusalénju juchine patya tunara dujuchine israelita cuanaja huaraji cuana dyaque inime metse queja. Umae rena rehuadya iyacua cuita. Tunarami iyacua cuitadya ecuejau tunara ique ni aiju buchique jucha metse bachineque ama.

21 Tunaja yacuajudya ique quisaratichine. ‘Iyacua riyaque huecaca micuanara behua micuanaja yacuaju era emaju cuanaque chacha netitsuranucabuqueque ejeneya baatsudya jutidya’ jadya tuque huaraji ecuatsashaqui cuanaque achine. Era jadya ejeneya baatsu tunara iyacua iquepa jidama juchine jadya aya, —jadyatu Pablora Félix acuare.

22 Felixja patu eje uma baca ea jucuares Jesús queja ecatyati cuanara ejeneyaque. Jutaquiutu aijamadya tumeque huecaca cuejanuca ishucue.

—Neyara jari riyaque quisarati iyacua. Lisias junahuaju tuque bacanucaya micuanara ique cuejacara ayaque, —jadyatu Félix jucua.

<sup>23</sup> Tume tujatu acuare cien sudaru cuana cuat-sashaquique:

—Tachicue jari Pablo. Ujeda ujeda camadya aume. Bacuedya jutidya tuja iyuhueda cuanara bayaju. Patyadya tuna tura ai sareya cuanaque, —jadyatu Felixra acuare.

*Pablo, Félix, Drusila jadyaja yacuaju quicue-neticuaque*

<sup>24</sup> Eje uma huecaca juatsu cuanatu Félix junatinucacuare tuja ehuanegue Drusila tsehue. Tumeque epunatu israelita jucua. Felixratu Pablo ihuaramerecuare. Turatu bacanucacara acuare eje bucha catyatie Jesucristo queja juishuque. Tumetu Pablora pana cueja anucacuare Jesucristo eje buchique, eje bucha catyatie tuaqueja jutaquique.

<sup>25</sup> —Yusuja biji eque ecuana anitaqui. Ecuana taca pana canaruti ecuana jutaqui, tura cuat-sashaya eque juishu. Yusura ecuana aya ecuana cuitadya jutidyapa ecuana capureamaturatitaqui ama. Tuquepa tuque ecuanaja pureamaturataqui jadya. Ejeque huecaca ecuana dutya Yusuja yacuaju cabameretibuque. Tumeque huecaca tura ecuana abuque ejeque jida, jidama jadya, —jadya tujatu ecitse acuare.

Riyaque quisarati bacatsutu Felixra dyaque inime tupucuaque, tuque eje uma jidama juhuaque caadebatitsu.

—Dirucue iyacua. Peya huecaca emajaca aniyaju mique ihuaramerenucaya, —jadya tujatu acuare Pablo.

<sup>26</sup> Felixratu Pablo inajacamerecarama acuare. Eje uma ihuaramere tujatu acuare tuatsehue quisarati ishu. Quinajacamereti ishu Pablora chipiru tsehue etsujetyau bucha tujatu inime jucuare.

<sup>27</sup> Beta mara junucatsutu Félix enaruqui jujacacuare. Enaruqui jujacatsu tujatu Pablo inajacamerecuare ama, israelita cuana tsehue jida jucara jucuaire tibu. Porcio Festotu Cesareaju enaruqui jutibunecuare Félix cuarequi.

## 25

### *Pablo Festoja yacuaju dujutanacuareque*

<sup>1</sup> Tumetu Festo judirucuaire Cesareaju, tumeque yahuaju aniya cuanaque narutibune ishu. Quimisha huecaca juatsutu cuinanacuare tumeque epu juque Jerusalénju cuaishu.

<sup>2</sup> Tuque junatihuaajutu pae cuanaja huaraji cuana tsehue, israelita cuana dyaque inime metse cuanara jadyatu Pablo jidamapa ejuu jadya cuejacuare, Pablo tsehue dyaque cahuaitiya tibu.

<sup>3</sup> —Nerecabacue ecuana. Pablo quetimerecie. Pajunanuca Jerusalénju, —jadya tunajatu Festo acuare.

Jadya tunajatu acuare, tunara Pablo Cesareaju, Jerusalén dijiyu iyecara aya tibu.

<sup>4</sup> Festora tuna acuare:

—Aijama, Pablo paani jari Cesareaju. Ejetsunue juatsu ama tuhua judirunucaya.

<sup>5</sup> Umae huaraji cuanatu eatsehue cuataqui. Pablo ni aiju jidama juchine, necuejacuedya ique tuhua tuque eje bucha juchineque, —jadya tujatu ecana acuare.

<sup>6</sup> Peadya tunca huecaca Jerusalénju aninucatusutu Festo Cesareaju dirunucacuare. Peya huecacatu nubicuare enaruquiija inime bajeje ishuj. Nubitsutu tuhua anibutecuare.

—Nebecue requeja Pablo, —jadya tujatu sudaru cuana acuare.

<sup>7</sup> Israelita cuanaja huaraji cuana tuatsehue Jerusalén juque judiruhua cuanaque tuna tuhua casitaticuare. Sudaru cuanara Pablo juquerediruhua jutu israelita cuanara jipeticuare. Tunaratu Pablo jidama juchineque cuejatibunecuare:

—Pablratu dyaque jidamaque ajacaya ama, —jadya tuna jubarecuare.

Jadya ama bucha

—¿Ai cuita jatsu tujatu jidama ahua? —jadya Festo juyaju, ai cuejataqui ama tunajatu bacuare.

<sup>8</sup> Pablotu jadya jucuare tuta taca catachiti ish:

—Eratu ni ai jidamaque ahua ama. Ique israelita cuanaja cacuatsashati eque anijacahua ama. Ique Yusuja etareja ish jidama quisaratihua ama ni riya piji buchique. Eratu ni ai buchique jidama ahua ama Romajuque enaruqui tsehue, —jadya tuna Pablora acuare.

<sup>9</sup> Festoratu israelita cuana pureamaturacara acuare. Jadya tibudya tujatu Pablo jadya bacaduracuare:

—¿Cuacarami juya Jerusalénju, tuhua ecue yacuaju quicueneti ish? —jadyatu Festora acuare.

10 –Ajjama. Cuacarama juya tuhua. Riyadya ique micue yacuaju. Ique iyacua cuita Roma juque enaruquira mepehuaja yacuajudya. Rehuadya bacacue ique quicueneti ishu quisaratiyaju, Jerusalénju ama. Ique ni riya piji buchique israelita cuana tsehue jidama juma. Miratu adebayadya riyaque.

11 Ique ni huaraji cuanara cuatsashaya eque ama juya, ique ni aiju jidama juhua, tume tunara paiyedy. Majucarama amadya juya ique. Yuneri ama ni tunara ique eje bucha juhua jadya ayaque, jutaqui ju taa ique aija buchique inatsu tuna queja tyataqui ama. Cuadishacue jutidya ique Roma juque enaruquique dyaque arida queja. César queja cuadishacue. Tura ique pacueja jucha metse, jucha metseque ama jadique, –jadyatu Pablora Festo acuare.

12 Festotu quisaraticuare tuja dyaque bahue cuana tsehue. Quisarati amena juatsutu:

–“Cuadishacuepa ique César queja. Tura ique pacueja ique jucha metseque, jadya ama juatsu aijama jadique”, jadya mira ahua. Jutaqui ju jadya mique aya. Tuequedy mique cuadishaya, –jadya tujatu Pablo acuare.

*Festo ecuari Agripa tsehue Pablo eje buchique quisarati aquerecuareque*

13 Eje uma huecaca juatsu cuanatu ecuari Agripa, tuja enajique Berenice tsehue, junacuare Cesareaju, Festo isarara.

14 Tuhuadya tatse eje uma huecaca jucuar. Tuque tuhuajudyatu Festora cuejacuare Agripa, Pablo eje buchique:

—Rehuari aniya ecuita erisique Pablo bacani. Felixratu risimerecuare. Tuque enaruquique ju-jacayara tujatu inajacamerechine ama.

<sup>15</sup> Ique Jerusalénju juchine patya pae cuanaja huaraji cuana, tumbaedyá israelita cuana emuiba cuanaque jadya tuna jechine eaqueja. Tunaratu Pablo bijidamadura neri aya. Tumeque ecuita patu jidama juchine. Iyemerecuapa.

<sup>16</sup> Jadya bacatsu tuna jadya achine: “Tuyu ama tu ‘Pamaju’ jadya aishu, quicueneti ishú emajaca tyamaque jidamatu juchine jadya cuejaqui cuanaja yacuaju. Romajuja cacuatsashati eque tuque ecuanaja “Pamaju” jadya ataqui ama, tuque icuene quicueneti ishú quisaratishamaque.

<sup>17</sup> Tume tuna jechine rehua. Tuna requeja jehuaju ique tsunutachine ama tuna baca ishú. Huecacape piji cuitadya cuachine ecue inime bajeje ishúju. Tuhua anibutetsu tuque ecuita que-timerechine.

<sup>18</sup> Tume tunara cuejachine tuna ecahuaiti tibudya jutidya. “Riyaqueri Roma juque enaruquija cacuatsashati eque ama juhua”, tunara jadya aya bucha tuque ecue inime juchine.

<sup>19</sup> Jadya eauque, tuna achine: “Pablóratu Yusu muiya ecuanaja baba cuanara ecuaná amerecuare eque ama. Tuquetu ejeque Jesús bacani queja nimeeque cuana. Tumeque Jesús tu majuhua. Pablóra bacue aya: ‘Majuma tuque. Chacha tu enetitsuranuca’ jadya”, jadya ique israelita cuanara achine Pablóju.

<sup>20</sup> Eratu adebataqui ama cuita bachine dutya riya cuanaque. Jadya tibudya tuque Pablo bacadurachine: “¿Cuacarami Jerusalénju juya? ¿Cata-

chiticarami juya tuhua ecue yacuaju?” jadya Pablo bacadurachine.

<sup>21</sup> Pablotu Jerusalénju cuacarama juchine. “Cuadishacue ique César queja. Tura ique pacueja ique jucha metseque, jadya ama juatsu aijama jadique”, jadya tura achine. Tume tuque ecue sudaru cuana cuatsashachine: “Jida nenarucue riyaque erisique. Tuequedya tuque Romaju César queja cuadishaya”, jadya tuque sudaru cuana achine, —jadyatu Festora Agripa acuare.

<sup>22</sup> —Eratu bacacaradya aya quisaratiyaju tumeque ecuita, —jadyatu Agripa acuare.

—Jidadya. Metajudya tuquemi quisaratiyaju bacaya, —jadyatu Agripa acuare.

*Pablo Agripa, Berenice jadyaja yacuaju nity-  
atanacuareque*

<sup>23</sup> Huecacatsutu juticuare Agripa, Berenice tsehue huaraji cuana jidamaque inime bajeje ishu caradati bahue etareju. Cajututicuarepa tatse ejutuqui jida tsuje arida tsehue. Sudaru cuanaja huaraji cuanara tatse tajicuare. Tumbaedyu epu ebariju ecuita cuana dyaque inime metse cuanaque tuna tatse tsehue nubiticuare. Festotu tuhuadya jucuaru. Turatu quetimerecuare Pablo.

<sup>24</sup> Festoratu dutya tuhua ecasitati cuanaque isaracuare:

—Isaraya mique era, ecuari Agripa. Isaraya micuana era, ecuita cuana ecuanaja epu aridaju inime metse cuanaque. Riyadya riyaque ecuita riyaquedya rique ecuana bacani bacachine. Ique Jerusalénju, eje uma israelita cuanatu eaqueja jutichine, riyaquepa jidama juchine jadique cuejara. Tuna tuna jechine rehua tuque jucha metse



jadique cuejanuca ishu. Cuejajacama tunara aya tuque iyemere ishu.

<sup>25</sup> Quisaratiyaju bacatsu, ecuetu inime juya: “Turatu ni ai buchique jidama achine ama tuque iyetana ishu.” Tura cuitadya ique bacachine Romaju cacuadishamereti ishu, enaruqui Cesarja jucha metse, jucha metse ama jadique cuejatsa ishu. Jadya tura ique bacahua tibu, tuque cuadishayadya César queja.

<sup>26</sup> Cuadishataqui tuque ecue quirica, eje bucha juatsu tume erisique era cuadishayaque pana cueja aishu. Jadya ama bucha, ai eje buchique huenetaqui ama era baya, ique tura ai jidamaque achineque baecua tibu. Jadya tibudya micuana ihuarahua casitati ishu, micuanaja tuque quisaratiyaju baca ishu. Miaqueja neri neri micue yacuaju rique bemerehua, ecuari Agripa. Micuanara dutyara bacahuaju ni tura ecuejau eje bucha ecue quirica Cesarja ishu cuadisha ishu.

<sup>27</sup> Eje bucha cuadisha ataqui ama ejeque erisique jidama ejuque ecuejaque, —jadyatu Festora huaraji cuana acuare.

## 26

*Pablo Agripaja peya huaraji cuanaja yacuaju jadya quicueneticuareque*

<sup>1</sup> Tumetu Agripa isaracuare:

—Iyacua cuita quicueneti ishu quisaraticue.

Jadya ayajutu Pablora ebi huesacuare ecuari isara ishu. Tuque jucuaqueque tujatu quisarati atibunecuare:

<sup>2</sup> —Isaraya mique era, ecuari Agripa. Ique pureama juya, micue yacuaju quisaratiya cabatitsu. Miquemi huaraji dyaque emuique. Israelita cuanara achine, erapa jetiama ai jidama cuanaque achine jadya. Jidadya tu ique micue yacuaju quicueneti ishu, tunara ique eje bucha juchine jadya ayaque pusha pushaque mique bahue juishu.

<sup>3</sup> Ecuari Agripa, miratu jida adebaya ecuana israelita cuanaja bahue. Miratu adebaya ecuana eje buchique caquemitsati caquemitsati ishu ayaque. Jutaquiju nerecabacue ique; ique quisaratiyaju cahuaitema baca acue, —jadyatu Pablora Agripa acuire.

*Pablo Jesús queja catyatimajariju eje bucha anie jucuaireque cacuejaticuareque*

<sup>4</sup> Pablotu cacuejatinucuire:

—Dutya israelita cuanaratu adebayadya ique yuequedya Moisésja cacuatsashati eque jucacuareque ama. Ecue epuju cuitadya, tumbaedy Jerusalemju jucacuare ama ecuana baba cuanaja bahue cuana eque.

<sup>5</sup> Riyaque israelita cuanara cuejacara aatsu, pacueja; ique quisaratiyaque tu yunerique. Tunaratu adebayadya ique yuequedya fariseo jucuaireque. Peya cuare israelita cuana bucha dyaquetu fariseo cuana cacasatiya cacuatsashati cuana eque ani ishu.

<sup>6</sup> Béru yuequedya patu Yusura acuire israelita cuana: “Eratu emaju cuanaque chachanityatsuranucabuque” jadya. Eratu pana ejenedya aya Yusura eje bucha aana acuireque

adadibuqueque. Era jadicque ejeneya baatsu tunara micuanaja yacuaju behua.

<sup>7</sup> Dutya jujeri israelita cuanaratu ejeneya Yusura dutya emaju cuanaque chacha nityatsuranucabuqueque. Peadya tunca beta earacana Israelja ebacua cuanaque eque ejuracana cuanaratu jadicque ejeneya. Jadya tibudyatu ecuana israelita cuanara Yusu muijacaya ama. Huecada tupu, meta tupu jadya tuque ecuana merejacatsu ama mereya. Amena iyacua, ecuari Agripa, riyaque israelita cuanara “Iquepa jidama juya” jadya aya, era Yusura emaju cuanaque chacha nityatsuranucabuque jadicque ejeneya baatsu, —jadyatu Pablora Agripa cuejacuare.

<sup>8</sup> —¿Eje bucha juatsu jatsu tuque micuana Yusura emaju cuanaque chacha nityatsuranucayaque ejeneya ama? —jadyatu Pablora tuhua cuanaque acuare.

<sup>9</sup> Pabloratu Agripa cuejanucacuare, dutya tuhua cuanara quisaratiyaju bacayaju:

—Icuenetu era Jesús queja ecatyati cuanaque dyaque jidama acuare. Eratu jida bucha bacuare, Nazaretju anicuaque queja catyatiya cuanaque jidama au.

<sup>10</sup> Ijahue jahue tuna era acuare Jerusalénju. Jetiama tuna etare apudaju ishamerecuare Jesús queja ecatyati cuanaque. Jadya tuna acuare pae cuanaja huaraji cuanaja yanaju. Jesús queja ecatyati cuanaque iyetanayaju, ique dyaque pureama jucuare.

<sup>11</sup> Eje uma nerecaturae tuna ahua Jesús queja nimee amerejacacara aatsu. Casada tsehue tuna

“Jesús tu Mesías ama” jadya amerecara ahua. Nubinubini bahue juhua caradati ishuque etare cuanaju tuna sare juyaque. Dyaque nime jidama ecahuaiti ique juhua tuna tsehue. Japada epu cuanaju cuabahue juhua tuna sarera. Daditsu tuna ecue nerecatura bahue juhua, –jadya tuna Pablora acuare.

*Pablo eje bucha cacuairetie inime jucuaireque cacuejaticuaireque*

*(Hch 9.1-19; 22.6-16)*

<sup>12</sup> Pablo cacuejatinucacuareque:

–Peya huecaca ique cuacara jucuaire Damascoju Jesús queja ecatyati cuanaque inamerera. Pae cuanaja huaraji cuanara cuatsashacuare jadya ique juishu.

<sup>13</sup> Ique jadya jucuaireque mique cuejaya, ecuari Agripa. Ediji eque cuayaque barepatya cuana ni barepa eque huecara pana udatilla atsacuare. Tumeque huecatu jucuaire ijete bucha dyaque huecada. Udatsacuare tura ique, eatsehue cuaya cuanaque jadya.

<sup>14</sup> Dyaque cuita bajida juya tibu ecuana huipuchitanatsu yahuaju rumucuta rihui jucuaire. Tume Ecuana Cuatsashaquira isaracuare hebrea yana eque: “Saulo, Saulo, ¿eje bucha juatsu mira nerecaturaya? Mira ique bijidamadurayaquemi mita tacadya jutidya jidama catiya. Juye tuta tacadya jutidya enimetsequera muyayaju acui tapatsu ujeda ecatimereu buchique mique”, jadya tura acuare.

<sup>15</sup> “¿Aira isaraya?”, jadya tuque acuare. “Ique Jesús, idya mira nerecaturayaque.

<sup>16</sup> Netitsuracue. Erami mepehua ique merequi juishu. Mepehua mique era, peya cuana micue mira ique bahuaque cueja ishu. Cuejacue ecana mique era eje bucha ameredadiyaque.

<sup>17</sup> Mira tuna ique eje buchique dutya queja cuejadadiya. Narubuque mique era, israelita cuanara, israelita ama cuanara jadya eiyeju.

<sup>18</sup> Israelita ama cuana queja cuita mique cuadishaya, ecue quisarati yunerique cuejati ishu. Cuadishaya mique era, tuna Yusura cuatsashaya eque jujaca ishu ama, tuna Yusuja biji eque anisha ishu. Cuadishaya mique era, tuna Satanásra cuatsashaya eque jujacatsu, Yusura cuatsashaya eque camadya ani ishu. Cuadishaya mique era, tuna eaqueja catyati ishu. Tuna eaqueja catyatiyaju tunajatu Yusura jucha cuana apupashaya. Tura tuna tyadadiya jidaque tura tuja cuanaque tyaana ahuaque”. Jadya eque Jesúsra cuadishacuare riyaque quisarati cueja ishu, –jadyatu Pablo cacuejaticuare.

*Pablo Yusura amereya eque jucuaque cacuejaticuareque*

<sup>19</sup> Pablo quisaratinucacuareque:

—Acuaredya tuque Jesúsra barepa juque cabameretitsu tura amerecuareque, ecuari Agripa.

<sup>20</sup> Jadya juatsu catibuticuare Jesúsja jidaque quisarati, Jesús eje buchique cueja. Icuene cuita tuna Damascoju aniya cuanaque cuejacuare. Tuequedya tuque Jerusalénju aniya cuanaque, Judea yahuaju aniya cuanaque jadya cuejacuare. Israelita cuana, israelita ama cuanaque jadya tuna

Jesúsja quisarati cuejaajecuare. “Necacuareticue inime. Nebijiseriume cajuchati. Jesús queja necatyaticue. Jidaque neacue, peya cuanara yuneridya micuana Jesús jaque juishu inime cacuaretihuaque baishu”, jadya tuna cuejajacacuare ama.

<sup>21</sup> Jadya cuejae quisarati aya tibu, israelita cuanara inacuare Yusuja etareju. Iyecara ebari tunara acuare, era Jesús eje buchique cuejaya baatsu.

<sup>22</sup> Jadya ama bucha Yusura tsahuajacahua ama, ni narujacahua ama. Iyacua ique Jesúsja quisarati cuejacuejani juya. Inime metse cuanaque tumbaedy ecuita jetiedya cuanaque jadya tuna era cuejaya. Cuejaya tuque Moisésra huenecuareque. Cuejaya tuque tumbaedy Yusu equeque quisarati cuejaqui cuanara huenecuareque. Era cuejayaque ri tunara, jadyatu judadiya, jadya acuareque.

<sup>23</sup> “Mesías patuna nerecaturadadiya. Iye jadya patuna abuque”, jadya tuna jucuaré. Tuquepa icuene emajuque netitsurabuque, majunuca ishu ama. Turapa Yusu queja judiru ishucue quisarati tsapebuque israelita cuana, israelita ama cuanaque jadya. Ude tsehue udatsu ecuanara eje eque cuayaque ebau bucha, jadyapa tura ecuanara Yusu queja judiru ishucue bahue amereya, jadya tuna jucuaré. Jadya tunajatu béru yuequedyadya huenecuare, —jadyatu Pablora cuejacuare Agripa, tuhua jucuaré cuanaque jadya.

*Pablora Agripa Jesús queja catyatishacara acuareque*

<sup>24</sup> Festoratu baca anicuare Pablora quicueneti ishü quisarati ayaju. Tuque jadya quisaratiyajutu Festo jebuda quisaraticuare:

—¡Miquemi equijahuati, Pablo! Riya cuanaque dyaque inime tupurami quijahuatishaya, —jadya tujatu acuare.

<sup>25</sup> —¡Aijama. Equijahuati ama ique, ecue emuique enaruquique Festo. Era inime tupuyaque tu yunerique. Dyaque bahue cuanara inime tupuyaque tume.

<sup>26</sup> Riyadya rehua ecuari Agripa. Bajida tsehue ama tuja yacuaju quisaratiya. Turatu adebayadya ique yuneri quisaratiyaque. Turatu adebayadya Jesús eje bucha juhuaque. Etehua amatu jadya juhua, dutyaja yacuaju, —jadyatu Pablora Festo acuare.

<sup>27</sup> Tuequedyatu Pablora ecuari Agripa isaranucacuare:

—Ecuari Agripa, ¿ejenyadyami beru Yusu equeque quisarati cuejaqui cuanara huenequareque? Eratu adebaya mira ejenyaque, —jadyatu Pablora acuare.

<sup>28</sup> Agriparatu quemitsacuare:

—Riya piji bacameretsu Jesucristo jaque amereya bucha tuque micue inime juya, —jadya tujatu Pablo acuare.

<sup>29</sup> —Dyaque jidami Jesucristo queja catyatitaqui, iyacua cuita, jadya ama juatsu eje tupu. Dyaque jida taa mique cuita camadya ama, dutya rehua cuanaque tumbaedyä tuaqueja ecana ecatyatiu. Ique Yusu queja bacabacajacaya ama dutya micuana tuaqueja catyati ishü, ique tuaqueja ecatyati bucha. Jadya ama bucha, era micuana

ique bucha erisi amerecarama aya, –jadyatu Pablora acuare.

<sup>30</sup> Pablo jadya quisarati amena juhuajutu Agripa, Festo, Berenice, tuhua anibutecuare cuanaque jadya netitsuracuare, tuhuaque cuinana ishu.

<sup>31</sup> Cuinanayaque tunajatu quisarati acuare dutya tunara quisarati bacahua cuanaque.

–Riyaque ecuita Pablo ri jidaque. Tuquetu eje bucha ama juchine iyetana ishu, ni etare apudaju ishataqui ama, –jadya tuna jucuar.

<sup>32</sup> –Juquena ama juchine “Roma juque enaruqira ique pacueja yuneridya ique jucha metse, jucha metse ama jadique”, era taa tu einajacamereu tumeque, –jadyatu Agripa Festo acuare.

## 27

### *Festora Pablo Romaju cuadishacuareque*

<sup>1</sup> Bajejecuare tunajatu inime Pablo Italia yahuaju cuadisha ishu. Ique cuacuare tuna tsehue. Pablo, peya erisi cuanaque jadya tuna Julio bacani queja catyati atanacuare. Juliotu cien sudaru cuana cuatsashaquique jucuar. Sudaru cuana tura cuatsashacuarequetu “Roma juque ecuarija sudaru cuana” bacani jucuar.

<sup>2</sup> Cuacuare ecuana Andramito ebuteju. Tuhua junatitsu ecuana anibutecuare cuaba ebariju. Tumeque cuaba ebaritu jaratsuraajetaqui jucuar eje uma ebute cuanaju Asia yahuaju. Tuequedya ecuana cuinanacuare ebute juque. Aristarcotu ecuana tsehue cuacuare. Tuquetu



Tesalónica epu juque jucuare, Macedonia yahua juque.

<sup>3</sup> Peya huecaca ecuana junaticuare Sidón epuju. Julioratu Pablo dyaque tuja canerecabati tsehue bacuare. Emajaca tujatu tyacuare tuque cuajiti ishü tuja eadeba cuana tsehue tumeque epuju, tura ai sareya cuanaque tunaja tyatsa ishü.

<sup>4</sup> Tuequedya ecuana cuinanacuare Sidón juque. Tuhuaque cuinanayaquetu cuejiji jucuare ecuana queja peitana. Jutaquijudya ecuana cueticuare beni diji equé amaca equé ecububu Chipre bacani jiruru equé, cuejiji casadama jipeneé juya equé.

<sup>5</sup> Riquecuare tuque ecuana enaja ecuaque Cilicia, Panfilia jadya jiruru tuyu equé. Junaticuare ecuana epu Mira bacaniju, Licia yahua juque.

<sup>6</sup> Tuhua ecuana tumeque cuaba juque cuinanacuare. Tuhuadyatu sudaru cuana cuatsashaquique bahue jucuare tumeque ebuteju peya cuana jarayaque, Alejandría juque junahuaque. Tumeque cuabatu Italia yahuaju cuayaque jucuare. Tuhuadya ecuana cuabaju iyabutyacuare Italiaju cuanuca ishü.

<sup>7</sup> Cuejijira acuatsuruya tibu ecuana eje uma huecaca inime equé piji cuaba tsehue ajecuare. Dyaque masada tsehue ecuana Gnido barecuare tuhua jaratsuramaque. Cuejijija inime ecuana tuyu cuataqui ama cabaticuare. Jadya tibu ecuana cueticuare Creta ecububu beni diji equé amaca equé, cuejiji dyaque cuita ama juya equé. Salmón tuyu equé ecuana cueticuare.

<sup>8</sup> Chamacama ecuana cueticuare tuyu cueti Creta jiruru equé. Chamacama ecuana jaratsuracuare ebuteju. Tumeque ebutetu “Capeneti

Ishuque Ebute” bacani jucuare. Tumeque ebutetu jucuare Lasea epu peque.

<sup>9</sup> Dyaque cuita ecuana tsunutacuare. Yusura jucha cuana apupashayaque adeba ishuque chinetu amena ecueti jucuare. Ena eque eju cuaishuque dyaque mudaque maratu jueticuare. Cuejipa cuana juyaque maratu amena jueticuare, nei tumbaedy. Mudaque adebaya tibu tuna Pablora jida cuejacuare:

<sup>10</sup> —Tata ecana, eratu dyaque muda baya ena eque cuanuca ishu. Cuabatu enubiu. Dutya ai cuabaju dujuyaque tuque ecuana eaputashau cuana. Ecuana cuitadya ecuana huiditsu emajuu, —jadya tuna Pablora acuar.

<sup>11</sup> Cuaba metseque, tuque aquereniquique tatse jadya jucuare:

—Aijama. Mudamatu juya. Necuanucaradya riyaque ebute juque, —jadya tatse jucuare.

Sudaru cuana cuatsashaquiratu tatsera cuejayaque jutidya bacacuare, Pablora cuejayaque ebacauque.

<sup>12</sup> Ebute ecuana jaratsurayaquetu jidaque ama jucuare cuaba jara ishu, dutya huecaca cuejipa cuana juya tibu. Jadya tibutu dutyajadya inime jucuare:

—Dyaque jida necuinanaradya rehuaque. Necuanucara peya ebuteju riyaque ecububu juque. Fenice ebuteju necuara. Tuhua necuetishara cuejipa cuana badaque mara cuana, —jadya tunajatu inime tupucuar.

Tumeque ebutetu nei diji, beni diji ecatse patya majaca jucuare.

### *Cuejipa jueticuareque*

<sup>13</sup> Cuejiji casadara ama inime equera piji adadi-huaju, tunajatu inime jucuar:

—Necuaradya jutidya —jadya.

Tume ecuana cuanucacuare ebute juque Creta cububu jiruru eque.

Jadya tibudya tunajatu huesacuare metal bicuedaque ena ducu eque cuaba ina ishuque. “Capeneti Ishuque Ebute” juque cuinanatsu ecuana cuaba eque ajenucacuare Creta cububu peque eque.

<sup>14</sup> Yaratupu juatsutu peya eque amaca eque cuejipa juetinucacuare. Acuatsuru jida tura ecuana acuare. Nei diji eque amacaquetu tabubu jueticuare.

<sup>15</sup> Tumeque cuejipa casadaratu cuaba ebari tibene duju atibunecuare. Acuatsurutaqui ama ecuana bacuare cuejipa. Jutaqui ju ecuana cuejipa queja cadujumereticuare.

<sup>16</sup> Cueticuare ecuana ecububu ashaasha Claudia bacani jiruru eque. Tumeque ecububuja beni diji eque amaca cuetiyajutu cuejipa casada cuita ama judirucuare ecuana queja. Cuaba ebari tadajutu cuaba caca piji erisi jucuar. Tumequetu cuaba ebari juque ai butyatsu mejijiju rada ishuque jucuar. Chamacama tsehuetu cuaba ebariju mere juya cuanara cuaba caca piji huanasicuacuare epucutanatereju.

<sup>17</sup> Tsurashacuare tuna ebarucue educuju. Tuequedya tuna ebajarara cuaba ebari soga arida cuana tsehue huayucuare, cuaba ebari catsatanatsu epucutanatereju. Anicuaretu emajaca deda cuita ama cuanaque, emajaca

cuana patya mejijiquique. Tume cuanaque catsaqui juatsu cuaba ebari enubiuju tuna bajida jucuaire. Jadya tibudya tunajatu cuaba ajeshaquique eraca junuda misida jadique butyacuare, cuejipara cuaba ebari mejiji queja duju eauju. Jadya cadujumeretie ecuana jucuaire cuejiji queja.

<sup>18</sup> Cuejipa netiya ama baatsu tunajatu huecacsu ijehuetibunecuare tunara cuaba ebariju dujuya cuanaque.

<sup>19</sup> Huecacanucatsutu cuabaju mere juya cuanara cuitadya tunaja emetucu tsehue ijehuebarecuare cuaba ebariju dujuya ai aquereniya cuanaque, cuaba jatatsusha ishu. Enaju tunajatu ijehuecuare umae acui cuana, sogu cuana, eraca junuda misida cuana cuaba ebari aquereni ishu erihua cuanaque jadya.

<sup>20</sup> Eje uma huecaca tuque ecuana bacuare ama ijeti. Eje uma meta tuque ecuana bacuare ama purari cuana. Majuya bucha ecuana cabaticuare, cuejipa casadaque netiya ama baatsu.

<sup>21</sup> Eje uma huecaca ecuana arama jucuaire. Tumetu Pablora isaracuare dutya cuaba ebariju cuanaque:

—Tata ecana, cuejachinedya datse micuana era “Capeneti Ishuque Ebute” bacaniju jaratsura ishu jari. Micuanaradya bacacarama achine. Cuinananucataquimadya datse ecuana juchine tumeque ebute juque. Tuhuaque cuinananucachineque ama juatsu micuana caaputashatiquena ama juquena juhua dutya riyaque cuabaju dujuya cuanaque, cuaba aquereni ishu cuanaque dyaque saretanaya

cuaunque jadya. Majujeriquena ama ecuana juquena juhua.

<sup>22</sup> Necanimehuallatiume. Ni ejeque buchique ecuana majuya ama, arepa cuaba ebari nubitsu aputaya ama bucha.

<sup>23</sup> Chineju barepa juque Yusu tsahuaquira cabamereti ishu ahua. Yusu Nerira cuadishayaquetu juchine. Ique tumeque Yusu jaque. Eratu tumeque mereya.

<sup>24</sup> Isarahua tura ique: “Bajida juume, Pablo. Miquemi cabameretitaqui enaruqui dyaque arida queja. Romajumi jutitaqui. Yusu dyaque jida juya tibu, turami naruya. Turami majushaya ama ni ejeque miatsehue cuaya cuaunque”, jadya tumeque barepa juque jehua cuejanahua.

<sup>25</sup> Tata ecana, necacasaticue. Ique Yusu queja nimee. Eratu ejeneya. Juyadyatu tura barepaju etsahuaqui eque cuejamerehua bae cuitadya.

<sup>26</sup> Yusura ecuana naruya, arepa cuaba ecububu catsaqui juya ama bucha, –jadya tuna Pablora acuaire.

<sup>27</sup> Jadya jue ecuana mudaju peadya tunca pushi earacana huecaca judirucuaire. Chamacama ecuana ena Adriático bacaniju judirucuaire. Peya queja, peya queja duju jadya tucue ecuana cuejipara acuaire. Meta patyatu cuaba ebariju mere juya cuaunque bahuedya jucuaire ecuanara yahua jipeajeyaque.

<sup>28</sup> Tupucuaire tuna ena eje deuque. Quimisha tunca shucuta earacana metrotu jucuaire. Riya piji cuanucatsu tunajatu tupunucacuaire enaja dee. Deda cuita amatu jucuaire. Jucuairetu beta tunca pacarucu earacana metro dyane.

<sup>29</sup> Bajida tuna jucuaire cuaba ebari tumu ebari cuana ejiruruju catsaqui ejuuju. Jadya tibudya tunajatu butyacuare pushi metal bicueda cuanaque cuaba nitya ishu. Bucucunucacuare amatu cuaba ebari. Tuhuadyatu neticuare.

<sup>30</sup> Cuaba ebariju mere juya cuanaque tuna huanacara jucuaire. Cuaba caca tunajatu enaju butyacuare, tuatsehue huana ishu. Ijahue acara tuna acuare tuna cuatsashaqui cuanaque.

—Cuaba huitu quejaque metal cuaba nityaunque butyara ecuana cuaya, —jadya tunajatu acuare tuna cuatsashaqui cuanaque, pusha pusha ayaque.

<sup>31</sup> Pablotu bahuedya jucuaire tuna huanacara juyaque. Jadya tibu tujatu Julio sudaru cuana cuatsashaunque cuejaticuare:

—Tumeque cuabaju mere juya cuanaque tuna huanacara juya cuaba juque. Tuna ni cuinanaya, dutya micuana enaju majutereya, —jadya tujatu aticuare.

<sup>32</sup> Jutaquijudyatu sudaru cuanara tubucuare soga cuaba caca risiquique. Tubuhuajutu cuaba caca enaju pacacacuare. Pacacahuajutu ejurira japada dujucuare.

<sup>33</sup> Apudajudya tuna Pablora dutya cuejahuecacuare tunaja ai cuana piji ara ishu:

—Amena micuana peadya tunca pushi earacana huecaca dyaque ai bijiseri juyaque. Ni ai buchique micuanaja tupu eara.

<sup>34</sup> Araarataqui micuana cacasati ishu. Tsapeume inime. Ni ejeque buchique ecuana majuya ama. Dutyadya ecuana chacha juya, —jadya tuna Pablora acuare.

<sup>35</sup> Tuna jadya aatsutu Pablora inacuare pan. Inatsu tujatu yusurupai acuaire Yusu dutyaja yacuaju. Yusurupai aatsu tujatu cuesicuare. Cuesitsu tujatu aracuare.

<sup>36</sup> Tuque araaraya baatsu tuna cacasatitsu dutyadya araaracuare.

<sup>37</sup> Dutyaque ecuana jetiama ecuita cuaba ebariju jucuare. Beta ciento pacarucu tunca shucuta earacana ecuita ecuana jucuare.

<sup>38</sup> Araaracuare ecuana jequeya tupu. Araara amena juatsu tunajatu ijehuecuare enaju jetiama trigo bacani tunara dujuya cuanaque, cuaba jatat-susha ishu.

### *Cuaba ebari enaju nubicuareque*

<sup>39</sup> Huecacahuajutu cuabaju mere juya cuanara ecuabata bacuare japada. Baecua tuna jucuare ecuana ejuque. Adebataqui ama tuna yahua bacuare. Bacuare tunajatu mejiji camadya.

—Mejijiju cajipetishatsu quidutishacara neara cuaba, —jadya tuna jucuare.

<sup>40</sup> Cuanuca ishu ecana cabajejeticuare. Tubucuaire tuna sogu cuana ena ducu eque cuaba inaquique metal tisu. Soga cuana tubuhajutu metal bicuedaque enaja ecuaque dedaju pacacuaire. Pisubarecuare tuna etaruqui ecitse cuaba tibu quejaque tatse tsehuedya inaajenuca ishu. Nityatsuranucacuare tuna cuejijiju eraca junuda misida icueneque cuejijija cuaba bucusha ishu. Tumetu cuaba jipetanaajecuare ejiruru queja.

<sup>41</sup> Cuejijiratu cuaba ebari cuinanashacuare beta ejuri dijiju. Mejiji etihuesu catsaquitu jucuare.

Cuaba ebari huitutu mejijju caretacuare. Bucucunucataqui amatu cuaba jucuare. Cuaba ebari tibutu patsatana jida jucuare, ena pacu casadaradya jutidya. Jadya juhuajutu cuaba ebari inime eque nubiajecuare.

<sup>42</sup> Sudaru cuanaratu erisi dujuya cuanaque iye-cara acuare, betsayaque tuna ehuanau bucha adebatsu.

<sup>43</sup> Sudaru cuana cuatsashaquiratu Pablo iye-merecarama acuare. Jadya tibudya tujatu ecana iyemerecuare ama. Betsa bahue cuanaque tujatu enaju pacacashamerecuare, uhuaju icueneta judiru juishu.

<sup>44</sup> Betsa baecua cuanaque tujatu cuaba juque taura cuana dyaque betsashacuare, tuna ehuidi-uju. Jadya eque ecuana dutya chacha judirucuare uhuaju.

## 28

*Pablo Malta bacani ecububuju eje bucha jucuaque*

<sup>1</sup> Ecuana dutya yahuaju judiruyaju ecuana tuhuaque ecuita cuanara tsurutsacuare. Tunara ecuana cuejatsacuare tumeque ecububu Malta bacanique.

<sup>2</sup> Tunara ecuana jida inime tsehue batsacuare. Ruquenityacuare tuna jetiama etiqui, dyaque bada, nei jadya juya tibu.

—Nejecue. Nebahuinacue etiqui, —jadya tunara ecuana acuare.

<sup>3</sup> Pablotu cuati urada cuanaque mepe jucuare. Etiquiju tujatu iyati iyati acuare. Cuati emaque tucue bacua dyaque ujedaque



juanicuare. Tumetu etiqui uquera tuhuaque cuinanashacuare. Pabloja ebiju cahuyutitsu tujatu emetucuju acuare.

<sup>4</sup> Tuhua aniya cuanaque tuna tuja ebiju bacua ecahuayuti baatsu jadya cacuejatibarecuare:

—Riyaque ecuita ni taa ri quiyeti puji. Enaju emajuuque chacha juhua ama bucha tume taa ri bacuara ahuaju majuya, —jadya tuna jucuare.

<sup>5</sup> Pablорату bacua itatacuare etiquiju. Eje bucha ama cuitadyatu jucuare.

<sup>6</sup> Dutyara tunajatu bacuara ahuaju mujateretsu masadama majuya bucha bacuare. Tsunuda datse ihuatsu tuna eje bucha ama juyaju bacuare. Tuque jida baatsu tunajatu bape inime tupucuaire:

—¡Riyaque taa ri ecuita ama! ¡Ejuudya ri yusu! —jadya tuna jucuare.

—Aijama. Ecuita maju aquiquedya ique, micuana baedya, —jadya tuna Pablora acuare.

<sup>7</sup> Yume cuejadya ecuana Publora acuare tuja etareju cuaishu. Tuquetu ecububuju dyaque inime metseque jucuare. Tura isaaniyaque yahuatamejiji japadama jucuare ecuana etiqui bahui jucuare eque. Quimisha huecaca ecuana tuaqueja anibacacuare. Dyaque jida tura ecuana batsacuare.

<sup>8</sup> Tuja etataquetu ujejeda jucuare. Jaracuaretu baara tsehue, ami buju jadya juyaque. Pablорату cuajiticuare. Tuaqueja jutitsutu Yusu tsehue quisaraticuare. Quisarati amena juatsu tujatu emetucu huanacuare tuque dyaque. Jadya chachanee tujatu acuare Yusuja casa tsehue.

9 Anicuaredya uma e ujejeda cuanaque ecububuju. Publioja etataquepa chacha juhua jadya bacatsu tuna, tuna dyadi ujejeda cuanaque cadujuticuare Pablo queja. Yusuja casa tsehue tujatu ecana chachanecuare.

10 Jadya tibu ecuana tuhua cuanara dyaque jida bacuare. Tunaja cuitadya aniyaque tunara ecuana tyacuare ecuanaja ai ehuitiuju. Ecuana amena yudijidya cuinananucayaju tunara ecuana tyacuare dutya ecuanara ai sareya cuanaque.

### *Pablo Romaju junaticuareque*

11 Tumeque ecububuju ecuana quimisha badi jucuare. Tuhuat ebutaju jaracuare cuaba ebari. Tumeque cuabatu Alejandría juque juticuare cuejipa catibutima jariju. Neticuaretu cuaba huitu queja amaca yusu cueya cueya ecatse Cástor, Pólux jadya.

12 Tumeque cuaba ebari tsehuedya ecuana Malta juque cuanucacuare. Tuhuaque cuinansu ecuana dirucuare Siracusa ebutaju. Tuhua ecuana anibacacuare quimisha huecaca.

13 Cuacuare ecuana ena eque ejiruru eque Regioju judiruya tupu. Huecacape pijidyatu beni cuejiji jutibunenucacuare jida. Huecacanucatsu ecuana Puteoliju junaticuare. Tuhua tupu camadya tuque ecuanaja ena eque aje ishucue ju cuare.

14 Tuhua tuque ecuana tsurucuare ecuana tsehuequi cuanaque. Tunara ecuana ihuamerecuare tuna queja anibaca ishucue. Pacarucu huecaca ecuana tuna queja anibacacuare. Tuequedya ecuana ehuchi eque Romaju cuacuare.

15 Jesús queja ecatyati cuanaque tuna bahue jucuaire ecuana Romaju ehuachi eque cuayaque. Umae cuanara ecuana ihuacuare “Mercadoju Ediji Apio” bacaniju. Peya cuanara ecuana ihuacuare “Quimisha Etare Eaniqui” bacaniju. Tuna baatsutu Pablo pureama jucuaire. Dyaquetu cacasaticuaire.

—Miquemi ecuana tsehue dyaque jida juhua, Tata, —jadya tujatu Yusu acuare.

16 Tuequedya ecuana Romaju junaticuaire. Tuhua ecuana judiruhuaajutu Juliora menaje tyacuare erisi cuanaque Roma juque huaraji cuana. Huaraji cuanaratu Pablo etare apudaju ama ishatsacuare, peya etareju jutidya. Jadya ama bucha tunajatu sudaru queja narumerecuare, tuque ehuanauju.

*Pablora Jesúsja quisarati Romaju cuejacuareque*

17 Quimisha huecaca juatsutu Pablora ihuaramerecuare israelita inime metse cuanaque Romaju anicuare cuanaque. Tuna caradatihuaju tujatu ecana jadya acuare:

—Ecue ata cuana, nequisaratishacue ique, ique quicueneti ishuhua. Ique eje bucha ama juhua ecuanaja ata israelita cuana tsehue. Moisésja cacuat-sashati equedya anihua ecuanaja baba cuanaja bahue eque. Jadya ama bucha ecuanaja ata israelita Jerusalénju cuanaque dyaque cahuaiticuare eatsehue. Inatsu tunara Roma juque huaraji cuana ecuadisha cuana queja menajetyacuare.

18 Huaraji cuanaratu bacacuare ique quicueneti ishuhua quisaratiyaju. Quisaratiyaju ique bacatsu

tunara inajacacara acuare. Dadicuaire ama tuna ni ejeque inimedya jutidya ique iye ishu.

<sup>19</sup> Ecue ata cuanara bacue inajamerecarama acuare. Jadya tibudya “Cuadishacue ique Romaju. Enaruqui dyaque aridara ique jucha metseque, jadya ama juatsu aijama jadique pacuejatsa”, jadya ique jucuare. Jutaqui ju riyadya ique quicueneti ishu, ecue ata israelita cuanatu jucha metse jadya cacuejati ishu ama.

<sup>20</sup> Jadya tibudya micuana ihuaramerehua, era micuana baatsu isaracara aya tibu. Bahuedya micuana, béru yuequedya ecuanaja baba cuanara ihuajacacuareque ama Yusuja Emepeque junayaque. Tumeque Yusuja Ecuadisha quejadya ique catyatihua, Jesús queja cuitadya. Tuaqueja catyatihua tibu, tunara risimerecuare, —jadya tujatu ecana acuare.

<sup>21</sup> —Ecuana ecuana baecua cuita juhua riyaque inime cuana. Ecuana ja ata Judea yahuaju cuanara tuque ecuanaja cuadishachine ama quirica micue ishuque. Israelita cuana tuhuaque jechine cuanara ecuana cuejachine cuana ama cuita mique eje buchique. Ecuana ja yacuaju tuna quisaratichine cuana ama cuita micue ishu.

<sup>22</sup> Bacacara tuque ecuana aya mira Jesús eje buchique cuejayaque. Bacaya tuque ecuana. Dutya quejapa tunajatu quisarati aya; yuneri amapa iyacuaque bahuityayaque jadya. Dyaque jida ecuana miaqueja pana cueja catimerecara juya mira bahuityayaque, —jadya tunajatu acuare.

<sup>23</sup> Jadya juatsu tunajatu iyacuare huecaca caradatinuca ishu. Tumeque huecaca juetihuaju tuna

umada junaticuare Pablo aniya etareju. Tsunuda tuna Pablora isaracuare. Apudajudya catibutihuaque chineya tupu tujatu ecana bahuityacuare. Cuejacuaretu ecana Yusura dutya eje bucha narue adadiyaque. Cuejacuaretu ecana Moisésra, Yusu equeque quisarati cueja puji cuanara Mesías jadya adadiyaque huenecuareque. Cuejacuaretu ecana Jesús cuitadya Mesiasque, Yusuja Emepeque.

<sup>24</sup> Umae israelita cuana casitatihua cuanaratu ejenecuare tura cuejayaque. Tuna tuna Jesús queja catyaticuare. Peya cuanara bacue ejenecuare ama tura cuejayaque.

<sup>25</sup> Caquemitsati caquemitsati juyaque tuna cuinanacuare, dutyara tupu ama inime tupuya tibu. Cuama jarira tuna Pablora acuare:

—Béru yuequedyatu Isaiasra cuejacuare yunerique ecuanaja baba cuana. Yusuja Espiritura tuna jadya cuejamerehua:

<sup>26</sup> “Cuacue micue ata cuana queja.

‘Bacaya tuque micuana Yusura cuejayaque adebayaque ama.

Baya tuque micuana Yusura ayaque, adebayaque ama’ jadya ecana cuejaticue.

<sup>27</sup> Ejeneya ama tunajatu ecue quisarati, tunara ejenecarama aya tibu.

Bacaya ama tunajatu ecue quisarati, tunara bacarama aya tibu.

Bacarama tunajatu aya era ayaque, tunara adebacarama aya tibu.

Ijaca cani catumutihua bucha, yatuca catumutihua bucha jadya tuna juhua.

Cacuareticarama ecana inime juya, ecue ecana tunaja jucha cuana apupuasha ishu”, jadya patu Isaías equé jucuaire Yusu béru.

<sup>28</sup> Pablora tuna isaranucacuare:

—Era micuana bahue amerecara aya. Iyacuatu Jesúsja jidaque quisarati tsapetanaya israelita ama cuana queja. Cuejayaju bacatsu tuna Jesús queja catyatibuque. Tuna tuaqueja jadya catyatie juyaju tunajatu Yusura jucha cuana apupashabuque, —jadya tujatu ecana acuare.

<sup>29</sup> Pablora jadique cuejahuajutu israelita cuana dirucuare, tuna cama caquemitsatiajeyaqué.

<sup>30</sup> Pablotu anicuare beta mara Romaju. Tura cuitadyatu tsujetyacuare etareju ani ishu tuhua. Pureama tsehue tujatu ecana batsacuare dutya tuaqueja jutiya cuanaque, arepa sudarura naruya jari ama bucha.

<sup>31</sup> Ecuíta cuanara batiyaju tujatu ecana Yusura dutya eje bucha narue ayaque cuejatsabarecuare. Bajida tsehue ama tujatu ecana cuejacuare. Dyaque tujatu quisarati acuare Ecuana Cuatsashaquí Jesucristo eje buchique. Huaraji cuanaratu cuejamerejacacuare ama jidaque quisarati.

Riya tupu camadya,

Lucas

**Yusuja Quisarati**  
**New Testament in Cavineña (BL:cav:Cavineña)**

copyright © 2012 Wycliffe Bible Translators, Inc.

Language: Cavineña

Translation by: Wycliffe Bible Translators, Inc.

Cavineña [cav], Bolivia

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Cavineña

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cc

2014-04-22

---

PDF generated using Haiola and XeLaTeX on 18 Apr 2025 from source files  
dated 29 Jan 2022

8e1f7a23-824b-5b2d-af4e-1406fdb68f20